

## ვაჟა შუბითიძე

ევროპეიზაცია და ქართული  
პოლიტიკური აზროვნება  
(საქართველოს ევროპული იდენტობა)

„ტექნიკური უნივერსიტეტი“

## საქართველოს ტექნიკური უნივერსიტეტი

### ვ. შუბითიძე

ევროპეიზაცია და ქართული  
პოლიტიკური აზროვნება  
(საქართველოს ევროპული იდენტობა)



დამტკიცებულია სახელმძღვანელოდ  
სტუ-ის სარედაქციო-საგამომცემლო  
საბჭოს მიერ. 03.04.2013, ოქმი №2

თბილისი  
2013

ეძღვნება დიდი ქართველი პატრიოტების, ქართული ემიგრაციის საშეილიშვილო ღვაწლის წარმომჩენების, ბატონების რეზო თაბუკაშვილისა და გურამ შარაძის ნათელ ხსოვნას.

სახელმძღვანელოში ხაზგასმულია, რომ საქართველო თავისი ისტორიით, კულტურული, სოციალური და გეოპოლიტიკური აგებულებით და მდებარეობით ნაჭერია უკროპის. წიგნი განკუთვნილია საერთაშორისო ურთიერთობის, რეგიონმცოდნეობის, პოლიტიკური მეცნიერებების სპეციალობის სტუდენტებისათვის, ქართველი და უცხოელი დიპლომატებისათვის, სპეციალისტებისათვის.

სამეცნიერო რედაქტორი სრული პროფესორი  
ზ. გამეზარდაშვილი

რეცენზენტები: სრული პროფესორი მ. პაპაშვილი,  
ასოცირებული პროფესორი  
ქ. ჯიჯეიშვილი

© საგამომცემლო სახლი „ტექნიკური უნივერსიტეტი“, 2013

ISBN 978-9941-20-296-4

<http://www.gtu.ge/publishinghouse/>

გველა უფლება დაცულია. ამ წიგნის ნებისმიერი ნაწილის (ტექსტი, ფოტო, ილუსტრაცია თუ სხვ.) გამოყენება არც კრიტიკული და საშუალებით (კლეიტონული თუ გექნიერი) არ შეიძლება გამომცემლის წერილობითი ნებართვის გარეშე.

საუტორო უფლებების დარღვევა ისჯება კანონით.



## შინაარსი

§1. საქართველო – როგორც ევროპის ნაწილი და ევროპული ქვეყანა .....	5
§2. ქართულ-ევროპული ურთიერთობანი ანტიკურ ზანაში და ქრისტიანობის გავრცელება ქართლში .....	17
§3. ევროპელი ჯგაროსნები და საქართველო .....	26
§4. ქართულ-ევროპული ურთიერთობანი შუა საუკუნეებში .....	37
§5. ქართულ-ევროპული დიპლომატიური ურთიერთობანი .....	44
§6. ევროპელი მისიონერები და საქართველო .....	55
§7. ერეკლე მეორე და ევროპა .....	68
§8. ილია ჭავჭავაძე საქართველოს ევროპეიზაციის შესახებ .....	76
§9. ნიკო ნიკოლაძე ევროპული ფასეულობების შესახებ .....	87
§10. არჩილ ჯორჯაძე საქართველოს გაევროპელების გზების თაობაზე .....	101
§11. დავით სარაჯიშვილი – ევროპული ტიპის პირველი ბიზნესმენი საქართველოში .....	112

§12. ნოე ჟორდანიას და ეროვნული მთავრობის ევროპეიზაციის კონცეფცია	125
§13. ევროინტეგრაციასა და ევროპოლოგიაში შეტანილი ქართული წვლილი	137
§14-15 ქართულ-ევროპული თანამედროვე ურთიერთობანი – საქართველოს სწრაფვა ევროკავშირისაკენ	148

## §1 საქართველო – როგორც ევროპის ნაწილი და ევროული ქვეყანა

რა იგულისხმება ევროპაში? რა ხალხები და ერები მოიაზრება ევროპაში? ამ პრობლემასთან დაკავშირებით ძალიან საინტერესო მოსაზრება გამოიქვა პოლ ვალერიმ – დიდმა ფრანგმა მოაზროვნებ და პოეტმა, ჭეშმარიტმა ევროპელმა: „ყველა რასა, ყველა მიწა, რომელიც თანმიმდევრულად იყო რომანიზებული, გაქრისტიანებული, ექვემდებარება ბერძნული დისციპლინის შეგნებას, აბსოლუტურად ევროპულია“.

პოლ ვალერის ამ ფორმულიდან გამომდინარე, საქართველო ისეთივე ევროპული ქვეყანაა, როგორც საბერძნეთი ან იტალია, ან სხვა მათი მსგავსი.

ამრიგად, ევროპა და ევროპელობა არ განისაზღვრება არც გეოგრაფიით, არც რასით, არც ზნე-ჩვეულებებით, არამედ მისი სულის უტყუარი თვისებებებით, სულისა, რომელიც პოლ ვალერის მიერ განსაზღვრული სამი გავლენის მემკვიდრეა.

შემთხვევითი არაა ის ფაქტიც, რომ დღემდე ევროპაში არსებული უძველესი ადამიანის ( $1,8$  მილიონი წელი) ნაშთები ნაპოვნია სწორედ საქართველოში, დმანისში (აქამდე უძველესად ითვლებოდა ესპანეთსა და იტალიაში (ატაპუერკო და ჩეპრანო) აღმოჩენილი ადამიანთა ნაშთები, რომელთა ასაკი 800 ათასი წელია).

ევროპა, როგორც კონტინენტი, პირველად მოხსენიებულია ესქილეს დრამაში ( $472$  წლი ძველი წელთაღრიცხვით). ჯერ კიდევ ბრინჯაოს ხანაში ქართველურ ტომთა ერთი ნაწილი ეგეიდას, აქედან კი დასავლეთ ხმელთაშუაზღვის-

პირეთს აღნევს და შეაქვს ძლიერი ქართველური ენობრივი კომპონენტი. ზოგიერთი ახალი გამოკვლევის თანახმად, თავად ტერმინი „ევროპა“-ც კი შეიძლება ქართველურ ეტი-მოლოგიას გვიჩვენებდეს. ე.ი. ფურნევ ვარაუდობს, რომ ამოსავალი ფუძე ქართველური „ურცობა“ უნდა ყოფილი-ყო; (ხოლო ცნება-ტერმინი „ევროპოლოგია“ და მისი დამ-კვიდრება როგორც ინტეგრაციული სამეცნიერო-კვლევი-თი დისციპლინის, დაკავშირებულია ქართველი ემიგრანტი მეცნიერის **ალექსანდრე ნიკურაძის** სახელთან (1952 წ.).

ძველი წელთაალრიცხვის VI-V საუკუნეებიდან, როდე-საც მსოფლიოს განვითარებაში დაიწყო ევროპულსა და აზიურ გზებს შორის არსებული განსხვავებების გაცნობიე-რება, მოხდა იმის დაფიქსირება, რომ საქართველო ამ ორი სამყაროს გზის გასაყარზე მდებარეობს. ისტორიის მამად წოდებულ ბერძენთან, **პეროდოტესთან** (ძვ. წ. V ს.) ევროპა წარმოდგენილია ატლანტის ოკეანიდან მდინარე ფაზისამ-დე კოლხეთში.

არგონავტების მითის პერსონაჟები გარკვეულწილად განასახიერებენ ევროპა-აზიას შორის არსებულ ურთიერთ-მიმართებას: აიეტი, ზოგიერთი წყაროს თანახმად, კოლ-ხეთში ეფირიდან – ისტორიული საბერძნეთის მხრიდან გადმოსულა. მისი ერთი და, პასიფაე, კრეტის ლეგენდარუ-ლი მეფის მინოსის ცოლია, ხოლო მეორე, გრძნეული კირკე – დასავლეთში გადასახლდება და იტალიის რეგიონში მცხოვრების არა ერთი ტომის ეპონიმთა დედად მოგვევ-ლინა. **მედეას** (ვარაუდობენ, რომ აქედანაა წარმოებული ტერმინი „მედიცინა“) ჯერ ელადაში გადასახლება, შემდეგ კი თავისი შვილით, მედოსით უკან დაბრუნება, ასევე ამ კავშირის ერთგვარ არეკვლას წარმოადგენს (რისმაგ გორ-

დეზიანი). აქედან მოყოლებული ისტორიულად საქართველო მუდმივად იდგა არჩევანის წინაშე – მოქმდინა ორიენტაცია კულტურულ ღირებულებათა ერთ-ერთ ამ სისტემაზე – ევროპულზე ან აზიურზე (ამითაცაა განპირობებული ჩვენი ქართული საზოგადოების ევრაზიული ხასიათი – ჩვენში მაინც უფრო დიდი დოზითაა ევროპული, ვიდრე აზიური).

მიუხედავად იმისა, რომ თავისი ანტიკური და შუა საუკუნეების ისტორიის მნიშვნელოვანი პერიოდი საქართველომ აზიურ გარემოცვაში გაატარა, მისი ყველა პრინციპული არჩევანი ცივილიზაციის სფეროში მსოფლალქმის ევროპულ გზას აძლევდა უპირატესობას. ამან თავისი გამოხატულება პპოვა დამწერლობის, რელიგიის, მხატვრული კულტურის დონეზე, მაგრამ ამასთანავე უნდა აღინიშნოს, რომ ეს არჩევანი არასოდეს იყო აბსოლუტური და ამდენად არ განაპირობებდა ოპოზიციაში – ევროპა-აზია საქართველოს გამოკვეთილად ჩართვას.

ქართულ ცივილიზაციაში ევროპულისა და აზიურის თანაარსებობის ხანგრძლივმა ტრადიციამ, მიუხედავად ევროპულზე ორიენტაციისა, არ შექმნა მისი დომინირების საფუძველი. ჩვენს ფსიქიკაში კრიტიკულ-ანალიტიკური და მითოლოგიური მსოფლალქმის პრინციპები საკმაოდ ჰარმონიულად ერწყმის ერთმანეთს, რაც ქართულ ცივილიზაციას ყოველთვის განარიდებდა ევროპულისა და აზიურის მიმართ შეურიგებელი დაპირისპირებისაგან და მას ორიგინალურ ელფერს აძლევდა.

ამასთანავე, ევროპულისა და აზიურის (ალმოსავლურის) შეპირისპირებისას ხაზი უნდა გაესვას იმისაც, რომ სახელმწიფო ინსტიტუტები, მეტროლოგიური და ფულადი

სისტემები, საქალაქო ცხოვრება, ისტორიოგრაფია და ლიტერატურული ტრადიციები ხშირად სწორედ აღმოსავლეთიდან მოდიოდა და ევროპულთან ერთად თავის კეთილმყოფელ გავლენას საქართველოზე აზიაც ახდენდა, თუმცა, ქართული სული ორივეს ძალზე შერჩევით და შემოქმედებითად ითვისებდა.

თავისებურად არის წარმოდგენილი ევროპის საზღვრები შუა საუკუნეების მოაზროვნეთა ნაშრომებში. ევროპის იდენტობისა და შუა საუკუნეების ევროპის საზღვრების აღქმისათვის მნიშვნელოვანია, თუ რას დავუშვებთ ევროპის სივრცის მთავარ მახასიათებლად – ზოგადად ქრისტიანობას თუ მოგვიანებით კათოლიციზმის და რომის პაპის გავლენის სივრცეს ან კიდევ სოციალურ სტრუქტურას, რომელიც იქნებოდა დამახასიათებელი ევროპული ფეოდალიზმისათვის, ან თუნდაც კლიმატურ ზონებს. პროფესორ გ. ბორგოლტეს მოაქვს გრაფ კალერგის მიერ მოცემული ევროპის დახასიათება ისტორიულ ჭრილში, სადაც იგი აღნიშნავს ევროპის 5 ეტაპს. მისი აზრით, პირველი ეტაპის ევროპა არის ძველი საბერძნეთი სპარსეთის საპირისპიროდ, მეორე ევროპა არის შექმნილი რომის მიერ და მისი აღმოსავლეთი საზღვრები წარმოდგენლია რაინამდე და დონამდე, ხოლო აღმოსავლეთით მდებარე ბიზანტიის სახელმწიფო წარმოადგენს ევრაზიულ სახელმწიფოს ეპროპასა და ორიენტს (აღმოსავლეთს) შორის.

VI საუკუნის მოღვაწის ისიდორე სევილიელის „ეტიმოლოგიაში“ მითითებულია, რომ დედამიწა იყოფა სამ ნაწილად: აზიად, აფრიკად და ევროპად. ევროპის შემადგენლობაში მოიაზრება ბიზანტიია მთელი თავისი აღმოსავლური ტერიტორიებით.

დედამიწის სამ ნაწილად წარმოდგენა დამახასიათებელია შუა საუკუნეების ნაშრომებისათვის, რომლებშიც ასეთი დაყოფის საფუძვლად იღებენ ბიბლიურ სიუჟეტს – ნოეს სამი ვაჟის (სემი, ქამი და იაფეტი), რომელთაგან უმცროსს – იაფეტს ერგო ევროპა. საზღვარი სემისა და იაფეტის შთამომავლებს, ანუ აზიასა და ევროპას შორის ამ ნაშრომებში მხოლოდ ერთგანაა განმარტებული და მდებარეობს მცირე აზიაში.

**IX საუკუნეში სანტ-გალენის მონასტერში შედგენილ რუკაზე აღნიშნულია ევროპა, აზია და აფრიკა და დართულია განმარტება, რომ ასე გაინანილეს ნოეს ვაჟებმა დედამიწა. ასევე მითითება მაღალი შუა საუკუნეების ქრონიკებში ევროპის საზღვრების შესახებ, რუკაზე ის მეტ-ნაკლებად გამოკვეთილია, ხოლო კომენტარებში მისი საზღვრები აღმოსავლეოში გადის.**

შუა საუკუნეების რუკები შედგენილია თანამედროვე მსოფლმხედველობის მიხედვით და ძირითადად აღნიშნულია წმინდა ადგილები, რადგანაც შუა საუკუნეების ადამიანის შორეული გადაადგილების ძირითადი მიზანი ვაჭრობასთან ერთად სიწმინდეების მოხილვა იყო.

მოტანილი ზოგადი დახასიათება ევროპის საზღვრებისა, რომელიც მოცემულია შუა საუკუნეების ლიტერატურაში, საყურადღებო ინფორმაციას იძლევა საქართველოს ისტორიისათვის.

ქართული საისტორიო ტრადიციით ქართველთა წარმოშობის იაფეტური თეორია თავისთავად მიაკუთვნებს საქართველოს ევროპას, რომელიც, როგორც აღინიშნა, შუა საუკუნეების ევროპულ ავტორთა მიხედვით იყო იაფეტის შთამომავალთა სამშობლო. ასევე ის თეორია, რომლის

თანახმადაც ანტიკურ და ადრეექტისტიანულ ხანაში ევროპისა და აზიის განმასხვავებლად წარმოდგენილია არსებული დაპირისპირება ელინისტურ სამყაროსა და ირანს შორის, ასეთივე თავისუფალი დასკვნის საშუალებას იძლევა საქართველოს ევროპულ სივრცეში წარმოდგენისათვის, – რადგან საქართველო მუდმივად წარმოადგენდა ბერძენთა მოკავშირეს ირანის წინააღმდეგ ბრძოლაში და დარიალის კარის დამცველს, საიდანაც შემოდიოდა ევროპისათვის უცხო ელემენტი. სიკვდილის წინ ვახტანგ გორგასალმა დატოვა ანდერძი, რომლის აღსრულება საუკუნეთა მანძილზე განსაზღვრავდა ქართველთა ლტოლვას ევროპული სივრცისაკენ: „ნუ მიატოვებთ ბერძენთა (ე.ი. ბიზანტიიელთა, ევროპელთა) სიყვარულს“.

ის, რომ ქართული საისტორიო ტრადიცია ქართულ სახელმწიფოს ალექსანდრე მაკედონელის იმპერიის ნგრევისა და დაშლის შედეგად წარმოშობილად მიიჩნევს (აზო და ფარნავაზი, III საუკუნე ძვ. წ.), კიდევ ერთი დადასტურებაა ქართული სივრცის ევროპულისათვის მიკუთვნებულობისა, რადგანაც ევროპა არის ის, რაც ელინისტური ტრადიციების საფუძველზე წარმოიშვა.

საქართველოს ადრეული კავშირები დასავლეთთან ასახულია ცნობილ მითში არგონავტების შესახებ. ძვ. წ. აღ-ის II ათასწლეულის ბოლო მესამედში ბერძნები იოლკოსიდან ჩამოვიდნენ „ოქრომრავალ კოლხეთში“ ოქროს საწმისისათვის. მათ ნავს არგო ერქვა, ხოლო ექსპედიციის მონაწილეებს – არგონავტები. ძვ. წ. აღ-ის VI-V საუკუნეებში მილეთელმა ბერძნებმა მარსელთან, ნეაპოლთან, ბიზანტიონის მსგავსად ეგრისში (კოლხეთი) შავი ზღვის აღმოსავლეთ სანაპიროზე სავაჭრო ფაქტორიები დაარსეს: ფაზი-

სი (ფოთი), დიოსკურია (სოხუმი), პიტიუნტი (ბიჭვინთა), გიგენისი (ოჩამჩირე). კოლხეთში იჭრებოდა კოლხური თეთრი, რაც სავაჭრო ურთიერთობების მაღალ დონეზე მეტყველებს.

ცნობილმა რომაელმა სარდალმა პომპეუსმა ძვ. წ. აღ-ის 65 წელს იბერიაში (ქართლში) ილაშქრა და აქ რომი შემოიყვანა. მალე ქართლის ურთიერთობამ რომთან „მეგობრობისა და მოკავშირეობის“ ფორმა მიიღო. რომის იმპერატორები (მაგ., ადრიანე, ანტონინე პიუსი) სხვადასხვა ხერხებით ცდილობდნენ ქართლის მეფეების კეთილგანნყობის მოპოვებას მაგ., 140-იან წლებში (ახალი წელთაღრიცხვით) იბერიის მეფე ფარსმან II ქველი რომში მიიწვია ანტონინე პიუსმა და მისი ცხენზე ამხედრებული ქანდაკება მარსის ველზე ტაძარში დაადგმევინა.

ქრისტიანობის გავრცელება საქართველოში | საუკუნე-შივე დაიწყო, როდესაც აქ ანდრია პირველწოდებული, სიმონ კანანელი, მატათა – ქრისტეს მოციქულები ჩამოვიდნენ. პირველი საეპისკოპოსო საქართველოში – ანურში ანდრია პირველწოდებულმა დაარსა. მანვე დანიშნა პირველი ეპისკოპოსი, რამდენიმე მღვდელი და დიაკონი.

ისტორიული წყაროების მიხედვით უფლის კვართი და-კრძალულია სვეტიცხოვლის ტაძარში, ილია წინასწარმეტყველის ხალენი – მცხეთაში, ხოლო ღმრთისმშობლის კვართი ხობის მონასტერში ინახებოდა, რომელიც ამჟამად ზუგდიდის მუზეუმშია დაცული.

298 წელს რომსა და სასანიან სპარსეთს შორის ნისი-ბინში დადებული ზავით ქართლის სამეფო რომის პოლიტიკური კონტროლის ქვეშ მოექცა, რამაც ხელისუფლებას ქრისტიანობის ალიარების შესაძლებლობა მისცა. ქართვე-

ლები მონაწილეობდნენ ქრისტიანული მრჩამსის ჩამოყალიბებაში. ბიჭვინთის ეპისკოპოსი სტრატოფილე ესწრებოდა ნიკეაში 325 წელს გამართულ პირველ მსოფლიო საეკლესიო კრებას, ხოლო ქართლის ეპისკოპოსი პანტოფილე – მეორე საეკლესიო კრებას.

ქართლში ქრისტიანობა სახელმწიფო რელიგიად 326 წელს გამოცხადდა. დაახლოებით ამავე დროს მოხდა მისი გამოცხადება ეგრისში (ლაზიკაში), იმ დროს, როცა ორი უძლიერესი სახელმწიფო – რომი და სასანიდების ირანი ერთმანეთს პირველობას ეცილებოდა, ქართველ ხელისუფალთა ეს ნაბიჯი დასავლეთისა და აღმოსავლეთის შესაყარზე მდებარე საქართველოსათვის დასავლეთზე (ეპროპაზე) პოლიტიკურ ორიენტაციას ნიშნავდა, რამაც სამუდამოდ განსაზღვრა ქვეყნის შემდგომი ბედი და სამუდამოდ დაკავშირა ქართველი ხალხი და კულტურა დასავლეთს.

596 წელს ქართლის კათალოკოსმა კირიონ I-მა, რომელსაც მიმოწერა ჰქონდა რომის პაპ გრიგოლ დიდთან, მტკიცედ მიაბრუნა ქართული ეკლესია ბიზანტიური დიოციზიტობისაკენ (დასავლეთ საქართველოში ამ დროს დიოციზიტობა იყო გაბატონებული, თუ კირიონი მხარს დაუჭერდა მონოფიზიტობას, ფაქტიურად დასავლეთი და აღმოსავლეთ საქართველო დაშორდებოდნენ ერთმანეთს და ქართლსაც ირანი და სომხეთი მოინელებდნენ. კირიონმა ამ აქტით შექმნა საფუძველი საეკლესიო და კულტურული ერთობისათვის, რაც დასავლურ (ევროპულ) ორიენტაციას ნიშნავდა). VII საუკუნის დასაწყისში მონოფიზიტური სომხეთის კათალიკოსმა აბრაამმა კირიონს მისწერა: „დაუჯერებლად გვეჩვენება, რომ უცხო სამეფოსთან (ბიზანტიის-

თან) შექმნას მეფეთა მეფის მონათაგანმა სიყვარულის ერთობა და ბუნებით თანამოაზრეს (ირანს) გაშორდესო“.  
 ქართველმა არსენ იყალთოელმა XII საუკუნეში ბერძნულიდან ქართულ ენაზე თარგმნა „დიდი სჯულის კანონი“, 920 წლის სრული ვერსია, რომელიც მსოფლიო მართლმადიდებლური ეკლესიის კანონიკური კოდექსია. ქართველები კარგად იცნობდნენ პომეროსის პოემებს და შუა საუკუნეებში საქართველოში შექმნილი ნაშრომები სამედიცინო, ფილოსოფიურ და ფილოლოგიურ დარგებში ბერძნული ტრადიციების გავლენას განიცდიდა – იქ წარმოდგენილი იყვნენ დემოკრიტეს, ხოკრატეს, პლატონის, არისტოტელეს და ფილოს მსგავსი ფილოსოფოსები. ნეოპლატონიზმის იდეებმა ქართულ კულტურაში შეაღწია დიონისიუსის კორპუსის მეშვეობით, რომლის ავტორიც, შალვა ნუცუბიძისა და ბელგიელი მეცნიერის პონიგმანის ვარაუდით, იყო მაიუმის ეპისკოპოსი, უდიდესი ქართველი მოაზროვნე პეტრე იბერი (401-491).

რომაულ-ბიზანტიური ტრადიციების მსგავსად, საქართველოს კანონმდებლობა ეფუძნებოდა ლიბერალურ-დემოკრატიულ და ტოლერანტულ პრინციპებს.

მეფე დარბაზთან ერთად მართავდა ქვეყანას. XII საუკუნეში, თამარ მეფის დროს, ყუთლუ-არსლანის დასმა წამოაყენა „ისნის კარავის“ იდეა, რომელიც გულისხმობდა მეფის უფლებების შეზღუდვას და ძალაუფლების გადანაწილებას, რაც ევროპაში 80 წლის მერე განხორციელდა. XII საუკუნის დასაწყისში დავით IV აღმაშენებელმა დააარსა და ფაქტიურად ცალკე გამოყო „სააჯო კარი“, ანუ სასამართლო, სადაც ნებისმიერს შეეძლო საჩივრის შეტანა, მათ შორის გლეხსაც, ბატონის წინააღმდეგ. ინგლისის

მსგავსად, ქართულ მართლმსაჯულებაში ნაფიც მსაჯულ-თა ინსტიტუტის ჩანასახი არსებობდა, როდესაც განაჩენს საგანგებოდ შერჩეული 12 კაცის ჩვენების საფუძველზე მიიღებდნენ (სასამართლოში ცალკე იყო სისხლის სამართლის საქმეები, ცალკე კი – სამოქალაქო).

საქართველოს სამართალი, ევროპის მსგავსად, იცავდა კერძო საკუთრებას. მიწაზე კერძო საკუთრება, აღმოსავლეთისაგან განსხვავებით, საუკუნეების მანძილზე საქართველოში გაბატონებული სისტემა იყო და კერძო საკუთრება მემკვიდრეობით გადაეცემოდა. ქართული საერო სამართალი ყველაზე მძიმე დანაშაულის შემთხვევაშიც კი არ განიხილავდა სიკვდილით დასჯას ან სხეულის მძიმე დაზიანებას (ლალატის შემთხვევაში სიკვდილით დასჯაზე ან დაბრმავებაზე გადაწყვეტილებებს ინდივიდუალურად იღებდნენ). ქართული კანონი ქალის უფლებებს იცავდა. ქალები, მამაკაცთა მსგავსად, მემკვიდრეობასაც იღებდნენ და ქვეყნის მართვასა და დიპლომატიაში მონაწილეობდნენ.

ისტორიულ მეხსიერებას არ შემოუნახავს ქალის სიკვდილით დასჯის არც ერთი შემთხვევა (ევროპისაგან განსხვავებით). გენდერული, სქესთა შორის, თანასწორობის იდეა ასახულია, როგორც იურიდიულ და ისტორიულ დოკუმენტებში, ასევე მხატვრულ ნაწარმოებებში (მაგ., შოთა რუსთაველის „ვეფხისტყაოსანში“ – „ლეკვილომისა სწორია, ძუ იყოს, თუნდაც ხვადია“. აკრძალული იყო ქალის მოტაცება. კანონი მკაფრი იყო მათ მიმართ, ვინც უსამართლოდ ტოვებდა ცოლს, რადგან ოჯახი განიხილებოდა, როგორც სახელმწიფოს საფუძველი. გაყრის შემთხვევაში კანონი მუდამ ქალის მხარეს იყო, მაშინაც კი თუ გაყრის

მიზეზი ქალის დალატი იყო, კანონი ცდილობდა დაეცვა ქალის უფლებები და ამ შემთხვევაში მისთვის მზიოვის უკან დაბრუნებას ითხოვდა (ალექსანდრე დიუმა, რომელიც თბილისში 1858 წლის ბოლოს იმყოფებოდა 2 თვით, წერდა, რომ ქართველი ქალბატონების ჩაცმულობა იტალიურ მოდას მხოლოდ ორი კვირით ჩამორჩებოდა).

1054 წელს ქრისტიანული სამყარო ორ დაპირისპირებულ ბანაკად გაიყო: კათოლიკებად და მართლმადიდებლებად. მიუხედავად მომხდარი ფაქტისა, ეს მოვლენა ქართულ მართლმადიდებლურ ეკლესიას და სამეფო ხელისუფლებას იმთავითც არ უცვნია და ისინი ინარჩუნებდნენ კავშირს კათოლიკურ ეკლესიასთან XV საუკუნემდე (კავასიაში რუსეთის გამოჩენამდე). მაგალითად: 1223 წელს რუსუდან მეფე და მხედართმთავარი ივანე მხარგრძელი უგზავნიან წერილს რომის პაპს და მას მოიხსენიებენ როგორც „მამას“, „ყველა ქრისტიანთა მთავარს“.

1318 წელს სოხუმში დაარსდა კათოლიკური საეპისკოპოსო, 1328 წელს რომის პაპმა გააუქმა სმირნის საეპისკოპოსო და იგი თბილისში გადმოიტანა. ამ დროიდან საქართველოში ჩამოსვლას იწყებენ ევროპელი კათოლიკე მისიონერები, რომლებიც აქ ბევრს იღწვოდნენ განათლება-კულტურის სფეროში და ქვეყანას აკავშირებდნენ ევროპასთან. ქართველები ევროპელებთან ერთად მონაწილეობდნენ ანტიოქიასმალურ კოალიციებში.

სერიოზული ურთიერთობანი და მიწერ-მოწერა ჰქონდათ ევროპელ მონარქებთან ქართველ მეფეებს: გიორგი V ბრწყინვალეს, გიორგი VIII-ს, კონსტანტინე II-ს, მამა-შვილ ლუარსაბ I-ს და სიმონ I-ს, თეიმურაზ I-ს, გიორგი XI-ს, ვახტანგ VI-ს, ერეკლე II-ს და სხვებს. ქართველ მოღვაწეებს ევ-

როპელებთან ურთიერთობა არც მაშინ შეუწყვეტიათ, როცა მეფის რუსეთმა მოტყუებით, ვერაგულად მოახდინა საქართველოს ანექსია 1801 წელს. 117-ნლიანი რუსული მონობისაგან გათავისუფლებულმა საქართველომ და მისმა ხელისუფლებამ ნოე უორდანიას მეთაურობით 1918 წლის 26 მაისიდან კვლავ დაიწყო ევროპასთან ურთიერთობის განახლება და გაფართოება, თუმცა, 1921 წლის თებერვალში აქ შემოჭრილმა ბოლშევიკურმა რუსეთმა ძალით დაამხო დამოუკიდებელი საქართველოს მთავრობა და თავისი მარიონეტები დასვა. დამოუკიდებელი საქართველოს ლეგიტიმურმა ხელისუფლებამ ხელი არ მოაწერა კაპიტულაციას და დამფუძნებელი კრების დადგენილებით ემიგრაციაში ევროპაში, კერძოდ, საფრანგეთში წავიდა. 1992 წლიდან საბჭოთა კავშირის დაშლის შემდეგ საქართველომ დამოუკიდებლობა აღიდგინა და გეზი კვლავ ევროპისაკენ აიღო. ასეთი მჭიდრო ურთიერთობები საქართველოს ევროპასთან არასოდეს ჰქონია. საქართველო ნელ-ნელა საკუთარ ადგილს იკავებს ევროპულ სივრცეში და უბრუნდება ევროპის წიაღს, საიდანაც ის ოსმალებმა და რუსებმა იძულებით მოწყვიტეს.

### **პითხევები:**

1. რა არის ევროპა და რა ხალხები და ერები მოიაზრება ევროპაში?
2. რა არგუმენტებით შეიძლება ვამტკიცოთ, რომ საქართველო ევროპის ნაწილი და ევროპული ქვეყანაა?
3. როგორია თანამედროვე საქართველოს პოლიტიკური ორიენტაცია?

## §2 ქართულ-ევროპული ურთიერთობასი ანტიურ ხანაში და ძრისფიანობის გავრცელება ქართლში

ისტორიამ ქართველი ხალხი და ქართული კულტურა არა ერთხელ დააყენა აღმოსავლურსა და დასავლურს (აზია და ევროპას) შორის არჩევანის წინაშე. ქართველთა არჩევანი ყოველთვის ევროპას ერგებოდა ხოლმე.

ისტორიულ არჩევანთა შორის ყველაზე დიდი – ქრისტიანობის ანუ ევროპეიზმის სასარგებლოდ გაკეთდა. ქრისტიანობით გაშინაარსდა და შემოისაზღვრა ის დიდი კულტურული სივრცე, რასაც დღევანდელი ევროპული კულტურული სამყარო ჰქვია. ამ სამყაროს რაგვარობის განსაზღვრაში კი საქართველოც მონაწილეობდა. იგი არა მხოლოდ ერთგულობდა ევროპული ცივილიზაციის იდეალებს, არამედ ქრისტიანობა სახელმწიფო და ეროვნულ იდეალებთან, ეთნიკურობასთან გააიგივა.

ქრისტიანობის გავრცელებას კი წინ უძლოდა ევროპულ სამყაროსთან დაახლოება და ორივე კულტურის ურთიერთგამსჭვალვა.

გეოგრაფიულადაც და, რაც უდრო მნიშვნელოვანია, სულიერი და კულტურული თვალსაზრისით, საქართველოს თავი მუდამ მიაჩნდა ევროპული ცივილიზაციის ნაწილად.

ევროპა კი მაშინ უპირატესად ორიენტირებული იყო ბერძნულ (ელინურ) მოდელზე, რაც ქართველებშიც გავრცელდა ძვ. წ. VI-V საუკუნეებში აქ დაარსებული ბერძნული სავაჭრო ფაქტორიების (კოლონიების) – დიოსკურია (სოხუმი), გიენოსი (ოჩამჩირე), ფაზისი (ფოთი), პიტიუნტი (ბიჭვინთა) და სხვათა მეშვეობით. ამ მოდელისთვის დამახასიათებელი იყო:



- ა) მრავალრიცხოვანი, პოლიტიკურად დეზინტეგრირებული (დაქსაქსული) პოლისის ორგანიზაციის მონიერინიკური სტრუქტურები ცენტრალიზებული ხელისუფლების გარეშე;
- ბ) თავისუფალ მოქალაქეთა მიერ მიღებული კანონების უზენაესობა, პოლიტიკური ხელმძღვანელის გაღმერთების სრული გამორიცხვა;
- გ) მოქალაქეთა პოლიტიკური უფლებებისა და თავისუფლების მაღალი ხარისხი;
- დ) კანონებისა და პოლისის ერთგულება – მოქალაქეობრივი და პატრიოტული თვითშეგნების უმაღლესი გამოხატულება;
- ე) თავისუფალი პიროვნების, მოქალაქის უფლებათა აღიარება და მათი მიჩნევა საზოგადოების ფუნქციონირების საფუძვლად;
- ვ) უპირატესად იმ ღირებულებათა აღიარება, რომლებიც კრიტიკული და ანალიტიკური განსჯის შედეგად მიიჩნევა უმაღლეს ჭეშმარიტებად;
- ზ) ერთიანი ოფიციალური სახელმწიფო ენის არარსებობა, წერილობით საკომუნიკაციო საშუალებად რომელიმე დიალექტის გამოყენება.
- ამისაგან განსხვავებით, აზია (აღმოსავლეთი) ორიენტირებული იყო სრულიად საპირისპირო მოდელზე, რომლის მემკვიდრედ 558-330 ნლებში ძველი წელთაღრიცხვით სპარსეთის აქემენიდების იმპერია მოგვევლინა.
- რამდენადაც მკვეთრად იკვეთებოდა ტაპირისპირება ევროპა-აზიას შორის, იმდენად ნათელი ხდებოდა, რომ საჭირო იყო მისი წეიტრალიზაციაც, რათა ეს ორი სამყარო კულტურულად რამდენადმე გაერთიანებულიყო. აქემენი-

დების დროს ამ დაპირისპირების გადასაწყვეტად ვერ მონახეს უკეთესი გზა, ვიდრე ერთი სამყაროს მიერ მეორის დაქვემდებარება, დაპყრობა (ამის კარგი მაგალითია ბერძენ-სპარსელთა ომები ძვ. წ. V-IV საუკუნეებში). ამ მხრივ ერთგვარ გამონაკლისად ალექსანდრე მაკედონელი წარმოგვიდგება. მის მიერ შექმნილი მსოფლიო იმპერია ანუ ელინისტური სამყარო შედეგი იყო სამი ერთიანობის პრინციპის განხორციელებისა: პოლიტიკურ-ეკონომიკურის, კულტურულის და ენობრივის, რაც ნიშნავდა განსხვავებული და მრავალგვარი ელემენტების ინტეგრაციას ცივილიზაციის ერთიან სტრუქტურაში. ევროპა-აზიის დაპირისპირების საქმეში უფრო მეტ ნეიტრალიზაციას მიაღწია რომის იმპერიამ, რომელმაც რომაული მშვიდობის (Pax Romana) იდეოლოგიას დაუქვემდებარა მის მიერ დაპყრობილი მსოფლიოს დიდი ნაწილი. თუმცა, იმპერიის ფარგლებში, მაგრამ რამდენიმე საუკუნის განმავლობაში მსოფლიო რამდენადმე ერთი გახდა. პომპეუსის ლაშქრობის შემდეგ (ძვ. წ. 65 წ.) ძველი იძერიაც ამ სამყაროს ნაწილი გახდა და ევროპულ-ქართული ინტეგრაციაც რეალურად მაშინ დაიწყო. ეს ურთიერთობა ცხოვრების ყველა სფეროს მოიცავდა და ინტენსიურ ხასიათს ატარებდა. ამაზე მეტყველებს ქართველი მეფის – ფარსმან II „ქველის“ დიდი ამაღლით სტუმრობა რომში და მისი იქ დიდი პატივით მიღება.

თუმცა, ამ დაპირისპირების მოხსნას ევროპულ-აზიურ სამყაროს შორის უფრო მეტად გარეგნული ხასიათი პქონდა, ვიდრე შინაგანი. სწორედ ამიტომ ანტიკური სამყაროს დაქვეითებისა და რომის იმპერიის დაცემის შემდეგ ამ დაპირისპირებამ ახალი ძალით იჩინა თავი. იგი სულ უფრო

მეტად გადაიქცა დაპირისპირებად ჯერ ქრისტიანობა-მაზდეანობას, მერე კი ქრისტიანობასა და მუსულმანობას შორის. ქრისტიანობა უპირატესად მოერგო იმ ქვეყნებს, რომლებიც ევროპაში იყვნენ განლაგებულნი და რომლებიც ეგეოსურ-ელინური კულტურული ძირები ჰქონდათ, ხოლო მეორე იდეოლოგია იმ ქვეყნებს, რომლებიც აზიაში იყვნენ განლაგებულნი და რომელთაც მესოპოტამიური კულტურული ფესვები ჰქონდათ.

ახალმა რელიგიამ, ქრისტიანობამ, მისი აღმოცენები-დან ოფიციალურ დამკვიდრებამდე როული და ძნელი გზა განვლო. I-IV საუკუნეებში მან განიცადა ხანგრძლივი დევ-ნა და შევიწროება, მაგრამ ამ გზაზე იგი განმტკიცდა და შეკავშირდა. უკვე II საუკუნის მიჯნაზე რომის ეკლესიამ უპირატესი მდგომარეობა მოიპოვა ქრისტიანულ სამყარო-ში. ეს იმიტომ, რომ იგი მოქმედებდა იმპერიის პოლიტი-კური ცხოვრების ცენტრში და მაგნიტივით იზიდავდა სხვა ქვეყნების ქრისტიანებს.

ქრისტიანობის ისტორიაში ახალი ერა დაიწყო IV საუ-კუნის დასაწყისში. 313 წლის თებერვალში რომის იმპე-რიატორმა კონსტანტინე I დიდმა (რომელმაც ჩაანაცვლა ქრისტიანთა მდევნელი და წმინდა გიორგის სიკვდილით დამსჯელი დიოკლეტიანე) „მილანის ედიქტით“ თავის ქვე-შევრდომებს ნება დართო, რომ ქრისტიანობა უშიშრად ელიარებინათ და იგი ოფიციალურ რელიგიადაც იქნა მიჩ-ნეული.

ქრისტიანობა ყველა ქვეყანაში ერთდროულად არ გა-ვრცელებულა, რომაელთა გავლენით ქრისტიანობამ ძალზე ადრე შეაღწია საქართველოში. პირველად იგი გავრცელ-

და დასავლეთ საქართველოში – აჭარა-კოლხეთში პირველ საუკუნეში.

უძველესი გადმოცემის თანახმად აქ ქრისტიანული სარ-წმუნოება იქადაგეს თვით ქრისტეს მოციქულებმა – წმინდა ანდრია პირველწოდებულმა, სვიმონ კანანელმა და მატა-თამ. სვიმონ კანანელი აქვე გარდაცვლილა და დაუკრ-ძალავთ აფხაზეთში, ანაკოფია-ათონის მიდამოებში, სადაც შემდეგ დიდი ტაძარიც კი ააგეს.

(როდესაც მოციქულებმა მსოფლიოს ცალკეული ქვეყნე-ბი გაიყვეს საქადაგებლად, საქართველოს გაქრისტიანება წილად ხვდა ღვთისმშობელს. ამიტომ საქართველოს ღვთისმშობლის წილხვედრ ქვეყანას უწოდებენ. როცა ის საქართველოში გასამგზავრებლად მოემზადა, უფალმა მი-სი იერუსალიმში დარჩენა ინება და აღუთქვა, რომ მომა-ვალში მისი წილხვედრი ქვეყანა გაბრნყინდებოდა. ამის შემდეგ ღვთისმშობელმა საქართველოს მოქცევა მიანდო წმინდა ანდრია პირველწოდებულს და სვიმონ კანანელს. მოციქულებმა ღვთისმშობლისაგან მიიღეს ხატი და ქრის-ტიანობის საქადაგებლად წამოვიდნენ (საქართველოში). ასე რომ, ქრისტიანული თემები მოციქულთა დროიდან, პირველი საუკუნიდანვე ჩნდება საქართველოში.

საქართველოს ნამდვილი მოქცევა კი მოხდა მოგვიანე-ბით, კერძოდ IV საუკუნეში მოციქულთა სწორის წმინდა ნინოს მიერ, რომელიც იყო მთავარმოწამე წმინდა გიორ-გის ბიძაშვილი. დღეს საკამათოდ არ ითვლება, რომ წმინ-და ნინო წარმოშობით ქართველია. იგი იყო კაპადოკიიდან, სადაც მკვიდრობდნენ ქართველები (კოლხები, ჭანები), აქედანვე იყო წმინდა გიორგიც, რომელიც დღემდე ყველა-

ზე მეტად უყვართ და რომლისაც ასე სწამო ქართველებს. ეს დაახლოებით 326 წელს მოხდა.

ამრიგად, საქართველოში ქრისტიანობამ რომის იმპერიის თანადროულად გაიმარჯვა. ნიკეის საეკლესიო კრებას (325 წ.) უკვე ესწრებოდა ბიჭვინთის ეპისკოპოსი სტრატოფილე. ეს არ იყო შემთხვევითი მოვლენა, რადგან იმდროინდელი საქართველო მჭიდროდ იყო დაკავშირებული რომთან და ქართლი და ეგრისი რომის იმპერიის პოლიტიკური და კულტურული ცხოვრების ორბიტაში მოქმედი.

მიჩნეულია, რომ კონსტანტინე დიდის (306-337 წწ.) დროს გაქრისტიანებული საქართველოს მირიან მეფის თხოვნით თავისი პირველი იერარქია რომიდან განენესა, ხოლო შემდეგ ქართული ეკლესია იერარქიულად ანტიოქიის ეკლესიაზე იყო დამოკიდებული. ქართლის ეკლესიამ ავტოკეფალია ვახტანგ გორგასლის დროს მოიპოვა 487-488 წლებში, რაც დაადასტურა 681 წელს კონსტანტინე-პოლის VI მსოფლიო საეკლესიო კრებამ. რაც შეეხება დასავლეთ საქართველოს, აქ ბერძნულ-რომაული ეკლესიის გავლენა X საუკუნის დასაწყისამდე გაგრძელდა (უნდა ითქვას, რომ დასავლეთ საქართველოში IX საუკუნემდე ქართული წარწერაც კი არაა აღმოჩენილი – ძირითადად სულ ბერძნულია). X საუკუნის დასაწყისში დასავლეთ საქართველომ კონსტანტინოპოლის საპატრიიარქოსაგან ავტოკეფალია მოიპოვა. ერთიანი ქართული სახელმწიფოს შექმნის შემდეგ, XI საუკუნეში დასავლეთ საქართველოს ეკლესია მცხეთის საკათალიკოსოს დაექვემდებარა და ეკლესიებში ღვთისმსახურება იქ ქართულ ენაზე დაიწყო.

ნიშანდობლივია, რომ წმინდა ნინოს მიერ ქართლის მოქცევა უყურადღებოდ არ დარჩენიათ რომში, სადაც აინტერესებდათ „ქართლის საქმენი“. გადმოცემით გამოგზავნილმა მთავარდიაკონმა იხილა რა ქართლში ნინოს მიერ მოხდენილი სასწაულები, მან ისინი აღწერა მატიანეში. ამას უკავშირდება ასევე რომის პაპის სილვესტრი I (314-335) ნერილი წმინდა ნინოსადმი, რომელშიც უჩვენებდა იმ გზას, რომელიც ეკლესიას უნდა გაევლო. ამ გზამ გამოიწვია რომთან სარწმუნოებრივი კავშირის განმტკიცება. ნიშანდობლივია ისიც, რომ წმინდა ნინო რომის ეკლესიაში წმინდანად შერაცხა (15 დეკემბერს მისი დღესასწაული აღინიშნება რომში). რომის ეკლესიასთან მჭიდრო კავშირი შემდეგაც გაგრძელდა. ცნობილია იბერიის კათალიკოსის კირიონ I (596-610) ნერილი რომის პაპის გრიგოლ I დიდი-სადმი.

ქართლის კათალიკოსს კირიონ I-ს (იგი ჯავახეთიდან იყო წარმოშობით) სწავლა გაუგრძელებია საბერძნეთში, მცირე აზიის ქ. კოლონიაში, სადაც 15 ნელი დაუყვია და საფუძვლიანი განათლება მიუღია. რადგან კირიონი აღზრდილი იყო საბერძნეთში დიოციზიტურ ტრადიციებზე, ის ქართლში შემოსვლის შემდეგ დაუპირისპირდა სომხურ მონოფიზიტობას. სომხებთან სარწმუნოებრივ დავაში კირიონი მედგრად იცავდა ქალკედონის კრების (451 წ.) ქრისტოლოგიას და ამით ქართული ეკლესიის ოვითმყოფადობას.

**გრიგოლ I დიდმა საპასუხო ნერილი მისწერა კირიონს** (გრიგოლ I დიდის ლიტერატურული მემკვიდრეობა „დიალოგონი“, „ქადაგებანი“, „მწყემსებრივი დარიგებანი“ ქართულად თარგმნა შემდგომში ექვთიმე მთაწმინდელმა. გრი-

გოლ I დიდის „დიალოლონში“ მოხსენიებულია V საუკუნის გამოჩენილი ქართველი მოღვაწე პეტრე იბერი). ის ფაქტი, რომ კირიონმა რომის პაპს მიმართა და არა კონსტანტი-ნეპოლის პატრიარქს, მიუთითებს იმაზე, რომ იბერიის ეკლესია განსაკუთრებულ ავტორიტეტად მიიჩნევდა რომის პაპს და რომთან ურთიერთობას.

რომის პაპის გრიგოლ I დიდის წერილი კირიონ I-სადმი მოწმობს, რომ ქართველებსა და რომაელ ქრისტიანებს შორის მისვლა-მოსვლა და სარწმუნოებრივი ურთიერთობა ადრეულ საუკუნეებში არსებულა, ამასთან საქართველოს სასულიერო მესვეურებს სარწმუნოების საკითხებში რომთან უფრო ჰქონია კავშირი, ვიდრე ბერძნებთან, რომებმაც ბევრჯერ გადაუხვიეს მრნამსიდან.

VII საუკუნე – ეს ის პერიოდია, როცა საქართველოსა და სომხეთის საეკლესიო განხეთქილება უკვე კარგა ხნის მომხდარი ფაქტია და საქართველოს ეკლესია საბოლოოდ გაეთიშა მონოფიზიტობას და დიოფიზიტობა აღიარა ეპროპასთან ერთად. სომებს მონოფიზიტებთან გამართულ კამათში კირიონ I-ს მხარი დაუჭირეს რომაელებმა. ამით კირიონმა აღმოსავლეთ საქართველოს თავიდან ააცილა გაირანელება-გასომხების საფრთხე და დასავლეთ საქართველოს დიოფიზიტურ მოსახლეობასთან საეკლესიო ერთიანობა უზრუნველყო.

ქართლის ეკლესიის ავტოკეფალიის ავტორიტეტი VІІІ-IX საუკუნეებში საქართველოს ფარგლებს გასცდა და შავი ზღვის რეგიონში გავრცელდა. გავლენის სფეროებისა და იურისდიქციის ასეთმა ზრდამ ხელი შეუწყო საზღვარგარეთ მისი ავტორიტეტის ამაღლებას. ამ დროიდან სხვა ეკლესიებთან დამოკიდებულებაში საქართველოს ეკლესი-

ას შეეძლო ბევრად უფრო დამოუკიდებელი და მიზანდა-სახული ყოფილიყო, ვიდრე წინათ. ამიტომ იგი სრულიად განზე იდგა ბიზანტიაში გავრცელებული ხატომებრძოლე-ობიდან და დევნილ ხატთთაყვანის მცემლებს მფარველობ-და კიდეც. ჭეშმარიტი მართლმადიდებლობის ასეთმა ურ-ყევმა დაცვამ ისე შორს გაუთქვა მას სახელი, რომ თვით ყირიმის გუთების საეკლესიო წინამდლოლი, სახელად იო-ანე 759 წელს მცხეთაში ჩავიდა, რათა გუთების ეპისკო-პოსად ეკურთხებინა ქართლის კათალიკოსს იოანე მეორეს.

ქართული ეკლესიის სარწმუნოებრივი და კულტურულ-საგანმანათლებლო ურთიერთობა რომისა და ბიზანტიის ეკლესიებთან გრძელდებოდა ამ ორი ეკლესიის სქიზმის (გათიშვის) შემდეგაც (1054 წ.).

### პირველი:

1. რა ხასიათის იყო ქართულ-ევროპული ურთიერთობანი ანტიკურ ხანაში?
2. რას ნიშნავდა ქართველებისათვის ქრისტიანობის მი-ლება?
3. როგორი იყო ქართულ-რომაულ-ბიზანტიური საეკლე-სიო ურთიერთობანი IV საუკუნიდან?

## §3 ეპონელი პერიოდები და საქართველო

ქართულ-ევროპული სამხედრო-პოლიტიკური და რელიგიური ურთიერთობანი კიდევ უფრო გაძლიერდა და განმტკიცდა XI საუკუნის ბოლოდან. როგორც ზემოთ აღნიშნა, 1054 წლის სქიზმა, ქრისტიან-კათოლიკებისა და მართლმადიდებლების გათიშვა საქართველოს იმთავითვე არ უცვნია. ქართული ეკლესია ინარჩუნებდა ურთიერთობას ორივე მხარესთან. ამაზე კარგად მეტყველებს გიორგი მთაწმინდელის მოღვაწეობა და შეხედულებანი, ისევე როგორც ქართველთა ურთიერთობა ევროპელ ჯვაროსნებთან, ქართველ მეფეთა მიმოწერა რომის პაპებთან და ა.შ.

ცნობილია, რომ XI საუკუნის 60-70-იანი წლებიდან საქართველოსა და ბიზანტიას, ნინა აზიას უდიდესი საფრთხე შეუქმნეს იმუამინდელმა მსოფლიო დამპყრობლებმა – თურქ-სელჩუკებმა. შინაგანი ნინაალმდეგობებითა და რელიგიური ბრძოლებით დასუსტებულმა ბიზანტიამ რეალური ნინაალმდეგობა ვერ გაუწია მათ. ბიზანტიის იმპერატორს რომანოზ IV დიოგენის მცდელობას, რომ აღედგინა სახელმწიფოს მთლიანობა, წარმატება არ მოჰყოლია. 1071 წლის 19 აგვისტოს ბიზანტია მანასკერტთან გამართულ ბრძოლაში სასტიკად დამარცხდა თურქ-სელჩუკებთან და დაკარგა თითქმის მთელი მცირე აზია, სირია და პალესტინა წმინდა ქალაქით – იერუსალიმით, სადაც თავმოყრილი იყო ქრისტიანთა მთავარი სალოცავები.

ბიზანტიის დამარცხების შემდეგ საქართველო მარტო დარჩა თურქ-სელჩუკებთან. 1080 წლიდან საქართველოში დაიწყო ე.წ. „დიდი თურქობა“ – მომთაბარე სელჩუკთა ყოველწლიური გამანადგურებელი და ამაოხრებელი თავდასხმები, რის შედეგად აღმოსავლეთ საქართველო მიწას-

თან იქნა გასწორებული, მოსახლეობა კი აყრილი და ტყე-ლრეში გახიზნული. ქვეყანა თურქებს დიდ ხარკსაც უხ-დიდა.

**1088** წელს მომხდარმა ძლიერმა მიწისძვრამ ასევე დი-დი ზიანი მიაყენა საქართველოს. ამ გაუსაძლის ვითარე-ბაში საქართველოს სამეფო კარზე მშვიდობიანი სამეფო გადატრიალება მოხდა და ტახტი დაიკავა გიორგი II-ის 16 წლის ვაჟმა, პირადი ღირსებებით და ნიჭით დაჯილდოე-ბულმა დავით **IV-მ აღმაშენებლად** წოდებულმა. მან დაუ-ყოვნებლივ დაიწყო უმნიშვნელოვანესი რეფორმების გატა-რება და წესრიგის დამყარება ქვეყანაში, ასევე ლაშქრის ორგანიზაცია და პარტიზანული ბრძოლები.

ამ ამოცანის განხორციელებაში მას ხელი შეუწყო ში-დაპოლიტიკური მიზეზებით სელჩუკთა დასუსტებამ და ასევე ჯვაროსნული ომების დაწყებამ თურქთა წინააღმ-დებ.

თურქ-სელჩუკების მიერ იერუსალიმის დაპყრობამ შეუძლებელი გახადა მომლოცველთა მიერ წმინდა აღგი-ლების მონახულება, განსაკუთრებით კი ქრისტეს საფლა-ვის, რომელიც მუსულმანებმა ჩაიგდეს ხელში. ეს აძნელებ-და რელიგიურ კონტაქტებს აღმოსავლეთსა და დასავლეთს შორის. ამიტომ პალესტინის ქრისტიანული წმინდა აღგი-ლების მუსულმანებისაგან გათავისუფლება ჯვაროსნული ლაშქრობის მთავარ ამოცანას წარმოადგენდა. ამ იდეის სულისჩამდგმელი იყო რომის პაპი, წარმოშობით ფრანგი ურბან II (1088-1099), რომელიც იყო მაღალი ზნე-ჩვეულე-ბების მქონე და ენერგიული პიროვნება.

**ურბან II** პირადად გაემგზავრა საფრანგეთში, რათა 1095 წლის ოქტომბერში კლერმონში სინოდზე გამოეცხა-დებინა პირველი ჯვაროსნული ლაშქრობა დევიზით: „დე-

უს ლე ვოლტ“ (ლმერთს ასე ნებავს). 1096 წელს დაიწყო ჯვაროსნული ლაშქრობები, რომლებიც 200 წელზე მეტ ხანს გაგრძელდა.

დასავლეთიდან – ევროპიდან წამოსულ ჯვაროსანთა ლეგიონები 1097 წლის ბოლოს გადავიდნენ მცირე აზიაში. ამ დროს საქართველოს ძლიერების ხმა უკვე გავრცელებული იყო. ეს ფაქტი ევროპიდან მოსულ ჯვაროსნებს არ გამოპარვიათ, რადგან ქართველებსაც და მათაც თურქ-სელჩუკთა სახით საერთო მტერი ჰყავდათ.

როცა იერუსალიმი გაათავისუფლეს და ჯვაროსნებმა პირველი ლაშქრობების შედეგად ოთხი დამოუკიდებელი სახელმწიფო დააარსეს, მათ ადგილობრივ ქართველებთანაც დაამყარეს საქმიანი ურთიერთობა. ამის საუკეთესო მაგალითია ის წერილი, რომელიც იერუსალიმის კანტორს ანსოს პარიზის ეპისკოპოსის და ღვთისმშობლის ტაძრის კრებულისათვის 1108 წელს გაუგზავნია.

ამ წერილის მიხედვით, იმ დროის იერუსალიმში ყოფილა დედოფალი, დავით IV აღმაშენებლის პირველი მეუღლე (სომხის ქალი), რომელსაც მონაზვნობა მიუღია. ანსოს ინფორმაციით, იერუსალიმში შიმშილობა ჩამოვარდნილა, რის გამოც დედოფალი იძულებული გამხდარა მონასტრის საჭიროებისათვის საქართველოდან წამოღებული მეფისეული ძვირფასი ჯვარი გაეყიდა, რაც პირადი საჭიროებისათვის არ ჩაუდენია. პარიზში რომ დაეჯერებინათ გაგზავნილი ჯვრის სამეფო წარმოშობა და კუთვნილება, ანსომ აღნიშნული დედოფალი ქვრივად გამოიყვანა, რის გამოც წერილში დავით აღმაშენებელი გარდაცვლილად არის მოხსენიებული.

ანსომ ქართველთა ჯვრის შეძენის შესახებ წერილი გააგზავნა პარიზში, საიდანაც წმინდა რელიქვიის ჩამოსა-

ტანად წარმოუვლენიათ ბერი ანსელმი, რომელიც გზაში გარდაცვლილა, ხოლო მის შვილს პარიზის ეპისკოპოსი გალონი დიდის ამბით მიგებებია და ჯვარი 1109 წლის 30 ივლისს სენ-კლუს ეკლესიაში დაუსვენებიათ. იმავე წლის 1 აგვისტოს კი ეს ჯვარი ურიცხვი ხალხის თანდასწრებით, ზემოთ მოიტანეს პარიზის ლვოისმშობლის ტაძარში.

ეს წერილი საყურადღებოა, როგორც ქართველ-ევროპელთა (ლათინთა) ურთიერთობის ამსახველი საბუთი და ამასთან გვიჩვენებს, თუ რა აზრის ყოფილან ჯვაროსნები საქართველოზე. ანსო ფრანგ თანამემამულეებს წერს, რომ ამ ჯვარს ქართველთა მეფე დავითი დიდ თაყვანისცემას და სიყვარულს უძლვნიდა: „ის დავითი, რომელს, მისი წინაპრებივით კასპიის კარი – გოგსა და მაგოგს რომ ზღუდავს – ეჭირა და დარაჯობდა, რასაც შვილი მისი აქამომდე ასრულებს, ვისი ქვეყანა და სამეფო მედელთ (მიდია) და სპარსთა წინააღმდეგ, ჩვენი, ასე ვთქვათ, წინა ბურჯია“.

ამ ცნობიდან ცხადად ჩანს, რომ ჯვაროსნებს საქართველო ბურჯად მიაჩინდათ და მის მნიშვნელობას კარგად აცნობიერებდნენ თავიანთი ახალშენებისათვის სირია-პალესტინაში.

არანაკლები ქებითა და აღფრთოვანებით იხსენიებს დავით აღმაშენებელსა და ქართველთა ჯარის ბრწყინვალე გამარჯვებას დიდგორში ანტიოქიის ფრანკთა სამთავროს კანცლერი გოტიე, რომელიც პალესტინაში ტანკრედისა და ბოპემუნდ I-ის ჯვაროსნებთან ჩამოსულა. ის თავის 1114-22 წლების ქრონიკებში აღწერს დავითის მიერ 1121 წლის აგვისტოში თურქ-სელჩუკ-არაბთა კოალიციის დამარცხებას ილღაზის მეთაურობით.

ამ შრომიდან ჩანს, რომ დავით აღმაშენებელი იერუსალიმის მეორე ფრანგ მეფე ბალდუინს (1110-1118) ხშირად

საჩუქრებს უგზავნიდა და მათი ურთიერთობანი ფართო ხასიათის იყო სამხედრო დახმარების განვეის ჩათვლით.

1119 წელს ბალატთან ილლაზის მიერ როშერ ანტიოქიელის დამარცხების შემდეგ, ჯვაროსნები იძულებულნი გახდნენ ექებნათ ახალი მოკავშირეები ქრისტიანთა შორის და უფრო ახლო კავშირი დაემყარებინათ დავით აღმაშენებელთან.

დავითს რომ ჯვაროსნებთან უშუალო კონტაქტი ჰქონდა, ეს მტკიცდება დიდგორის ბრძოლითაც. ამ ომში ქართველთა მხარეზე ფრანგი ჯვაროსნების 200-კაციანი რაზმიც იბრძოდა, გოტიეს კი დავითი ჯვაროსნად ჰყავს გამოყვანილი.

იმ ხანებში საქართველოსა და ჯვაროსანთა ინტერესები საერთო მტრის დამარცხების საკითხებში ერთმანეთს ემთხვეოდა. საქართველო ამ დროს თავისი ძლიერების მწვერვალზე იმყოფებოდა. თუ მუსულმანურ გარემოცვასთან საქართველო დამარცხდებოდა, მაშინ ისინი პირს იბრუნებდნენ ჯვაროსნებისაკენ.

ამიტომ დავითის მიერ ილ-ლაზისა და თურქ-სელჩუკთა დამარცხებამ დიდი სიხარული გამოიწვია ჯვაროსნებში და ამით დავითმა მათ უდიდესი დახმარება გაუწია. ჯვაროსნები დავითის ბრნყინვალე გამარჯვებას ქრისტიანობის საერთო გამარჯვებად თვლიდნენ.

დავით აღმაშენებლის ისტორიკოსი თავის თხზულებაში ხშირად იხსენიებს საფრანგეთის „მეფეებსა და ხელმწიფეებს“. ძალზე საინტერესო ცნობას გვანვდის იოანე ბატონიშვილი, რომლის მიხედვით დავით აღმაშენებლის მიერ ლორეს აღების მეორე წელს საქართველოში დავრიშის სახით ფარულად ჩამოსულა იერუსალიმის მეფე ბალდუინ II (1119-1131) დავით მეფის სანახავად და „განმატრობად

ივერიისა“ და მცირე ხნის შემდეგ ისევ უკან, ფარულად გაბრუნებულა. დამტკიცებულია, რომ დავით ალმაშენებლის ლაშქარი ჯვაროსნებთან ერთად იბრძოდა იერუსალიმისათვის. ანა კომნენის ცნობით, ქართველთა ლაშქარი ჯვაროსანთა ომში მონაწილეობის მისაღებად გავიდა და შავ ზღვაში დაიღუპა.

ამრიგად, დავით ალმაშენებელი მეტად პოპულარული პიროვნება იყო ჯვაროსანთა შორის. დიდგორის გახმაურებულმა გამარჯვებამ სათავე დაუდო იმ ლეგენდას, რომელიც ჯვაროსანთა წრეში შეიქმნა და მთელი ევროპა მოიარა. **მეფე-ხუცესი (პრესვიტერი) იოანე**, რომლის სახეში მითოლოგიური აზროვნებით დავით ალმაშენებელი და მისი მემკვიდრე დემეტრეა გაერთიანებული, ჩრდილოეთი-დან შემომავალი გოგისა და მაგოგის შესაკავებლადაა მოვლენილი. **მან ქრისტიანული მსოფლიო განსაკუდელისა-გან უნდა დაიხსნას.** ამ ლეგენდით კიდევ ერთხელ დასტურდება დიდგორის ბრძოლის საერთაშორისო მნიშვნელობა მაშინდელი დასავლეთ ევროპისათვის.

ვინაიდან ევროპაში მოიაზრებოდა ქრისტიანული სივ-რცე, ჯვაროსნების ცნობიერებაში იყო, რომ ისინი კი არ იპყრობდნენ აღმოსავლეთის მიწებს, არამედ იბრუნებდნენ მას. მათვის პალესტინა განიხილებოდა – როგორც ქრისტიანთა სამყოფელი. ჯვაროსანთა თვალსაზრისით, დავითის ჯარი ლათინთა ბუნებრივი მოკავშირეა. მათ ქრისტიანული საქართველო თურქ-სელჩუკთა წინააღმდეგ ბრძოლა-ში დაეხმარებოდა, დავით ალმაშენებელს კი ჯვაროსნების ეს ბრძოლა დამპყრობთა განდევნას და მათზე გამარჯვებას უადვილებდა. **ზურაბ ავალიშვილის** გონივრული დასკვნით „XII-XIII საუკუნეების საქართველო იმას კი არ ფიქრობდა, რომ იარაღად ემსახურა ჯვაროსანთა მიზნები-

სათვის. მისი ცდა იყო საკუთარი ცხოვრების უზრუნველყოფა, დაცვა და ეროვნულ ძალთა გაშლა“.

ამავე ხანებში საფუძველი ჩაეყარა ჯვაროსანთა და ქართველთა შორის კულტურულ ურთიერთობასაც. ამ მხრივ საგულისხმოა იერუსალიმის ჯვრის მონასტრის ერთ-ერთ სვეტზე წმინდა სებასტიანეს ისრით გამსჭვალული შიშველი სხეულის გამოსახვა. წმიდა სებასტიანე ქ. რომის მფარველად ითვლებოდა. მის გამოსახვას მართლმადიდებელი ეკლესიის ხელოვნება საერთოდ ერიდებოდა. ჯვაროსანთა ეპოქაში შექმნილმა ახალმა ვითარებამ, როგორც ჩანს, დაარღვია ეს ტრადიცია. ამის შედეგი უნდა იყოს ამ ქართული სავანის გამგებელთა სურვილად ჯვრის მონასტრის კედლებზე ჯვაროსანი რაინდების საყვარელი წმინდანის დახატვა.

დავით აღმაშენებლის მიერ თურქ-სელჩუკებთან ბრძოლის და ევროპელებთან კავშირის განმტკიცების ტრადიცია განაგრძეს მისმა მემკვიდრეებმა დემეტრე I-მა (1125-1156), გიორგი III-მ (1156-1184) და თამარ მეფემ (1184-1213).

საქართველოს მეფეთა ურთიერთობას ჯვაროსნებთან და იერუსალიმელ ლათინებთან თამარის ისტორიკოსიც ადასტურებს: „სძლვნობდეს და სძმობდეს მას (გიორგი III-ს) მეფენი ბერძენთაგანი, იერუსალიმს – ალამთანი (გერმანელები) და პრომთანი“. გიორგი III-ის დროს ქართველები იცნობდნენ ბალდუინ III-ს და ბალდუინ IV-ს. პირველი მათგანი 1154 წელს სვინაქსარშიც კი ყოფილა მოხსენიებული.

1189 წელს ეგვიპტის უძლიერესმა სულთანმა სალადინმა კვლავ აიღო იერუსალიმი. პაპის კლიმენტი III-ის მიერ ორგანიზებულმა მესამე ჯვაროსნულმა ლაშქრობამ

(1189-1192) სასურველი შედეგი ვერ მოიტანა და იერუსალიმი ისევ მუსულმანებს დარჩათ. ისლამის ოკეანეში მოქცეულმა ჯვაროსნებმა და ქრისტიანულმა ახალ შენებმა იმედის თვალი კვლავ საქართველოს მიაპყრეს.

თამარის მეფობის დროს საქართველომ უდიდეს ძლიერებას მიაღწია. მსოფლიო ისტორიაში არ არსებობს ქალიხელმწიფის სხვა იდეალი, რომელიც ისე მაღლა იდგეს, როგორც თამარ მეფე. მის მიერ გადახდილი ძლევამოსილი ომები (1195 წ. შამქორთან, 1202 წელის ბასიანთან) მუსულმანთა წინააღმდეგ დიდ ზეიმს იწვევდა ჯვაროსანთა ბანაკში. საქართველო ისლამის შემმუსვრელად და ქრისტიანობის დამცველად გამოდიოდა. ჯვაროსნები ხედავდნენ სირია-პალესტინის ქართულ რელიგიურ სავანეთა სიმდიდრეს, უხვ შეწირულობებს და, როგორც ჩანს, ოქმულებებიც შეთხზეს, თუ როგორ იცავდნენ ქრისტიანთა სიწმინდეებს ჩვენი მეფენი და მათ გამოსყიდვასაც ცდილობდნენ მტრისაგან. თამარ მეფეს ზემოაღნიშნულ სალადინისაგან წმიდა ჯვრის გამოსყიდვა განუზრახავს. თამარის სახელი საქართველოს საზღვარს გასცდა. მის მომხიბვლელობას ევროპელებმაც ვერ აუარეს გვერდი. ერთ-ერთი ევროპული ქრონიკის მიხედვით „ფრანგი მეზღვაურები შავ ზღვაზე ცურვისას კარგ ამინდში თამარ დედოფლის სადიდებელს მღეროდნენ“.

ამ და სხვა მსგავს გამონათქვამებზე დაყრდნობით ვარაუდობდა ვენის უნივერსიტეტის პროფესორი რობერტ ბლაიხშტაინერი, რომ შუა საუკუნეების ევროპელი რაინდობა ქართულის გავლენას განიცდიდათ. საინტერესოა ისიც, რომ გერმანიის იმპერატორმა ფრიდრიხ II შტაუფენმა წამოჭრა საკითხი საქართველოსთან დინასტიური კავ-

შირისა – ის თამარს ქმრად თავის ერთ-ერთ ვაუს სთავაზობდა.

1192-93 წლებში ბერძნები და ქართველები თამარ მეფის ჯვრით შეეცადნენ იერუსალიმის და მის მახლობლად მდებარე დაკარგული მინების გამოსყიდვას. თამარ მეფემ 200 ათასი ოქროს დინარი აძლია ჯვრის გამოსახსნელად, მაგრამ სარკინოზები (მუსულმანები) არ დათანხმებულან.

თამარის მემკვიდრეს, **ლაშა-გიორგის** (1213-1223) სახელი ასევე პოპულარული იყო ჯვაროსანთა შორის. რაინდული სულისკვეთების მქონე ჭაბუკი მეფისაგან ჯვაროსნები ხსნას ელოდნენ. ამის საუკეთესო მაგალითია ის წერილი, რომელიც ვინმე რაინდს – **დე ბუ ბეზანსონის არქიეპისკოპოსის, ამედე დე ტრამლეისათვის** გაუგზავნია. იგი წერდა: „ან ისმინეთ... საკვირველი და საყურადღებო ამბად მივიღე, და საქმის ჭეშმარიტებაა სანდო მოციქულთა-გან გავიგეთ, რომ ივერითაგან ვინმე ქრისტიანენი, გიორგენებად წოდებულნი, ურიცხვი მხედრებით და ქვეითი ჯარით ღვთის აღმაფრთოვანებელ დახმარებით ძალითა ფრიად აღჭურვილით, ურწმუნო წარმართა წინააღმდეგ სწრაფად აღდგნენ და, აიღეს რა უკვე 300 ციხე და 9 დიდი ქალაქი, მაგარნი დაიპყრეს, ხოლო სუსტი ნაცარტუტად აქციეს... ზემო აღნიშნული წმიდა იერუსალიმის მიწის სახსნელად მოვლენ და მთელ საწარმართოს დაიმორჩილებენ. მეფე მათი, წარჩინებული, თექვსმეტი წლისაა, ალექსანდრეს (მაკედონელი) ბადალი ძალით და სიკეთით, თუმცა არა სარწმუნოებით. ჭაბუკი ეს დედამისის – დედოფლის – უძლიერესის თამარის ნეშტს თან ატარებს, რომელმაც, სანამ ცოცხლობდა, იერუსალიმად წასვლის აღთქმა

დასდვა, და შვილსა თვისსა თხოვა, თუ მიიცვლებოდა, რომ  
ძვლები მისი უფლის საფლავთან წაესვენებინათ“.

ამ წერილით კარგად ჩანს, თუ რა მოუთმენლად ელოდ-  
ნენ ჯვაროსნები საქართველოს ძლევამოსილი მხედრობის  
სამხრეთისაკენ გალაშქრებას, როგორ ცდილობდნენ ამ  
იმედით თანამემამულეთა წაქეზებას ახალი ჯვაროსნული  
ლაშქრობისაკენ და რა დიდი იყო ჯვაროსანთა აღფრთოვა-  
ნება და პატივისცემა ლაშა-გიორგისადმი.

ლაშა-გიორგი რომის პაპის, ჰონორუს III-ის მონოდე-  
ბით გადაწყვიტა მიმხრობოდა ჯვაროსანთა მეხუთე ლაშქ-  
რობას. ამის შესახებ ჩვენ ცნობას რუსუდან მეფის (1223-  
1245) რომის პაპ ჰონორუს III-სადმი 1224 წლის 12 მაისს  
მიწერილ წერილში ვგებულობთ. ლაშა-გიორგის, როგორც  
ჩანს, პაპის მონოდება უყურადღებოდ არ დაუტოვებია და  
ჯვაროსნობა უტვირთია: „ეს თავად მისი სურვილი იყო და  
ნასასვლელადაც ემზადებოდა, რათა... ნამოვსულიყავით  
ქრისტიანთა დასახმარებლად და წმინდა საფლავის გასა-  
თავისუფლებლად“—ო. ლაშა-გიორგის ეს მცდელობა ჩაშა-  
ლა 1220 წელს საქართველოში მონლოლთა 20 ათას კა-  
ციანი მზვერავი ლაშქრის შემოწრამ. მათი გაბრუნების  
შემდეგ, 1221 წელს ლაშა-გიორგი კვლავ სირია-პალესტი-  
ნისაკენ გასალაშქრებლად ემზადებოდა, მაგრამ მონლო-  
ლებთან მიღებული ჭრილობა დაუმძიმდა და მალე გარდა-  
იცვალა.

ამის შემდეგ თავად რუსუდან მეფე და ივანე მხარგ-  
რძელი პპირდებოდნენ რომის პაპს 40-ათასიანი ლაშქრით  
დახმარებას წმიდა საფლავის გასათავისუფლებლად, მაგ-  
რამ ჯერ ჯალალ ად-დინის (1125) და მერე კი მონლოლთა  
დამაქცევარმა ლაშქრობებმა საქართველოში ეს ყველაფე-  
რი ჩაშალა. საქართველო თავად შეიქნა დასახმარებელი.

ამრიგად, ჯვაროსნული ომების ხანაში საქართველო-ევროპის ინტერესები ერთმანეთს ჩაეწნა. საერთო მფერ-თან ბრძოლა ქართველ-ევროპელთა ინტერესებს აახლოებდა. რელიგიური მოტივით დაწყებული ომები ფაქტიურად ეკონომიკურ და კულტურულ ურთიერთობებში გადაი-ზარდა. ევროპელი ჯვაროსნები ქართველთა სავანებს პალესტინაში არ შეხებიან. უფრო მეტიც, ჯვაროსნების მი-ერ კონსტანტინეპოლის დაპყრობის შემდეგ (1204) ათონის ქართველმა ბერებმა პაპის იურისდიქცია აღიარეს, რის გამოც ბერძნებმა მათთან კავშირი განკვითეს. ამ პერიოდ-შიც საქართველო პოლიტიკურად და სულიერად ევროპას ეკუთვნიდა, ისევე როგორც – ეკონომიკურად.

### **პითევაგი:**

1. რამ გამოიწვია დავით აღმაშენებლისა და ევროპელი ჯვაროსნების დაახლოება?
2. როგორ გაგრძელდა ქართველთა და ჯვაროსანთა ურთიერთობა თამარისა და ლაშა-გიორგის დროს?
3. რა შედეგები მოიტანა ქართველთა და ჯვაროსანთა დაახლოებამ?

## §4 ძალიულ-ევროპული ურთიერთობანი შუა საუკუნეებში

საქართველოს კულტურული განვითარება მიმდინარეობდა ერთ წყობად დასავლურ სივრცეში ჯერ ელინურ სამყაროში, შემდეგ რომის იმპერიაში და ასევე ბიზანტიურ სივრცეში. თუმცა, იგი თავისი განვითარების ყველა ეტაპზე ცდილობდა დამოუკიდებელი პოლიტიკური პირობების შექმნას და ქმნიდა კიდეც თვითმყოფად კულტურას, რომლის ზოგადი ღირებულებები მსგავსი იყო იმ ხალხების კულტურისა, ვისთან ერთადაც იგი ქმნიდა თავდაპირველ ანტიკურ, შემდეგ კი ქრისტიანულ კულტურას. საქართველო, როგორც ანტიკური რომის არსებობის ხანაში, ასევე შუა საუკუნეებშიც ასრულებდა თავის პოლიტიკურ ფუნქციას – დაეცვა რომაული (ევროპული) სივრცე ბარბაროსებისაგან. მისი ფუნქცია ყოველთვის გამოკვეთილია, როგორც კავკასიის კარიბჭის მცველისა, საიდანაც გადმოდიოდნენ ბარბაროსები. ამის საუკეთესო მაგალითია **ვახტანგ გორგასალის** ქმედება, რომელმაც დაიმორჩილა ოვანი და ყივჩაღნი და შექმნა დარიალის კარი, რომელიც იცავდა რომის სივრცეს ბარბაროსებისაგან.

შუა საუკუნეებში ერთიანი სივრცის განსაზღვრისა და იდენტობისათვის მნიშვნელოვანი ადგილი უჭირავს წმინდანთა კულტს, რომელიც აერთიანებს ერთნაირად მოაზროვნე ქრისტიანულ საზოგადოებას. ამ პერიოდში ერთიანი ქრისტიანული სივრცის აღქმის დასტურია წმინდანთა საერთო ინსტიტუტის არსებობა. ერთიანი წმინდანთა ინსტიტუტის არსებობა ადრე შუა საუკუნეების საქართველოსა და დასავლეთ ევროპას შორის დასტურდება მიხეილ თა-

**მარაშვილის მიერ შეგროვილ ზოგადი ეკლესიის ისტორიას მასალებში, (მაგ.: ლოცვა რომის პაპის ლეონ I-სადმი, რომელმაც რომი იხსნა ჰუნების შემოსევისაგან, აღევლინება ქართულ ეკლესიაშიც).**

ქრისტიანულ სივრცეში ერთნაირია მსოფლგანცდაც. ამ ეპოქის აზროვნებაში ერთნაირად არის გადმოცემული განცდა სასჯელისა ცოდვებისათვის თუ ღვთის შემწეობა განსაცდელში. ასევე მსგავსადვეა მოტივირებული ქმედებანი. უფლის შემწეობა ბრძოლაში და მოდელი კონსტანტინე დიდის მიერ უფლის შემწეობით (ჯვრის ნინაძლვრობით) წარმართებთან გამარჯვების მოპოვებისა ასევე გადმოტანილი მთელ ქრისტიანულ სამყაროში. ქართველების ბრძოლაში მონაწილეობა ყოველთვის მოტივირებულია ქრისტიანულად და ყველა გამარჯვება თუ მარცხი არის ღვთის გამგებლობა, რომელსაც ასევე აქვს მოტივირება შესაბამისი ქრისტიანული იდეოლოგიით.

სამხედრო მსოფლმხედველობა, ომისადმი ქრისტიანთა დამოკიდებულება ისეთივე ევოლუციის გზას გადის საქართველოში, როგორც ეს ხდება საერთოდ ევროპულ სივრცეში. თავდაპირველად ქრისტიანებს მიაჩნდათ, რომ ომი და სისხლისღვრა მიუღებელია ქრისტიანთათვის. შემდეგ ეტაპზე ჩნდება სამართლიანი ომის გაგება, ანუ ომი ურნმუნოებთან სამშობლოს და ქრისტიანობის დასაცავად („მეფეთა მეფე გიორგი – მესიის მახვილი“). თუ ადრე მიიჩნეოდა, რომ ქრისტიანი, ქრისტეს მხედარი, მხოლოდ ლოცვითა და მორჩილებით ემსახურებოდა ღმერთს, შემდგომში მისი აზროვნება განიცდის ტრანსფორმაციას. ის ხდება ქრისტეს მხედარი და იარაღით ხელში იცავს სამშობლოსა და სარწმუნოებას.

ევროპასთან მდებარე საქართველოს თითქმის ერთი საუკუნე (1235-1335) უნევდა მონლოლთა ველური და ძლიერი ურდოების შეკავება. მონლოლთა დარტყმებს სწორედ საქართველო იღებდა, პერიოდულად მათი ძარცვის ობიექტი ხდებოდა და მსოფლიო ისტორიის ამ კრიტიკულ მომენტში ევროპის გადარჩენაში დიდი წვლილიც შეიტანა. საუბედუროდ, ევროპამ საქართველოს სამაგიერო დახმარება ვერ აღმოჩენინა.

1323 წელს ევროპაში ახალი ჯვაროსნული ლაშქრობა იგეგმებოდა. საქართველოს მეფე გიორგი V ბრწყინვალის წერილში საფრანგეთის მეფე ფილიპ ვალუასადმი საყვედური გაისმა, რომ: „საფრანგეთის ლვთაებრივი ხელმწიფები ხშირად აქეზებენ აღმოსავლეთის მეფეებს სარკინოზთა წინააღმდეგ საბრძოლველად, შემდგომ ისინი აღარ მოდიან, ტოვებენ რა აღმოსავლეთის მეფეებს მარტოდ ამ მტან-ჯველ ომში“ (აქ „აღმოსავლეთის მეფეებში“ ქართველი მეფეები იგულისხმებიან, ხოლო საფრანგეთის მეფეებს ფართო მნიშვნელობა აქვს და მთელ დასავლეთ ევროპას ფარავს).

1328 წელს რომის პაპის ბრძანებით გაუქმდა სმირნის საეპისკოპოსო, რომელიც თბილისში იქნა გადატანილი. მიღებულ იქნა გადაწყვეტილება საეპისკოპოსო ეკლესიის აშენებაზეც. ამ პერიოდიდან საქართველოში აქტიურად ჩამოდიან ევროპელი კათოლიკე მისიონერები, რომლებმაც მნიშვნელოვანი წვლილი შეიტანეს ჩვენი ქვეყნის ისტორიაში და ევროპასთან ურთიერთობის შენარჩუნებაში.

XV სუაკუნის დასაწყისში გენუა ოდიშის მთავრისგან და საქართველოს მეფისაგან საქართველოში სავაჭრო ფაქტორიის დაარსების უფლებას ითხოვდა, თუმცა გენუამ სა-

ვაჭრო ფაქტორია სებასტოპოლისში (სოხუმი) დაარსა მხოლოდ 1354 წელს. 1354-1453 წლებში ამ სავაჭრო ფაქტორის მართვა ქ. კაფადან ხორციელდებოდა. 1453 წელს ფაქტორია გადაეცა „ნმიდა გიორგის ბანკს“. იმ წლებში არა მარტო ქართული, არამედ ირანიდან და შარვანიდან შემოტანილი აბრეშუმი საქართველოს გავლით გადიოდა ევროპაში. ევროპასთან ასევე სავაჭრო ურთიერთობის დამყარებას შეეცადა სამეგრელოს მთავარი ლევან II დადიანი (1611-1657), რომელმაც ევროპელი ვაჭრები მიინვია სამთავროში, რათა დაერსებინა კომპანია საქართველოს გავლით ირანული აბრეშუმის ევროპაში გასატანად. მსგავსი პროექტი განმეორდა 1714 წელს, რომლის ზოგიერთი პარაგრაფი განიხილავდა ვაჭრობას საფრანგეთსა და ირანს შორის საქართველოს გავლით.

ფლორენცია-ფერარას საეკლესიო კრებაზე (1439) გამორჩეულ სტუმრებს შორის იყვნენ ქართველი მიტროპოლიტი და დიდებული აღმოსავლეთ საქართველოდან, რომლებმაც მალულად დატოვეს კრება. კრებაზე დასწრების მიუხედავად ქართველებმა ხელი არ მოაწერეს ფერარა-ფლორენციის უნიას, რადგან ქართული ეკლესიის დამოუკიდებლობის დაკარგვა არ სურდათ.

1453 წელს ბიზანტიის იმპერია გადადგურდა და კონსტანტინეპოლის და შავი ზღვის აუზს ოსმალები დაეპატრონენ. მათ სასიკვდილო საფრთხე შეუქმნეს როგორც საქართველოს სახელმწიფოს, ასევე ევროპის ქვეყნებს.

1454 წელს რომის პაპმა ნიკოლოზ II ნება დართო ლუდოვიკ ბოლონიელს, რათა ჩამოეყალიბებინა ანტიოსმალური კოალიცია, რომელშიც სხვებთან ერთად ქართველებსაც უნდა მიეღოთ მონაწილეობა. 1460 წელს ლუდოვი-

კო ბოლონიელმა თან წაიყვანა საქართველოს მეფის გი-  
ორგი VIII-ის და სამცხის ათაბაგის უვარყვარეს დესპანები  
ნიკოლოზ თბილელი და ქუსუდანი (ფარსადანი), რომლე-  
ბიც ევროპაში გაემართნენ ხუთ დესპანთან ერთად უნგ-  
რეთის, ვენის, ვენეციის, რომის და მილანის გავლით. 1461  
წლის მაისში ქართველმა დესპანებმა საფრანგეთს მიალ-  
ნიეს. ისინი დაესწრნენ ახალი მეფის ლუი XI-ის ტახტზე  
ასვლას, ენვივნენ ბურგუნდიის ჰერცოგ ფილიპეს. მიუხე-  
დავად წარუმატებლობისა, ქართველებს ევროპასთან და-  
კავშირების იმედი არ დაუკარგავთ. საქართველოს სამე-  
ფო-სამთავროებად დაშლის შემდეგაც კი, 1471 წელს ქარ-  
თლის მეფემ კონტინტინე II-მ ელჩი გააგზავნა ვენეციაში –  
ქართველი მეფე მზად იყო თურქთა წინააღმდეგ 30 ათა-  
სიანი ჯარი გამოეყვანა. 1495 წელს კონსტანტინე მეორემ  
მეორე ელჩი ნილო გააგზავნა წმინდა ბასილის ორდენის  
მოწესე ძმა ზაქარიასთან ერთად ესპანეთის მეფე ფერდი-  
ნანდ მეორესთან და დედოფლალ იზაბელასთან. მასპინძ-  
ლებმა დააფასეს ქართველი მეფის ელჩის ვიზიტი და სა-  
ჩუქრებისათვის მადლობა გადაუხადეს, თუმცა უარი თქვეს  
ანტითურქულ კოალიციაში მონაწილეობაზე. ელჩები ასე-  
ვე შეხვდნენ რომის პაპს ალექსანდრე VI-ს და მასაც გადას-  
ცეს ქართლის მეფის წერილი, რომელშიც ის ევროპელებს  
მუსულმანების წინააღმდეგ გამოსვლისაკენ მოუწოდა. პაპ-  
მა პასუხად კონსტანტინე მეფეს ფერარა-ფლორენციის  
კრების გადაწყვეტილება გამოუგზავნა და ურჩია მიერთე-  
ბოდა მას. საქართველოს დაშლამ XV საუკუნის ბოლოს გა-  
აადგილა მისი დანანილება ოსმალეთსა და სპარსეთს შო-  
რის. იმ დროიდან ლტოლვა გაერთიანებისა და დამოუკი-  
დებლობისაკენ საქართველოს საერო და სასულიერო მოლ-

ვაწების ძირითად მიზნად იქცა. ამ გზაზე მათ დასავლეთ ევროპა პოტენციურ მოკავშირედ მიაჩნდათ და მასთან კონტაქტის დამყარებას ყველანაირი საშუალებით ცდილობდნენ. ასეთი მაღალი მიზნის მისაღწევად ქართული ელიტა მზად იყო, სარწმუნოებრივ დათოლიკობასაც კი წასულიყო. ბევრი მათგანი კათოლიკობასაც კი იღებდა დასავლეთიდან მხარდაჭერის მიღებისა და ქვეყნის გათავისუფლების იმედით.

**XVI საუკუნის | ნახევარში ქართლის მეფე ლუარსაბ | (1534-1558)** სომეხი დესპანების მეშვეობით შეეცადა რომის პაპთან კავშირის დამყარებას და აცნობებდა მას, რომ საქართველოს მეფეები და მმართველები აღიარებდნენ პაპის უზენაესობას. რომის პაპმა კლიმენტი VII (1592-1605) ქართველ მეფეებს გაუგზავნა წერილი, რომელშიც იგი სთავაზობდა მათ მორიგ ანტიოქიალურ კოალიციაში (გერმანია, ვენეცია, ესპანეთი და სპარსეთი) მონაწილეობას. **1596 წელს** ვაპისადმი მიწერილ წერილში ლუარსაბის ძე, სვიმონ მეფე (1558-1601), რომის პაპს მოიხსენიებდა როგორც „სულიერ მამას“, „უდიდეს პაპს“ და ითხოვდა მის მხარდაჭერას ოსმალების წინააღმდეგ. ანალოგიური თხოვნით სვიმონმა ესპანეთის მეფესაც მიმართა, ამასთანავე თხოვდა მიემხრო გერმანიის იმპერატორი რუდოლფ II კოალიციისაკენ. თავის წერილში სვიმონი პირდებოდა, რომ იქნებოდა პაპის ერთგული. ანტიოქიალური კოალიციის შექმნის ეს ცდაც წარუმატებლად დამთავრდა.

ამრიგად, ქართულ-ევროპული ურთიერთობანი შუა საუკუნეებში ვითარდებოდა, საქართველო ევროპის პარალელურად ავითარებდა თავის პოლიტიკურ და კულტურულ ურთიერთობებს, ცდილობდა კავშირების დამყარებას ევ-

როპასთან მას შემდეგაც კი, რაც თურქებმა აიღეს კონსტანტინეპოლი და ქართველებს გადაუკეტეს ევროპასთან დამაკავშირებელი გზები.

### კითხვები:

1. რა ფუნქცია ჰქონდა საქართველოს ევროპისათვის შუა საუკუნეებში?
2. როგორ ვითარდებოდა ქართულ-ევროპული ურთიერთობები თურქთა მიერ კონსტანტინეპოლის დაპყრობის შემდეგ?

## საქართველო-ცვილიული დიალეგატიური ურთიერთობანი

საქართველოდან ევროპაში და ევროპიდან საქართველოში დიპლომატიური მისიების გაგზავნას, დიპლომატიურ მიწერ-მონერას რამდენიმე საუკუნის ისტორია აქვს. წინა პარაგრაფებში ჩვენ მოვიყვანეთ ასეთი ურთიერთობის რამდენიმე მაგალითი.

XV-XVII საუკუნეებში სამეფო-სამთავროებად დაქუცმა-ცებულ საქართველოს გადარჩენის ურთულესი პერიოდი ედგა. ბიზანტიის დაცემის შემდეგ (1453) ძალზე გართულ-და ურთიერთობა ევროპასთან. ეს კი უარყოფითად აისახა საქართველოს შემდგომ ეკონომიკურ, პოლიტიკურ და კულტურულ განვითარებაზე. დაინტ ანტიოქიალური კოალიციების მოწყობის დაუსრულებელი ხანა.

ამ ეპოქაში ევროპის პოლიტიკური მოღვაწეები ქრის-ტიანულ საქართველოში სავსებით სწორად ხედავდნენ ოს-მალეთის წინააღმდეგ ენერგიულად მებრძოლ ძალას. სწო-რედ ამის გამო იყო, რომ ევროპელმა ავტორებმა (ტომაზო მინადოი, ულუგბეგ ბაითი, დონ ანტონიო დე გოვეა, ფოროლიმო ფრანზეტა, იშტევან ტომპარი, ქრისტოფერო ვარზევსკი) არაერთი აღმაფრთვანებელი დახასიათება შემოგვინახეს ქართლის მეფის სიმონ I-ის უჩვეულო მამა-ცობის და თავგანწირული ბრძოლის თაობაზე. ამ მხრივ მნიშვნელოვანია იტალიელი უურნალისტიკის ფუძემდებლის, ბერნარდო ბეკარის სტატიები სიმონ I-ის მიერ ოსმა-ლების წინააღმდეგ. წარმოებული გმირული ბრძოლების შესახებ, რომელიც 1598-1599 წლებში იტალიური გაზეთის პირველ გვერდზე იბეჭდებოდა. ავტორი ქართლის მეფეს უშიშარ მებრძოლად თვლიდა და თურქების განადგურების

საქმეში მის დამახურებას უტოლებდა იოანეს პუნიათის, სკანდერბერგის და დონ ხუან ავსტრიელის მოღვაწეობას. ბეკარის სტატიები ფართო გამოძახილს იწვევდა ევროპა-ში, განსაკუთრებით უნგრეთში.

საგულისხმოა ის ფაქტიც, რომ ფრანგული ეროვნული ისტორიოგრაფიის ფუძემდებელმა, ანრი III-ის მრჩეველმა და პარლამენტის პრეზიდენტმა, სიმონ მეფის თანამედროვე ჟაკ ოგიუსტ დე ტუმ კლასიკურ ნაშრომში („უნივერსალური ისტორია“) განსაკუთრებული პატივი მიაგო ქართლის მეფის გმირულ ბრძოლას ოსმალების ნინაალმდეგ. ავტორი სიმონ I-ის ბრძოლას სულთნის ნინაალმდეგ საერთაშორისო ევროპული პოლიტიკის კონტექსტში განიხილავდა. ამ საკითხზე მან იმდროინდელ ევროპელ მკითხველს სრული წარმოდგენა შეუქმნა იმის თაობაზე, თუ როგორ იცავდა თურქთა საშიშროებისაგან საქართველო აღმოსავლეთში ქრისტიანულ სამყაროს.

**XVII-XVIII** საუკუნეებში ევროპული სამყაროსათვის საქართველოს გაცნობის და დიპლომატიური ურთიერთობების გაგრძელების საქმეში ფასდაუდებელი წვლილი შეიტანეს კათოლიკე მისიონერებმა პიეტრო დელა ვალემ, პიეტრო ავიტაბილემ, დონ კრისტოფერო და კასტელიმ (მან თავისი ცნობილი ნახატებით ევროპას გააცნო საქართველო), შარდენმა და სხვებმა.

საქართველოში თეატინელი მისიონერების ჩამოსვლა და ემთხვა ევროპაში (ესპანეთსა და რომში) ცნობილი ქართველი საერთო და საეკლესიო მოღვაწის ნიკიფორე იობახის (ერისკაცობაში ნიკოლოზ ირუბაქიძე-ჩოლოყაშვილი) ელჩობას.

1625 წლის ბოლოს, მას შემდეგ, რაც ქართველებმა მარტყოფისა და მარაბდის ბრძოლები გადაიტანეს შაჲ აბას I-თან და ქართლ-კახეთის სამეფო ტახტზე მოინვიეს თეიმურაზ I, ამ უკანასკნელმა ევროპაში გაგზავნა ელჩობა, რომელსაც სათავეში ედგა ნიკიფორე ირბახი. იგი უნდა ჩასულიყო ჯერ რომში, ხოლო შემდეგ – მადრიდში. ნიკიფორეს მიჰქონდა თეიმურაზ I-ის 1625 წლის 20 ნოემბერს ქართულად დაწერილი წერილები რომის პაპ ურბან VIII-სთან და ესპანეთის მეფე ფილიპე IV-სთან. ელჩს ასევე უნდა ენახა იტალიის პროვინციების ზოგიერთი მთავარი.

ირბახი ევროპაში იერუსალიმზე გავლით გაემგზავრა, რადგან თურქთაგან მოსალოდნელი ხიფათი აეცილებინა თავიდან.

იერუსალიმში ირბახი გაჩერდა ჯვრის მონასტერში, რომელიც იმ დროს უცხოეთში მყოფი ქართველების თავშესაფარი იყო. იგი შეხვდა იერუსალიმის პატრიარქს თეოფანე IV-ს, რომელსაც უთხრა, რომ გაგზავნილია ესპანეთსა და რომში თეიმურაზ მეფის მიერ დიპლომატიური და სამხედრო დახმარების მისაღებად ირანის შაჲის აბას I-ის წინააღმდეგ. პატრიარქმა თეოფანემ ესპანეთის მეფის ფილიპე IV-ის სახელზე დაწერა წერილი (1626 წლის 1 სექტემბერს) ბერძნულ ენაზე ქართველი ელჩის მადრიდში წარდგენისა და რეკომენდაციის შესახებ. იერუსალიმის პატრიარქი ესპანეთის მეფეს ევედრებოდა, რომ არ უარეყო თეიმურაზის თხოვნა და დახმარებოდა მას „შაჲ აბასისათვის შიშის მომგვრელი სიტყვებით ან ძალებით ორმუზის მხრიდან“. პატრიარქმა ირბახს თან გააყოლა არქიდიაკონი.

თეიმურაზ I ესპანეთის მეფეს ფილიპე IV-ს სთხოვდა ირანის წინააღმდეგ სამხედრო-პოლიტიკური კავშირის დადებას, ხოლო რომის პაპ ურბან VIII-ს ამ საქმეში შუა-მავლობას.

ცნობილია, რომ იმ დროს ირანსა და ესპანეთს შორის არსებობდა წინააღმდეგობა სტრატეგიული კუნძულის პორმუზის გამო, რომელიც შაჰ აბას I-მა ინგლისის ოსტინდოეთის კომპანიის დახმარებით წაართვა ესპანეთის მეფის ქვეშევრდომებს – პორტუგალიელებს. ამან წარმოშვა წინააღმდეგობა ირანსა და ესპანეთს შორის. სწორედ ამით ისარგებლა თეიმურაზმა და ევროპაში გაგზავნილ თავის ელჩის ნიკიფორე ირბახს დაავალა მოესინჯა ნიადაგი ირანის ან თურქეთის წინააღმდეგ მოკავშირის მოსახიებლად.

მართალია, ამ ელჩიობის დიპლომატიური მცდელობები უშედეგოდ დამთავრდა, მაგრამ მან სათავე დაუდო ეროვნული მნიშვნელობის დიდ კულტურულ მოვლენას. კერძოდ, წმინდა კონგრეგაცია დე პროპაგანდა ფიდემ ისარგებლა რომში ირბახის ყოფნით (1628 წლის იანვარ-აგვისტო), შეეცადა მისი დახმარებით დაეარსებინა ქართული სტამბა. ეს იდეა ვატიკანს ეკუთვნოდა, რომელსაც სურდა გაევრცელებინა ქართველთა შორის კათოლიკობის საქადაგებლად გამოსადევი წიგნები.

ნიკიფორე ირბახმა სათანადოდ შეაფასა, თუ რა მნიშვნელობა ჰქონდა ქართული კულტურის პროგრესის თვალსაზრისით ქართული სტამბის დაარსებას მაშინ, როცა საქართველო მოკლებული იყო ამ საშუალებას. მისი დიდი ძალისხმევით და ვატიკანის დახმარებით 1629 წელს პროპაგანდა ფიდეს სტამბაში დაიბეჭდა პირველი ქართული წიგნი „ქართული ანბანი ლოცვებითურთ“ და „ქართულ-

**იტალიური ლექსიკონი**“. იმავე წელს დაიბეჭდა ირბახის მიერ ქართულად თარგმნილი პოპულარული კათოლიკური ლოცვა ლვთისმშობლისადმი „ლიტანია ლაურეტანა“ . ირბახთან ერთად ქართულ-იტალიური ლექსიკონის გამოცემას უდიდესი ამაგი დასდო იტალიელმა სტეფანო პაოლინიმ. ამ სტამბის დაარსება უმნიშვნელოვანესი მოვლენა იყო ქართველი ხალხის ისტორიაში. 1629 წელს რომში ქართული წიგნის გამოცემა შეიძლება განვიხილოთ, როგორც პირველი შედეგიანი ცდა მტრული გარემოცვის გარღვევისა და კულტურის სფეროში დასავლეთ-ქრისტიანულ სამყაროსთან აქტიური ურთიერთობის აღდგენისა.

1629 წლის აგვისტოში, ევროპაში 3-წლიანი მოგზაურობის შემდეგ ნიკიფორე ირბახი საქართველოში, გორში დაბრუნდა. მან მეფეს მოახსენა ევროპაში მისი ელჩობის შედეგები და თეიმურაზ I-ს გადასცა პაპ ურბან VIII-ის 1628 წლის 2 დეკემბრით დათარიღებული წერილი. პაპი ურბან VIII მეფეს მხოლოდ რელიგიურ საკითხებზე მოახსენებდა. მასში გასაგებად და მოკლედ მოწონებული იყო თეიმურაზის სურვილი „შევიდეს კათოლიკური ეკლესიის რიგებში“.

პაპის ამ ეპისტოლებ თეიმურაზ I-ს გადაჭრით უკარნახა, რომ რომში გაეგზავნა ახალი ელჩობა დონ პიეტრო ავიტაბილეს მეთაურობით 1630 წლის 3 აგვისტოს. ავიტაბილეს თან მიჰქონდა თეიმურაზ მეფისა და კათალიკოს ზაქარიას წერილები რომის პაპისა და წმ. კონგრეგაცია დეპროპაგანდა ფიდეს კარდინალებთან. თეიმურაზის წერილში პაპისადმი დასმული პრ იყო სამხედრო-პოლიტიკური საკითხები. ნიკიფორე ირბახის ელჩობის შედეგიდან გამომდინარე, მან კარგად დაინახა, რომ დასავლეთში რეალური მოკავშირის არჩევის შესაძლებლობა უმნიშვნელო იყო.

ახლა იგი შეეცადა მისიონერების საშუალებით რომთან რეალურად მოქმედი კულტურულ-ეკონომიკური კონტაქტები და ემყარებინა, რაც ერთი მხრივ გზას უხსნიდა მისიონერების მოღვაწეობას საქართველოში და მეორე მხრივ, ქართველებს საშუალებას აძლევდა მისიონერების საშუალებით ზიარებოდნენ ევროპულ კულტურას. ამ ურთიერთობის გამოძახილი იყო 1637 წელს გორში ჩამოსული მისიონერის დონ ფრანჩისკო მარიო მაჯოს მიერ ქართული ენის შესწავლა და შემდეგ ქართული ენის გრამატიკის დაწერა, რომელიც 1643 წელს დაიბეჭდა პროპაგანდა ფიდეს სტამბაში. ეს ნაშრომი იყო ქართული ენის თავისებურებათა შესწავლის პირველი ცდა ევროპელთა მიერ, პირველი გრამატიკა იბერიულ-კავკასიურ ენობრივ სამყაროში.

1632 წლიდან 1744 წლამდე აღმოსავლეთ საქართველოს მუსულმანი ქართველი მეფეები მართავდნენ ირანის შაპის იძულებით. მიუხედავად ამისა, ლტოლვა ევროპისა და ევროპული კულტურისაკენ არ შენელებულა. ეს ურთიერთობა კვლავ კათოლიკე მისიონერების მეშვეობით ხორციელდებოდა. ფრანგი სწავლულის დე ლილის მიხედვით „თიფლისი – საქართველოს დედაქალაქი – დიდი არ არის... მაგრამ ის ყველაზე მშვენიერი და მნიშვნელოვანი ქალაქია სპარსეთში... თბილისში 14 ეკლესიაა. მიუხედავად იმისა, რომ ის მუსლიმთა მმართველობის ქვეშაა და რეგიონს მუსლიმი მეფე მართავს, სპარსელებს არსად არა აქვთ მეჩეთი სასახლის გარდა. ქართველები ქედუხერელნი, ლალები და მამაცები არიან. მართალია, ისინი დაპყრობილები არიან, მაგრამ „აქვთ შენარჩუნებული ბრძოლისუნარიანობა თავისუფლების დასაბრუნებლად“.

ქართლის მეფე გიორგი XI რომის პაპისადმი ინოცენტი XI გაგზავნილ წერილში გამოთქვამს სურვილს, რომ შეურ-თდეს ევროპელ მეფეებს, რომლებიც პაპის მფარველობის ქვეშ არიან. ის პაპს განუმარტავს, რომ საქართველოში არსებული სიტუაცია, კერძოდ სპარსელების მიერ ქვეყნის კონტროლი, არ აძლევს საშუალებას საჯაროდ აღიაროს კათოლიკობა, მაგრამ გიორგი XI პაპს ერთგულებას პირ-დებოდა და მის ნახვას ნატრულობდა. როცა მან გაიგო 1683 წელს ვენასთან ევროპელი მეფეების მიერ თურქთა დამარცხება, მან იტალიური ენის შესწავლა დაიწყო (დიონიჯი კარლი).

ქართლის მომდევნო მეფე ერეკლე I (1688-1703) იძულე-ბული იყო ქრისტიანობაც ეღიარებინა და ისლამიც. ტურ-ნეფორის გადმოცემით, „ის მიდიოდა მეჩეთში“, „დადიოდა კაპუჩინთა ეკლესიაშია მესაზე, სადაც მისი უნმინდესობა პაპის დღეგრძელობისათვის ლოცულობდა“.

ქართლის მეფე ქაიხოსრო (1709-1711) რომის პაპს ატ-ყობინებდა, რომ მან კათოლიკობა მიიღო, მაგრამ იძულე-ბული იყო ეს დაემალა, რადგან საქართველოს სპარსეთი აკონტროლებდა და სთხოვა მას, რომ ეს საიდუმლოდ შეენახა.

ქაიხოსროს მიერ ფარულად კათოლიკობის მიღება და სპარსეთში კათოლიკე მისიონერებისადმი განეული მფარ-ველობა შემადგენელი ნაწილი იყო მისი ღვიძლი ძმის, ქართლის ჯანიშინის (1703-1712), შემდგომში კი მეფის ვახტანგ VI-ის მიერ ევროპაზე აღებული ორიენტაციისა. ამ ორ ძმას ემხრობოდა ასევე მესამეც – კათალიკოსი დომენ-ტი (1705-1741), რომელმაც ქაიხოსროსთან ერთად წერილი გაუგზავნა რომის პაპს და უნოდა მას ქრისტეს მონაცვლე,

წმიდა სამოციქულო ეკლესიის მეთაური და გამოთქვა ერთგული ქვეშევრდომობის სურვილი პაპისადმი.

1709 წლის 21 აპრილს ავლანელებთან ბრძოლაში ირანში დაიღუპა გიორგი XI, იმავე წლის ივლისში ირანში გარდაიცვალა ქართლის ტახტის მემკვიდრე ლევანი, 1711 წლის 26 ოქტომბერს ასევე ავლანელებთან შეტაკებაში დაიღუპა ქართლის მეფე ქაიხოსრო (მასთან ერთად დაიღუპა ორი კათოლიკე მისიონერი, რომლებმაც არ მიატოვეს მეფე).

ვახტანგ VI-მ ჯანიშინობის პერიოდში გაატარა მრავალი კულტურულ-საგანმანათლებლო და სოციალურ-ეკონომიკური ხასიათის ღონისძიება, რითაც ძალზე გამოაცოცხლა ვითარება ქართლის სამეფოში. იგი თავისი შინამორბედი მეფეებივით მფარველობდა კათოლიკე მისიონერებს ქართლში.

ქაიხოსრო მეფის დაღუპვის შემდეგ ქართლის მეფის ტახტი გათავისუფლდა. **შაპმა ჰუსეინშა** მაფობა ვახტანგ VI-ს შესთავაზა და ირანში გაიწვია. 1712 წლის აპრილში ვახტანგი 300-კაციანი ამალით ირანში ჩავიდა, სადაც მას მეფობის სანაცვლოდ გამაპმადიანება მოითხოვეს. ვახტანგმა გამაპმადიანებაზე უარი განაცხადა, რის გამოც იგი ირანში შინაპატიმრობაში მოაქციეს.

ირანში მყოფმა ვახტანგმა კათოლიკე მისიონერების მეშვეობით 1712 წლის ივლის-აგვისტოში მიიღო სტამბოლში საფრანგეთის ელჩის გრაფ დეზალორის, ხოლო 1713 წლის აპრილში საფრანგეთის მეფის ლუი XIV-ისა და კანცლერ გრაფ დე პონშარტრენის წერილები. ყოველივე ამას შედეგად მოჰყვა ის, რომ ირანში შინაპატიმრობაში მყოფმა ვახტანგმა 1713 წლის 17 ნოემბერს საფრანგეთსა

და რომში წინასწარ შემუშავებული გეგმის მიხედვით დიპლომატიური მისით გაგზავნა სულხან-საბა ორბელიანი – გამოჩენილი ქართველი მოაზროვნე, მწერალი და ლექსიკოგრაფი. ეს იყო კარგად მოფიქრებული პოლიტიკური ნაბიჯი და წარმოადგენდა ადრე განზრახული გეგმის ხორცის შესხმის ცდას.

როგორც წყაროებით დასტურდება, 1692 წელს სულხან-საბამ კათოლიკობა მიიღო. 1707 წლის 15 აგვისტოს მან წერილი გაუგზავნა რომის პაპ კლიმენტი XI-ს, სადაც ალიარა პაპის უზენაესობა. 1713 წლის 17 აგვისტოს სულხან-საბა ორბელიანი ფრანგ მისისიონერ უან რიშართან ერთად გაემგზავრა საფრანგეთში დიპლომატიური მისით. სულხან-საბას ევალებოდა საფრანგეთის მეფის და ფრანგი მოღვაწეების მეშვეობით არა მარტო ირანის ტყვეობიდან ვახტანგ VI-ს გათავისუფლება, არამედ საქართველო-საფრანგეთის მომავალი პოლიტიკური და ეკონომიკური ურთიერთობების ფორმების ჩამოყალიბება. აქედან გამომდინარე, ვახტანგ VI-ის ევროპული პოლიტიკის მიზანი მდგომარეობდა იმაში, რომ გამოევლინა, თუ რა სარგებლობის მიღება შეეძლო საქართველოს საფრანგეთისაგან თავისი საშინაო და საგარეო პოლიტიკური ამოცანების გადაჭრის საქმეში.

ვახტანგმა შექმნილ ვითარებაში დიდი მნიშვნელობა მიანიჭა ირანის ტყვეობიდან დასავლეთის საშუალებით თავდახსნის მიღწევას. თუ საფრანგეთი ამ მიმართულებით პრაქტიკულ წაბიჯს გადადგამდა და ქართლის ტახტზე ვახტანგი ქრისტიანად ავიდოდა, მაშინ იგი აღმოსავლეთში საფრანგეთის მეფის და რომის პაპის მტკიცე საყრდენი იქნებოდა.

დასავლეთ საქართველოდან სულხან-საბას და რიშარს თან გაჰყევა დასავლეთ საქართველოს კათალიკოსის გრიგოლის წარმომადგენელი ბერი დავით მეგრელი.

1714 წლის 22 იანვარს სულხან-საბა, უან რიშარი და დავით მეგრელი დიდი წვალების შემდეგ მარსელში ჩავიდნენ. სულხან-საბამ წერილით რომის პაპს, კლიმენტი XI-ს შუამდგომლობა სოხოვა საფრანგეთის მეფესთან. რომის პაპმა ოხოვნა დაუყოვნებლივ შეუსრულა და სარეკომენდაციის წერილი მისწერა ლუი XIV-ს.

სულხან-საბა დიდი პატივით მიიღო საფრანგეთის მეფემ, ლუი XIV-მ, შემდეგ კი რომის პაპმა კლიმენტი XI-მ. პაპმა კანსაკუთრებული პატივისცემა გამოამულავნა: „თავზე მომეხვია და ჩინქებით ჯდომა წესია, არ დამაჩიქა, ფეხზე დამაყენა. მე დაბლა ბოლო ვდგებოდი, გვერდს ახლო მიმიყვანა, მომიკითხა, მიალერსა“. რომის პაპმა წერილი მისწერა ლუი XIV-ს ვახტანგ VI-სადმი დახმარების აღმოჩენის შესახებ: „მოიმოქმედე, რასაც ყველაზე საუკეთესოდ და სასარგებლოდ მიიჩნევდე ვახტანგ მეფის უსწრაფესი გათავისუფლებისა და გამოშვებისათვის“.

რომის პაპმა მხარდაჭერის წერილი მისწერა ასევე ვახტანგ VI-ს.

1714 წლის სექტემბერში სულხან-საბა დიდი პატივით მიიღო ფლორენციის დიდმა დუკამ კოზიმო III მედიჩიმ.

1715 წლის იანვარში სულხან-საბა კვლავ სტამბულში დაბრუნდა და იქ დარჩა 1716 წლის მაისამდე საფრანგეთის საელჩოში – ელოდებოდა საფრანგეთის მეფისა და რომის პაპის დაპირებებს. საბოლოო ჯამში ევროპიდან დახმარება ვერ მოვიდა. ევროპას ირანი იმ მომენტში ძალზე სჭირ-

დებოდა ოსმალეთის წინააღმდეგ და ამიტომ მასზე ზეწოლა არ განახორციელა ვახტანგის გასათავისუფლებლად.

ამის მიუხედავად, ამ ელჩობას ევროპასთან ურთიერთობის გაგრძელების თვალსაზრისით უდიდესი ისტორიული მნიშვნელობა ჰქონდა.

### კითხები:

- რა იყო ევროპელი პოლიტიკოსების საქართველოთი დაინტერესების მიზეზი XVII-XVIII საუკუნეებში?
- რა შედეგები მოჰყვა ნიკიფორე ირბახის ელჩობას ევროპაში?
- რა მნიშვნელობა ჰქონდა სულხან-საბა ორბელიანის ელჩობას ევროპაში?

## გ6 ეპროპელი მისიონერები და საჩართველო

ქართულ-ევროპულმა ურთიერთობებმა ჯვაროსნული ომების შემდეგ განვითარება ჰპოვა ევროპელი მისიონერების საქმიანობაში, თუმცა საჭირო შემთხვევებში იგი პოლიტიკურ ხასიათსაც იძენდა.

საქართველოში კათოლიკე მისიონერების მოღვაწეობის დაწყების თარიღად შეიძლება ჩაითვალოს 1233 წელი, როცა რომის პაპმა **გრიგოლ IX-მ** საქართველოში თავის ნარმომადგენლად გამოგზავნა ფრანცისკანელი მისიონერი იაკობ დე რუსანო რამდენიმე მისიონერთან ერთად. მან საქართველოში დააფუძნა მისიონი და 1234 წელს უკან, რომში დაბრუნდა. მან პაპს მოახსენა რუსუდან მეფესთან შეხვედრისა და დიდებული მიღების თაობაზე და რომ რუსუდან მეფემ მათ სამოღვაწეოდ ფართო ასპარეზი გაუხსნა. ამ ცნობის საფუძველზე პაპმა რუსანო კვლავ საქართველოში გამოაგზავნა და წერილი გამოატანა მეფესთან, რომლითაც იგი რუსუდანს მოუწოდებდა, რომ მისიონერები მფარველობაში ჰყოლოდა. რუსუდანმა პაპს საპასუხო წერილი მისწერა და კვლავ რუსანოს გაატანა რომში. 1240 წელს გრიგოლ IX-მ რუსანო რვა მისიონერთან ერთად კვლავ საქართველოში გამოაგზავნა.

ამრიგად, რუსუდან მეფის „რომის კვლესიასთან შეერთების“ კონკრეტულ წინადადებას პაპი გრიგოლ IX-მ ასევე კონკრეტული ნაბიჯი შეაგება.

ყოველივე ზემოთქმულიდან გამომდინარე შეიძლება გაკეთდეს დასკვნა: 1233 წელს საქართველოში დაარსდა ფრანცისკანელთა მისიონი, რომელსაც ხელმძღვანელობდა იაკობ დე რუსანო. იგი იყო რომის პაპის პირველი ლეგატი

საქართველოში, რომელმაც სრული წარმოდგენა შეუქმნა ვატიკანს ქართული მართლმადიდებლური ეკლესიის შესახებ. თუ რომის პაპ პონორიუს III-ს ქართული ეკლესია არ მიაჩნდა რომის ეკლესიისაგან განშორებულად, პაპ გრიგოლ IX-სათვის ეს უკვე რეალური ფაქტია. ამდენად, სწორია დიდი ქართველი მეცნიერის მიხეილ თამარაშვილის აზრი, რომ 1230 წლამდე „რომისა და საქართველოს სარწმუნოებრივი ერთობა მტკიცედ იყო დაცული, ხოლო ამ ხანების მერე მოხდა განცალკევება“.

1240 წელს თბილისში დომინიკანელებმა თავიანთი რელიგიური მისიონი დააარსეს. მათ ფრანცისკანელ მისიონერებთან ერთად გაშალეს მუშაობა კათოლიკური სარწმუნოების გავრცელებისა და რომის ეკლესიასთან გაერთიანების მომზადებისათვის. მონღოლთა მიერ საქართველოს დაპყრობის მიუხედავად, ქართულ-ევროპული ურთიერთობანი რელიგიურ-კულტურული ფორმით გარკვეულ-ნილად მაინც გრძელდებოდა. 1245 წლის 15 ივლისს პაპმა ინოვენტი IV-მ წერილი მისწერა „ქართველთა პატრიარქს“, რათა იგი დაუბრუნდეს ერთიან ეკლესიას. ქართველთა პატრიარქი კი ამ დროს რომში ანგარიშგასაწევი პიროვნება ყოფილა, რომელიც მისიონერებს ყურადღებას არ აკლებდა. პაპი მას უშუალოდ მიმართავს: „ქრისტეს მიერ ღირსეულ ძმას, ჩვენს ქართველ პატრიარქს მოციქულებრივი ლოცვა-კურთხევა“.

რომის პაპმა ნიკოლოზ IV-მ წერილები გამოუგზავნა საქართველოს მეფეს დემეტრე II თავდადებულს (1271-1289) და კათალიკოს აბრაამ I-ს (1280-1310) ეკლესიათა შეერთების წინადადებით. იგივე პაპი მოუწოდებდა დემეტრე II-ს

და დავით ნარინს ჯვაროსნულ ლაშქრობებში მონაწილეობის მისაღებად, თუმცა ეს ლაშქრობა ვერ განხორციელდა.

გიორგი V ბრნეინვალის დროს (1318-1346) საქართველომ შეძლო ძეველი დიდების აღდგენა და დიდი ამბიციების გაცხადება. ამის გამოც იყო, რომ რომის პაპმა იოანე XXII-მ კათოლიკეთა საეპისკოპოსო კათედრა სმირნიდან თბილისში გადმოიტანა. პაპმა წერილი გაუგზავნა გიორგი ბრნეინვალეს, სადაც იგი ოხოვდა, დაუჩქარე შინა მუშაობა ეკლესიათა გაერთიანებისათვისო (აქ არ იდგა საკითხი ქართველი მართლმადიდებლური ეკლესიის რომის კათოლიკური ეკლესიისადმი დამორჩილებისა, არამედ ორივე ეკლესიის გაერთიანებისა). იმუამად ეკლესიათა გაერთიანების საქმე ვერ მოხერხდა, თუმცა რომის პაპები მომდევნო პერიოდშიც ცდილობდნენ ეს საქმე ბოლომდე მიეყვანათ. ქართველები გარკვეულ პირობებში იყვნენ თანახმა ეკლესიათა გაერთიანებაზე, კერძოდ, თუ ვატიკანი რეალურ სამხედრო მხარდაჭერას აღმოუჩენდა საქართველოს (ეს კი მომდევნო საუკუნეებშიც ვერ მოხერხდა).

1370 წლის შემდეგ, გართულებული საერთაშორისო მდგომარეობის და 1453 წელს ბიზანტიის დაცემის გამო საქართველოში კათოლიკე მისიონერები აღარ ჩამოსულან.

რეფორმაციის შედეგად დასუსტებული კათოლიკური ეკლესიის გაძლიერებისა და კათოლიკური რწმენის გავრცელების მიზნით რომის პაპმა გრიგოლ XV-მ 1622 წლის 22 ივნისს შექმნა „კონგრეგაცია დე პროპაგანდა ფილ“.

კონგრეგაციის წევრებს სრული უფლება ჰქონდათ ნარემართათ მისიონერთა საქმიანობა და ამ მიზნით არჩევდნენ მისიონერებს სხვა ქვეყნებში გასაგზავნად.

ამისათვის მომდევნო პაპმა ურბან VIII-მ შექმნა პროპაგანდის კოლეჯი, რომლის მთავარი დანიშნულება იყო მოემზადებინა მისიონის ქვეყნისათვის მღვდლები. კოლეჯი განკუთვნილი იყო ყველა ერისა და რასის სასულიერო პირისათვის (1662 წელს კოლეჯში 22 ეროვნების ნარმობადგენლები სწავლობდნენ). კოლეჯში ორი ფაკულტეტი იყო – ფილოსოფიისა და თეოლოგიის. ქართველებს ამ კოლეჯში 2 ადგილი ეთმობოდათ). საჭირო გახდა საღმრთო წერილების თარგმნა სხვადასხვა ენებზე, ასევე უნდა დაბეჭდილიყო ლიტერატურული, დოგმატური, კატეხიზმოს ნაწარმოებები. ასევე საჭირო გახდა ხელახლა დაბეჭდილიყო და გამრავლებულიყო მრავალი საეკლესიო აქტი და ცირკულარი, რომლებშიც მსჯელობა იქნებოდა მსოფლიოს მრავალ ხალხთა ენებზე. ამიტომ 1626 წლიდან დაიწყო მრავალეროვანი სტამბის ორგანიზება.

**ნარმოუდგენლად მცირე დროში, დაახლოებით ერთ წელიწადში, შეიქმნა საბეჭდი დაზგა, რომელსაც 15 ენაზე შეეძლო ბეჭდვა, მათ შორის ქართულად.**

1628 წლის ივნისში წმინდა კონგრეგაცია დე პროპაგანდა ფიდემ გადაწყვიტა თავის სტამბაში მოემზადებინა ქართული ასოები, როგორც საეკლესიო, ისე საერო. ეს გადაწყვეტილება დაამტკიცა კონგრეგაციამ 1628 წლის სექტემბერში. ასე შეიქმნა მსოფლიოში პირველი ქართული სტამბა, სადაც ნიკიფორე ირბახმა და სტეფანე პაოლინიმ პირველი ქართული წიგნი დაბეჭდეს.

კათოლიკე მისიონერებთან პირველად კავშირი დაამყარა კახეთის მეფემ ალექსანდრე II-მ (1574-1605), რომელმაც თავის სამეფოში მიიწვია ისინი. როგორც ცნობილია, ამ დროს ოსმალეთის წინააღმდეგ კათოლიკურ დასავლეთ-

თან მოკავშირის მაძიებელ შაჲ აბას I-ს (1587-1629) დიპ-ლომატიური მიზნით ქრისტიანთა დამცველად მოჰქონდა თავი. ამ პოლიტიკიდან გამომდინარე, იგი მის ქვეშევრდომ ქრისტიანულ საქართველოში ხალისით უწყობდა ხელს ევროპელი კათოლიკე მისიონერების საქმიანობას, რითაც კათოლიკურ დასავლეთს ქრისტიანთა დამცველად მოაჩვენებდა თავს. სწორედ ამ ნაბიჯით იყო ნაკარნახევი შაჲ აბას I-ის სიტყვები ქართველი ელჩისადმი: „უთხარით ოქვენს მეფეს (ალექსანდრე II-ს – ვ. შ.), თუ ის ქრისტიანია, უნდა ემორჩილებოდეს რომის უნივინდეს პაპს, ვინაიდან მე კარგად ვიცი, რომ ის, ვინც ამას არ აკეთებს, არ არის კარგი ქრისტიანი“. ესეც იყო ერთ-ერთი მიზეზი იმისა, რომ ალექსანდრე მეორემ და ალავერდელმა მიტროპოლიტმა დუშ ანუშშე აღუთქვეს დახმარება კახეთში კათოლიკური ეკლესიის გასახსნელად.

ალექსანდრე მეორის პოლიტიკა გააგრძელა და განვითარა თეიმურაზ I-მა. ევროპისადმი ქართველთა აშკარა სიმპათია, პატივისცემა და სამოციქულო ტახტისადმი მუდმივი კონტაქტის დამყარების სურვილი გაითვალისწინეს კათოლიკე მესვეურებმა და 1616 წელს საქართველოში გამოგზავნეს ნახტევანში დომინიკანელთა ნინამძღვარი – ვიკარიუსი წმ. მამა პაოლო მარია ჩიტადინი და ფაენცა. იგი საქართველოში 1616 წლის ივნის-ივლისში იმყოფებოდა. მან საქართველოს შესახებ მოკლე „ცნობები“ შეადგინა და რომის პაპ პავლე V-ს წარუდგინა, რომელიც 1621 წელს ცალკე ბროშურად დაიბეჭდა ნეაპოლში. ეს იყო სტამბურად დაბეჭდილი პირველი ბროშურა, რომელიც შეიცავდა ცნობებს საქართველოს შესახებ. ქართველ მღვდლებს მარია ჩიტადინისათვის განუცხადებიათ, რომ „ყველა თავს

ძალზე ბედნიერად ჩასთვლიდა, თუ რომის ქრისტიანები მათ ქვეყანაში ჩამოვიდოდნენ... ისინი დიდ წყალობად ჩასთვლიდნენ, რომ მათვის გვესწავლებინა და მათი ყმან-ვილები ჩვენს დისციპლინაზე აღგვეზარდა“.

ჩიტადინიმ შეადგინა რომის ეკლესიასთან ქართული ეკლესიის გაერთიანების გეგმა და ნმ. კონგრეგაცია დე პროპაგანდა ფიდესათვის უთხოვია საქართველოში ოთხი მისიონერის გაგზავნა.

შაჲ აბას I-ის ტყვეობაში (1613-1624) მყოფ ქეთევან დე-დოფალს, რომელსაც მტკიცედ პქონდა გადაწყვეტილი არ შეეცვალა ქრისტიანული სარწმუნოება, მჭიდრო ურთიერთობა პქონდა შირაზში მოლვაწე ავგუსტინელ მისიონერებთან. დედოფალი ეხმარებოდა მისიონერებს მატერიალურად შირაზში მონასტრის აგებისას. თავის მძიმე ხვედრს შეგუებული ქეთევან დედოფალი სულიერ სიმხნევესა და სიმტკიცეს პორტუგალიელ კათოლიკე მამებთან, განსაკუთრებით დუშა ანუშსთან ურთიერთობაში პპოვებდა, დედოფალი და მისი თანმხლები პირები ესწრებოდნენ ლოცვებს ავგუსტინელ მისიონერთა ეკლესიაში. მონამებრივი სიკვდილის წინ დედოფალმა სასწრაფოდ გაგზავნა კაცი ავგუსტინელი მამების თავშესაფარში, საიდანაც მასთან მამა ამბროსიო და მამა ანტონიო მივიდნენ. ქეთევანმა ამ უკანასკნელს უთხრა აღსარება და ზიარებაც მისგანვე მიიღო. დუშა ანუშსმა პორტუგალიულ ენაზე აღწერა დედოფლის ტყვეობა და მისი მონამებრივი სიკვდილი ირანში. ამ პორტუგალიელმა მისიონერებმა დიდი წვალება გაიარეს და სიკვდილის რისკის ფასად იპოვეს ქეთევან დედოფლის საფლავი და მისი წმინდა ნაწილები საქართველოში ჩამო-

ასვენეს. ბერები ბევრს ეცადნენ, რომ ქეთევან დედოფალი რომაული კათოლიკური ეკლესიის წამებულად ეცნოთ.

დუშ ანუსმა და პეტრო დუშ სანქოსმა საქართველოში თეიმურაზ I-თან ჩამოიტანეს მისი წამებული დედის ნეშტის ნაწილები და მეფეს გადასცეს. მათვე გადაწყვიტეს საქართველოში მისიონის დაარსება. ეს ყოველივე 1628 წლის 11 მაისს, გორში მოხდა. მეფემ მისიონერებს გამოჰკითხა, თუ როგორ აწამეს დედამისი. როცა მამები მოუყვნენ, იგი ძლიერ ჭიროდა. თეიმურაზ მეფემ გადაწყვიტა მისიონერების დატოვება საქართველოში და აქ მათი მონასტრის დაარსება. პორტუგალიელ ავგუსტინელ მისიონერებთან ერთად რვა თვის შემდეგ საქართველოში დაფუძნდა თეატინელთა მისიონიც. დუშ ანუსმა პირველმა გააცნო ევროპას ქეთევან დედოფლის მონაშებრივი აღსასრული, იგი დედოფალს მხოლელიო ეკლესიის წმინდანად და წამებულად მიინვდა.

ვატიკანში საქართველოსა და ქართველების გაცნობის საქმეში ფასდაუდებელი როლი შეასრულა სახელგანთქმულმა მოგზაურმა პიეტრო დელა ვალემ. 1614-1626 წლებში ის მოგზაურობდა აღმოსავლეთის ქვეყნებში, ცხოვრობდა თეირანში, ისფაჰანში, შირაზსა და სპარსეთის სხვა ქალაქებში. შირაზში 2 თვის მანძილზე ყოფნის პერიოდში იგი ხშირად სტუმრობდა და ანუგეშებდა აქ ტყვედ მყოფ ქეთევან დედოფალს. ქართველებისადმი დიდმა სიყვარულმა და პატივისცემამ განაპირობა ის, რომ მან ცოლად შეირთო სპარსეთში დედასთან ერთად ტყვედ წაყვანილი, იქვე დაობლებული და მის მიერ ტყვეობიდან დახსნილი თინათინ ძიბა, რომელსაც დელა ვალემ სახელი შეუცვალა და მარიუჩა დაარქვა. ეს უკანასკნელი კი ძალზე უყვარდა

ქეთევან დედოფალს. პიეტრო დელა ვალეს მჭიდრო კავშირი ჰქონდა როგორც ქეთევან დედოფლის გარშემო, ისე ირანში მყოფ მრავალრიცხოვან ქართველებთან, რომებისგანაც მან საქართველოს ისტორიული წარსულისა და მაშინდელი მდგომარეობის შესახებ ძვირფასი ცნობები შეაგროვა.

**1626 წელს**, 12-წლიანი მოგზაურობის შემდეგ პიეტრო დელა ვალე რომში დაბრუნდა. მან რომის პაპს, ურბან VIII-ს ნარუდგინა ვრცელი მოხსენებითი ბარათი ქართველი ხალხის მძიმე მატერიალური და სულიერი მდგომარეობის შესახებ. იგი პაპს ენერგიულად მოუწოდებდა „ქართველების სულის ხსნის მიზნით“ დაუყოვნებლივ გაეგზავნა მისი ონერები საქართველოში.

საქართველოსა და ქართველების შესახებ მეორე საინტერესო და ღრმაშინაარსიანი მოხსენებითი ბარათი ვატიკანში ნარადგინა **1626 წლის** დეკემბერში აღმოსავლეთი-დან დაბრუნებულმა დომინიკანელმა მისიონერმა გრეგორიო თრსინიმ, რომელმაც **1624 წელს** მარია ჩიტადინი და ფაენცა შეცვალა ერევანში ვიკარიუსის პოსტზე.

**1626 წლის** 4 მაისს წმიდა კონგრეგაცია დეპროპაგანდა ფიდემ სპეციალური დეკრეტით გადაწყვიტა, რომ საქართველოში დაეარსებინა თეატინელთა ორდენის მისიონი. 16 ივნისის დეკრეტით განისაზღვრა საქართველოში გასაგზავნი მისიონერების შემადგენლობა დონ პიეტრო ავიტაბილეს ხელმძღვანელობით.

სანგრძლივი მგზავრობის შემდეგ **1628 წლის** 14 დეკემბერს მისიონი გორში ჩავიდა. 5-კაციან შემადგენლობას დაემატა ფრანგი ბერი კლავდიო. ასე დაიწყო თეატინელი მისიონერების მოღვაწეობა საქართველოში, რომელიც

დროში დაემთხვა ნიკიფორე ირბახის ელჩობას ევროპაში. გორში თეატინელ ბერებს თვეენახევარი მასპინძლობდა ამბროსიო დუშ ანუში. მისიონერები დიდი პატივითა და კეთილგანნყობით მიიღეს თეიმურაზ მეფემ და კათალიკოსმა ზაქარიამ. ავიტაბილემ მათ გადასცა პაპის, ურბან VIII-ის წერილები. მეფემ და კათალიკოსმა მისიონერებს წება დართეს, აეგოთ ეკლესია და ექადაგათ კათოლიკური სარწმუნოება ისე თავისუფლად, როგორც ამას იტალიაში აკეთებდნენ. მეფემ მისიონერებს ასევე მისცა საცხოვრებელი სახლი, გამოუყო მსახურები და სურსათი.

მიუხედავად შაჰ აბას I-ის ამაოხრებელი შემოსევების შედეგად შექმნილი მძიმე ეკონომიკური სიტუაციისა, მისიონერები გულმოდგინედ შეუდგნენ მოღვანეობას, ოთხ თვეში მეტ-ნაკლებად ისწავლეს ქართული ენა, ქართული ლოცვები. 1632 წლისათვის მათ გორში ააგეს წმიდა პეტრეს სახელობის ეკლესია, შექმნეს სასულიერო სასწავლებელი, სადაც ბავშვებს ასწავლიდნენ ქართულ, ლათინურ და იტალიურ ენებს. ერთ-ერთმა მისიონერმა დი სტეფანომ შეადგინა იტალიურ-ქართული ლექსიკონი და ქართული ენის გრამატიკა, რომლითაც ასწავლიდნენ მოწაფეებს.

1631 წლის 12 მაისს გორში ჩავიდნენ თეატინელი მისიონერები დონ არქანჯელო ლამბერტი და დონ ჯოზეფო ჯუდიჩე. მათ მოპქონდათ პაპის წერილები თეიმურაზ მეფესთან, კათალიკოს ზაქარიასა და ნიკიფორე ირბახთან, ასევე პიეტრო დელა ვალეს წერილები სამივე პიროვნებასთან.

1632 წლის 10 ივლისს გორში ახალ მისიონერებთან ერთად ჩამოვიდა თეიმურაზ მეფის მიერ რომის პაპთან გაგზავნილი დონ პიეტრო ავიტაბილე.

თეიმურაზ მეფემ ლირსეულად მიიღო ჩამოსული მისიონერები. ავიტაბილემ მას გადასცა რომის პაპის წერილი, რომლის პირველი სტრიქონები იწყებოდა: რომ „ევროპის ბევრ ქვეყანაში ვრცელდებოდა მისი დიდება და ბრწყინვალე გამარჯვება სპარსელებზე“. ურბან VIII ხოტბას ასხამდა თეიმურაზის ძლევამოსილებას და ტაქტიანად მიმართავდა, ენერგიულად შეეწყო ხელი კათოლიკობის გავრცელებისათვის, მოუწოდებდა დაეძლია ყველა დაბრკოლება ეკლესიათა გაერთიანების გზაზე.

თეატინელი მისიონერების მხურვალე მოღვაწეობა ქართლში ძალზე შეაფერხა თეიმურაზის მარცხმა ირანთან. ირანის შაჰმა 1633 წლის დასაწყისში ქართლის მეფედ დანიშნა გამაჰმადიანებული როსტომ ხანი (ხოსრო მირზა). თეიმურაზი გაეცალა ქართლ-კახეთს და დიდი ამალით გადავიდა იმერეთში თავის სიძესთან, ალექსანდრე მესამესთან. ნიკიფორე ირბახმა კი მოღვაწეობა გააგრძელა სამეგრელოში. თავიდან თეატინელ მისიონერებს როსტომ მეფე არ ერჩოდა, მაგრამ მალე მათთვის აღმოსავლეთ საქართველოში მოღვაწეობა ძალზე გაძნელდა და მისიონერებმა ძირითადად სამეგრელოს მთავარს, ლევან II დადიანს შეაფარეს თავი.

ლევან II დადიანმა (1611-1657) ძალზე კარგად მიიღო მისიონერები და ყველანაირი პირობა შეუქმნა ნაყოფიერი მოღვაწეობისათვის. მისი რელიგიური პოლიტიკა მიზნად ისახავდა მისიონერების საშუალებით ევროპასთან კულტურულ, სავაჭრო-ეკონომიკური კავშირების დამყარებას

და რეალიზაციას. მისი უმთავრესი ამოცანა იყო, სამთავროში მოეზიდა ვაჭრები დასავლეთ ევროპიდან და შავი ზღვის საშუალებით სამეგრელო ჩაება საერთაშორისო ვაჭრობაში. ამ ნიჭიერ მთავარს (როგორც მას უწოდებს ლამბერტი) კარგად ესმოდა, რომ „ევროპის ქვეყნების სიძლიერის მაცოცხლებელ არტერიას სწორედ დაწინაურებული ეკონომიკა წარმოადგენდა“. ამიტომ იგი ცდილობდა, რომ ევროპასთან სავაჭრო-ეკონომიკური კავშირით გამოესწორებინა სამთავროს მძიმე ეკონომიკური მდგომარეობა, ვაჭრობა და ხელოსნობა ევროპულ ყაიდაზე გაემართა. ლევან II დადიანმა ნიკიფორე ირბახთან ერთად შეიმუშავა ევროპასთან საქართველოს გზით ვაჭრობის განვითარების პროექტი, რომლის მიხედვით ირანის აბრეშუმი საქართველოზე გავლით უნდა გაეტანათ შავი ზღვით ევროპაში (ასეთი გეგმა ჰქონდა პიეტრო დელა ვალეს და ამ გეგმას ლევან დადიანი იცნობდა მისიონერების და ნიკიფორე ირბახის მეშვეობით). ეს პროექტი ლევან დადიანმა 1638 წელს გააცნო დონ პიეტრი ავიტაბილეს, რომელიც რომში მიდიოდა და სოხოვა კონსტანტინეპოლიში ვენეციის ელჩისათვის ეჩვენებინა და ხელი შეეწყო მისი რეალიზაციისათვის, თუმცა, ამაოდ – იგი ვერ განხორციელდა, მიუხედავად იმისა, რომ ლევან დადიანმა წერილით რომის პაპსაც კი სოხოვა დახმარება.

1649 წლის 18 ოქტომბერს იტალიაში გაემგზავრა მისიონერი დონ არქანჯელო ლამბერტი. იგი დაბრუნდა თავის მშობლიურ ქალაქ ნეაპოლში. 1654 წელს საქართველოში 22 წლის მანძილზე მოლვანეობის შემდეგ ასევე სამშობლოში დაბრუნდა დონ კრისტოფორო კასტელი. მიხეილ თამარაშვილის თქმით, ამ ორმა მისიონერმა ქართველ

ერს დიდი სულიერი და ხორციელი სამსახური მიაგო. ქართველებისათვის ძვირფასი საგანძურია ის ორი წიგნი, რომელიც ლამბერტიმ დაგვიტოვა. ესაა „ცნობები კოლხეთზე სამეგრელოდ წოდებულზე“ (1654) და „წმიდა კოლხეთი“ (1657), რომელიც მან ნეაპოლში გამოაქვეყნა. მისი ნაშრომები უნდა ჩაითვალოს იმ პირველ გამოკვლევებად, რომელიც მეტ-ნაკლები მეცნიერული დახვეწილობით წარმოდგენას უქმნიან საქართველოს ისტორიასა და ეთნოგრაფიაზე. მეორე მისიონერი კასტელი 14 წლის განმავლობაში ენეოდა სამისიონერო მუშაობას სამეგრელოში. ფასდაუდებელი ღირებულებისაა მის მიერ შესრულებული 1000-ზე მეტი ნახატი, საიდანაც შემოგვცეკრის მთელი გალერეა საერო თუ სასულიერო მოღვაწეებისა და მშვენიერი ქართველი ქალებისა. დიდი ისტორიული მნიშვნელობისა მისი წერილები და ჩანაწერები საქართველოზე (მურმარ ჰაპაშვილი).

კასტელის ძალზე უყვარდა ჩვენი ქვეყანა. ამ სიყვარულის უტყუარი გამოხატულებაა მისი სიტყვები: „საქართველო ჩემი სატრიუ იყო 26 წლის განმავლობაში“-ი.

თეატრინელი მისიონერების საქმე XVII-XVIII საუკუნეებში გააგრძელეს კაპუჩინელთა ორდენის წარმომადგენლებმა, რომლებიც წარმოადგენდნენ ფრანცისკანელთა ორდენის განშტოებას. მათ საქმიანი რელიგიურ-კულტურული ურთიერთობანი ჰქონდათ ქართლისა და იმერეთის მეფეებთან, თბილისში, ქუთაისში და გორში ჰქონდათ მისიონები.

საერთოდ უნდა ითქვას, რომ კათოლიკე მისიონერებმა უმნიშვნელოვანესი როლი ითამაშეს საქართველოს ისტორიაში. ისინი მხარს უჭირდნენ ქვეყნის მთლიანობის აღდგენას, სკოლების აგებას და განათლების და კულტურის

გავრცელებას, საქართველოს დაკავშირებას დასავლეთ ევ-  
როპასთან, ასრულებდნენ დიპლომატიურ დავალებებს,  
გმობდნენ ტყვეთა სყიდვას, წერდნენ წიგნებს, რომელშიც  
ქებას ასხამდნენ საქართველოს, დიდ დროს უთმობდნენ  
ქართული ენის და ადგილობრივი კულტურის შესწავლას,  
ევროპას აცნობდნენ ქართულ ისტორიას და კულტურას.  
მათვის დაახასიათებელი თვისებები – გაჭირვებაში გამძ-  
ლეობა, უანგარობა, ახლობლებთან ძმური ურთიერთობა,  
ქრისტიანულ მორალზე დამყარებული კეთილშობილური  
ჰუმანიზმი კეთილისმყოფელ გავლენას ახდენდა საქართვე-  
ლოს ცხოვრებაში. მათი შრომითა და გავლენით საქართვე-  
ლოში გაიფურჩქნა სასულიერო და კულტურული ცხოვ-  
რება.

## პირავაზი:

1. როდის დაიწყო კათოლიკე მისიონერების საქმიანობა საქართველოში?
2. რა იციო წმიდა კონგრეგაცია დე პროპაგანდას ფიდეს მოღვაწეობაზე საქართველოში?
3. რა როლი შეასრულეს კათოლიკე მისიონერებმა საქართველოს ისტორიაში?

## §7 ერეკლე გორგა და ევროპა

როგორც წინა პარაგრაფებში აღინიშნა, ქართველი მეფები ინტენსიურად ცდილობდნენ კონტაქტების დამყარებას ევროპის სახელმწიფოებთან. ამითაც იყო განპირობებული, რომ ევროპელი მწერლები და პოლიტიკური მოღვაწეები თავიანთ ნაწარმოებებში მოიხსენიებდნენ საქართველოსა და მის მეფეებს. ევროპაში აღტაცებასა და თანაგრძნობას იწვევდა უცხოელი დამპყრობლების წინააღმდეგ ქართველი ხალხის ბრძოლა.

**ერეკლე II** ევროპაში ყველაზე ცნობილი ქართველი მეფე იყო. მის ნიჭიე და სიმამაცეზე ჯერ კიდევ 1738-1739 წლებში ალაპარაკდა აღმოსავლეთი და დასავლეთი. მან სახელი გაითქვა **ნადირ-შაჰის** სამხედრო ექსპედიციებში (1738-1739) ავღანეთსა და ინდოეთში. ევროპელი მკითხველისათვის საქართველოსა და ერეკლეს პიროვნების გაცნობის საქმეში დიდი მნიშვნელობა ჰქონდა ფრანგი ავტორის **შარლ დე პეისონელის** წიგნს „მოთხრობა ახლანდელ არეულობაზე სპარსეთსა და საქართველოში“, რომელიც პარიზში გამოქვეყნდა 1754 წელს. შარლ დე პეისონელი აღტაცებით გადმოსცემს „დიდი პრინცის“ ერეკლეს მოღვაწეობას, აძლევს რა მას მაღალ შეფასებას, მიუთითებს მის არაჩვეულებრივ ჭკუა-გორნებაზე, გამოცდილებაზე, მხნეობასა და სამართლიანობაზე. ამ ნაშრომმა დიდი გამოხმაურება ჰპოვა ევროპაში. ამაზე მეტყველებს ის ფაქტი, რომ 1755 წელს წიგნი ითარგმნა და გამოიცა გერმანულ ენაზე მაინის ფრანკფურტში.

ირანისა და აღმოსავლეთის საქმეებში აქტიურმა ჩარევამ ერეკლე II-ს დიდად გაუთქვა სახელი ევროპაში. ამის

დასტურია პრუსიის მეფის ფრიდრიხ II დიდის სიტყვები:  
„ევროპაში პირველი მე ვარ, ხოლო აზიაში – ერეკლე“.

ცნობილი გერმანელი მწერლის ლესინგის პიესის – კო-  
მედია „მინა ფონ ბარჟელმი ანუ ჯარისკაცის ბედნიერება“  
– მიხედვით, სახელის მოხვეჭაზე მეოცნებე გერმანელი  
ჯარისკაცები ცდილობდნენ გერმანიიდან გაპარვას, რათა  
პრინც ერეკლეს სარდლობით ერთი-ორჯერ მაინც ელაშქ-  
რათ თურქების წინააღმდეგ.

ერეკლე II-ის მამა, **თეიმურაზ II 1744-1762** წლებში  
ქართლის მეფე იყო, ხოლო თავად ერეკლე ჯერ კახეთის  
(1744-1762), მერე კი, მამის გარდაცვალების შემდეგ – 1762  
წლიდან 1798 წლამდე – ქართლ-კახეთის მპრძანებელი.

ერეკლე II-ის დასავლური ორიენტაციის გალვივების  
საქმეში მნიშვნელოვანი როლი ითამაშა საქართველოს  
კათალიკოსმა **ანტონ I დიდმა (1744-1755, 1764-1788)**.

ფილოსოფოსმა და მეცნიერმა ანტონმა კათალიკოსის  
ტახტი ქართლში თეიმურაზ II-ის გამეფების დროს დაიკავა  
– 1744 წელს. დიდი განათლების ანტონი უმაღვე ენერგიუ-  
ლად შეუდგა კრიზისულ მდგომარეობაში მისული ეკლესი-  
ის აღორძინება-განმტკიცებას, მეფის ხელისუფლების გაძ-  
ლიერებას, საქართველოში ურჩ და განდგომილ მღვდელ-  
მთავართა დამორჩილებას, დანგრეული ეკლესია-მონასტ-  
რების აღდგენას, სასწავლებლების დაარსებას, საქართვე-  
ლოში სომხური მონოფიზიტური ეკლესიის წინააღმდეგ  
ბრძოლას (სომეხი მონოფიზიტები და მათი მღვდელმთავ-  
რები ებრძოდნენ როგორც ქართულ ეკლესიას, ასევე აქ  
ჩამოსულ კათოლიკე-მისიონერებს, ქართველ კათოლიკე-  
ებს. ქართლის კათალიკოსი **ნიკოლოზ VII ხერხეულიძე**  
რომის პაპს, ბენედიქტე XIV-ს 1742 წელს წერდა, რომ „ჩემი  
დიდი ხნის წადილის შესრულება სომხებმა არ დამაცადეს,

რადგან ისინი ჩვენ აღარ გვიჯერებენ და ამ ქვეყანაში თავიანთ ნებისამებრ ბატონობენ“). თავისი მიზნების განსახორციელებლად მან ორიენტაცია აიღო დასავლეთ ევროპაზე, დაუახლოვდა საქართველოში მყოფ მისიონერებს (პატრი ნიკოლა, ფრანჩესკო, ბონავენტურა პადუელი) და ბასილიანელთა უნიატური ორდენის მოწევე გახდა, მფარველობდა დევნის უამს კაპუჩინელ მისიონერებს.

მისი გაკათოლიკება (1755) უნდა განვიხილოთ, როგორც დასავლური ორიენტაციის გამარჯვება თეიმურაზ II-ისა და ერეკლე II-ის დროინდელ საქართველოში. მისი გაკათოლიკება, როგორც ნიკიფორე ირბახის და სულხან-საბა ორბელიანისა, არ ნიშნავდა მართლმადიდებლობის ღალატს, წინაპართა ტრადიციების უგულებელყოფას.

როგორც ისტორიული წყაროებიდან ირკვევა, ქართლის მეფე თეიმურაზ II იმ პერიოდში ანტიკათოლიკური განწყობის იყო. ამისკენ იგი წააქეზეს საქართველოში მყოფმა პროირანულმა ძალებმა, ანტონ კათალიკოსის პირადმა მტრებმა, კათოლიკეთა მოწინააღმდეგე სომხებმა და ბერძნებმა, კონსტანტინეპოლის მართლამდიდებელმა პატრიარქმა. ამ ანტიკათოლიკურ მოძრაობას სათავეში ედგა ნინოწმინდელი მთავარეპისკოპოსი და თეიმურაზ II-ის კარის მოძღვარი, ცნობილი პოეტის, ბესიკის მამა, ზაქარია გაბაშვილი.

მისი მეთაურობით 1755 წლის ბოლოს სამღვდელოების ნაწილმა მცხეთაში მოიწვია კრება და ანტონი კათალიკოსობიდან გადააყენა და დაპატიმრა (შემდეგ იგი 1756 წელს რუსეთში წავიდა). მკაცრად მოექცნენ ასევე კათოლიკე პატრებს – ჩამოართვეს ეკლესია, გორში კი კათოლიკეთა საავადმყოფო, წამალხანა და სასწავლებელი, პატრები კი ახალციხეში განდევნეს.

თეიმურაზ II-ს ანტიკათოლიკური განწყობა ბოლომდე არ გაჰყოლია. ერეკლე II-ის რჩევით იგი მიხვდა, რომ პროგრესის მონინაალმდეგე ძალების სურვილს ასრულებდა და 1760 წლის 23 იანვარს წერილი მისწერა ახალციხის კაპუჩინთა ხელმძღვანელს პატრი ლეონარდოს, რათა ერთი მღვდელი გამოეგზავნა თბილისში უმწყემსოდ დარჩენილი მრევლის მოსავლელად.

თეიმურაზ II-ის გარდაცვალების შემდეგ ერეკლე II-მ 1763 წელს რუსეთიდან გამოიხმო ანტონ I (აქ იგი ვლადიმირის ეპარქიის მთავარეპისკოპოსი იყო) და კვლავ კათოლიკოსობის რანგში აღადგინა 1764 წელს.

ამ ფაქტს შეეძლო გარკვეული როლი შეესრულებინა კათოლიკებისადმი ფარული სიმპათიით განწყობილ ერეკლეზე ევროპული ორიენტაციის სასარგებლოდ. ამ დროისათვის ერეკლეს გამოუმჯდავნებელი სიმპათია კათოლიკებისადმი უდავოა. ეს გამოვლინდა იმაშიც, რომ მან კათოლიკობის მიღებისათვის განდევნილი იგანე ორბელიანი ეჭსორიდან დააბრუნა და მდივანბეგად დანიშნა, ხოლო მისიონერ პატრიებს იგი ყოველნაირად ეხმარებოდა და მფარველობდა ერთხანს, სანამ თბილისში სომებს გრიგორიანელთა შფოთი არ ატყდა ამის გამო.

თბილისში და გორში ერეკლეს ფარული მხარდაჭერით ისევ აღსდგა კაპუჩინელთა მოლვანეობა. ამით გახარებულმა რომის პაპმა კლიმენტ XIV-მ 1769 წლის 23 აგვისტოს მეორედ მოსწერა წერილი (პირველად 1763 წელს) ქართველ მეფეს და მადლობა გადაუხადა მისიონერებისადმი განეული მფარველობის გამო. აქვე პაპი მეფეებს აუზყებდა, რომ მან მთელ ევროპაში მოიხვეჭა სახელი თავისი სიბრძნით, გულადობით, მტერზე გამარჯვებით, კათოლიკე მისიონერებისადმი კარგი მოპყრობით და მათზე

მზრუნველობით. ერთი სიტყვით, რომის პაპი ერეკლე II-ის მფარველობას კათოლიკეებისადმი საერთაშორისო მნიშვნელობას ანიჭებდა და ამით მისი პიროვნების მასშტაბებს ზრდიდა.

1780-იანი წლებიდან რუსეთზე გარკვეულად გულაც-რუებულმა ერეკლე II (იგულისხმება გენერალ ტოტლებენის და რუსთა ღალატი 1770 წელს ასპინძის ბრძოლაში) გადაწყვიტა კონტაქტი დაემყარებინა დასავლეთ ევროპის სახელმწიფოებთან, სადაც მას უკვე საკმაოდ კარგად იცნობდნენ. ერეკლეს ეს ნაბიჯი განპირობებული იყო ქართლ-კახეთის სამეფოს წინაშე მდგარი ფინანსური დახმარების ძიებით. ცნობილია, რომ რუსეთ-თურქეთის ომის დროს (1768-1774) ქართლ-კახეთის სამეფომ გასწია დიდი ხარჯი – 430 ათასი მანეთი. ერეკლემ რუსეთს სესხად სთხოვა ფული, მაგრამ რუსეთიდან პასუხი დააგვიანეს. ამიტომ ერეკლემ გადაწყვიტა სესხად ფული ეთხოვა ევ-როპის სახელმწიფოებისათვის. ამ მიზნით მან კათოლიკე მისიონერები დაიახლოვა, შეპირდა მათ ეფექტურ დახმარებას. ამასთან სთხოვა დახმარება-შუამდგომლობა ევროპის სახელმწიფოებთან.

1781 წლის გაზაფხულზე ერეკლემ ევროპაში თავის პირად წარმომადგენლად გააგზავნა მასთან 19 წლის ნაცნობობის მქონე გამოცდილი პატრი დომინიკე ტრიესტელი. იმავე წლის 20 ივლისს იგი კონსტანტინეპოლიში ჩავიდა, მაგრამ 3 ივლისს პერაში მოულოდნელად გარდაიცვალა და რომის პაპამდე ვერ ჩაალწია.

ერთი წლის ლოდინის შემდეგ, 1782 წლის ოქტომბერში ერეკლემ ხელახლა გააგზავნა ელჩად პატრი მაურო ვერონელი, რომელიც 6 წელი იმყოფებოდა საქართველოში. ერეკლემ მაურო ვერონელს პასპორტი უბოძა ქართულ,

თურქულ და ლათინურ ენებზე და ევროპაში გაუშვა. მაუროს მიჰქონდა ქართულ ენაზე დაწერილი წერილები რომის პაპის, საფრანგეთის, სარდინიის, ნეაპოლიტანიის, პრუსიის მეფეებისათვის, ავსტრიის იმპერატორისა და ვენეციის რესპუბლიკის სახელზე. ადრესატებს ერეკლე II სთხოვდა ფულად სესხს თავისი ჯარის ევროპულ ყაიდაზე გარდასაქმნელად. ევროპაში მიმავალ მაუროს თან მიჰქონდა უფროსი პატრის – **ანდრეასის** სარეკომენდაციო წერილი, რომელშიც ანდრეასი სთხოვდა ავსტრიის იმპერატორი იმსებ II-ს, რომ მიეღო მაურო და მოესმინა მისთვის. ანდრეასმა მსგავსი შინაარსის წერილი გაუგზავნა რომში პროპაგანდა ფიდეს კონგრეგაციას და სთხოვა მხარდაჭერა აღნიშნულ საქმეში.

ამრიგად, კათოლიკე პატრიები ხელს უწყობდნენ ერეკლე მეფის ევროპაზე აღებულ ორიენტაციას და უნარს და ენერგიას არ აკლებდნენ, რათა მაურო ვერონელის ელჩობა წარმატებით დაგვირგვინებულიყო. ასეთ შემთხვევაში ერეკლე II კათოლიკებს არა მარტო მფარველობას აღუთქვამდა, არამედ 1755 წელს ჩამორთმეული ეკლესიების, სახლებისა და სხვა ქონების უკან დაბრუნებასაც, ასევე თბილისში თავის ხარჯზე ექვსი პატრის შენახვას. ერეკლემ ამ მიმართულებით პრატიკული ნაბიჯი გადადგა – 1781 წლის 20 ნოემბერს მისი ბრძანებით თბილისისა და გორის პატრიები და მათი ძმები გათავისუფლდნენ ყოველგვარი გამოსალებისა და ხარჯებისაგან.

სამწუხაროდ, არც ამ ელჩობას ეწერა წარმატება. 1783 წლის მაისში პატრი მაურო ვერონელი პოლონეთის ქალაქ ბერდიჩევში გარდაიცვალა. ამ ამბით შეწუხებულმა პოლონეთის პროვინციის კაპუჩინთა უფროსმა პატრიმა პაჩიფიკუსმა ერეკლეს წერილების წალება ვენაში დაავალა კაპუ-

ჩინელ პატრებს – ვოლფგანგსა და ჰილარიუმს თავის სა-რეკომენდაციო წერილთან ერთად.

ვოლფგანგმა და ჰილარიუმმა ერეკლეს წერილები ვე-ნაში იმპერატორის კარს ჩააბარეს, მაგრამ აქ ქართული არავინ იცოდა და გადაწყვიტეს რომში პროპაგანდა ფიდე-სათვის გადაეგზავნათ სათარგმნად. ავსტრიის კანცლერმა კაუნიტციმ 1783 წლის ივნისის ბოლოს ერეკლეს წერი-ლები რომში გადაუგზავნა რომის პაპის კარზე ავსტრიის სრულუფლებიან მინისტრს, კარდინალ ქსავერს, რომელ-მაც წერილების თარგმანის საქმე დაავალა პროპაგანდა ფიდეს კარდინალს ანტონელის. კარდინალი ყურადღებით მოეკიდა ამ საქმეს, მაგრამ წერილების თარგმნა დიდხანს შეყოვნდა. პროპაგანდა ფიდეს კოლეჯში იმ დროს ორი ქართველი ყმანვილი იყო, რომლებიც ქართულ ენას ფლობ-დნენ. 1783 წლის სექტემბერში ნათარგმნი წერილებიდან ერთი რომში, პაპთან დატოვეს, მეორე კი ვენაში გა-მოაგზავნეს.

როცა ვენაში გაიგეს წერილების შინაარსი და საქმის ვითარება, იმპერატორი იოსებ II-ის (1780-1790) ბრძანებით ავსტრიის ელჩის პეტერბურგში კობენცლის შეეკითხნენ, თუ რა ვითარება იყო საქართველოში შექმნილი და რა მდგომარეობაში იყო ერეკლე II. ამ დროს კი საქართველოს ბედი გადაწყვეტილი იყო. 1783 წლის 24 ივლისს დაიდო გეორგიევსკის ტრაქტატი, რომლითაც ქართლ-კახეთი მოექცა რუსეთის გავლენის ქვეშ.

ავსტრიის ელჩმა პეტერბურგში ყველაფერი ეს შეატყობინა ვენას და თან დაურთო გეორგიევსკის ტრაქტატი გერმანულ ენაზე. რუსებმა თავისი გაიტანეს.

ამრიგად, ერეკლე II-ის ცდა, რომ მიეღო ევროპიდან დახმარება, კვლავ ჩაიშალა. შორს მყოფი ევროპა ისევ არ

დაინტერესდა პატარა ქვეყნით. ამის მიუხედავად, ერეკლე II კვლავ აგრძელებდა კათოლიკე მისიონერთა მფარველობას, ისევე როგორც დედოფალი დარეჯან დადიანი და მისი ოჯახის წევრები. დარეჯან დედოფალმა კათოლიკე პატრიებს გორში აჩუქა სასახლეკარე ადგილი, სადაც მისიონერებმა გლახაკთა თავსესაფარი სახლები ააშენეს.

**აღა-მამად ხანის** დამანგრეველ შემოსევას 1795 წელს ვერც კათოლიკე პატრები გადაურჩნენ – დაინგრა და გადაიწვა მათი ეკლესია-მონასტრები.

ერეკლეს მემკვიდრის, გიორგი XII-ს (1798-1800) გარდაცვალებამდე რუსეთის იმპერატორმა ალექსანდრე პირველმა 1801 წელს ქართლ-კახეთის სამეფო გააუქმა, ბატონიშვილები და დედოფალი რუსეთში ძალით გადაასახლა, რათა ქართველებს საქართველოს სამეფოს აღდგენის იმედი აღარ ჰქონდათ და ევროპისკენ აღარ გაეხედათ.

### პირველი:

1. საიდან გაიცნეს ევროპელებმა ერეკლე II?
2. რაში გამოიხატებოდა ერეკლეს ევროპული ორიენტაცია?
3. რით დამთავრდა ერეკლე II-ს ევროპული მცდელობანი?

## §8 ილია ჭავჭავაძე საქართველოს ეპიკურიზაციის შესახებ

ქართული მწერლობა და კულტურა მხოლოდ ევროპის მენაპირე ქვეყნის კულტურა კი არაა, არამედ ევროპეიზმის შინაარსის განსაზღვრების მონაწილეც არის.

ისტორიამ ქართული კულტურა ბევრჯერ დააყენა აღმოსავლურსა და დასავლურს შორის არჩევანის წინაშე და არჩევანი ყოველთვის ევროპის სასარგებლოდ კეთდებოდა. ამას მოწმობს ქართული მწერლობის 1500-წლიანი ისტორია – აგიოგრაფიულიდან დღემდე.

ქართული კულტურა და მწერლობა ევროპულს მთლიანად ვერც ორსაუკუნოვანმა – ჯერ რუსულმა იმპერიულმა, მერე კი კომუნისტურმა რეჟიმმა ვერ მოწყვიტა.

ამის საუკეთესო დადასტურებაა თერგდალეულთა მოღვაწეობა ილია ჭავჭავაძის (1837-1907) მეთაურობით. ქართველმა თერგდალეულებმა იმპერიის რუსიფიკატორულ პოლიტიკას ქვეყნის ევროპეიზაციის სტრატეგია დაუპირისპირებს. თერგდალეულთა საერთო თვალსაზრისს გამოხატავდა სერგეი მესხი, როცა ასკვნიდა, რომ „ყოველგვარი ცოდნისა, განათლებისა ცხოვრების გაუმჯობესებისა და წარმატების წყარო ჯერჯერობით დასავლეთ ევროპა არის. ყველა ხალხი და, მათ შორის რუსეთიც, ამ წყაროს ეწაფებიან... თავისი თავისა და თავისი ქვეყნის წინ წაწევა მხოლოდ იმას შეუძლია, ვისაც ევროპის ცხოვრება და მეცნიერება კარგად და ჭეშმარიტად გაუცვნია“.

ევროპული ფასეულობანი დამყარებულია აქ მცხოვრები ხალხების ეროვნულ ფასეულობებზე, ამიტომ ილია ჭავჭავაძის მიერ შემუშავებული ეროვნული მოძრაობის პროგ-

რამა გულისხმობდა ენის, მამულის, სარწმუნოების შენარჩუნებას ეროვნული თვითშეგნების აღორძინებისა და ქართველი ხალხის მომზადების გზით იმ დროისათვის, როცა შეიქმნებოდა ხელსაყრელი საერთაშორისო ვითარება დამოუკიდებლობისათვის. მანამდე კი ქართველი ხალხის განვითარება ევროპეურიასთაციის გზით უნდა წარმართულიყო, უნდა მომხდარიყო მოწინავე ევროპული პოლიტიკური, სოციალურ-ეკონომიკური და კულტურული ფასეულობების დამკვიდრება ეროვნულ საწყისებზე.

ილიას მსოფლმხედველობას საფუძვლად უდევს „ქართული დვრიტა“ (მისივე სიტყვებია), თუმცა, ილიაზე დიდი გავლენა მოახდინა (ისევე როგორც სხვა თერგდალეულებზე) ფრანგ განმანათლებელთა და ევროპელ პროგრესულ მოღვაწეთა ნააზრევებმა.

**XIX** საუკუნის მეორე ნახევარში ევროპის კონტინენტზე მცხოვრები ჩაგრული ხალხების ეროვნულ-განმათავისუფლებელი მოძრაობის განსაკუთრებული აღმავლობა, მათ მიერ დამოუკიდებლობისათვის ბრძოლის პროცესში გამომუშავებული ხერხები და გამოცდილება სანიმუშო მაგალითად იქცა ილიას მეთაურობით შემუშავებული დიდი ეროვნული პროგრამის განხორციელების საქმეში: „აი, საგანი და აი გზაც მისდა მისაღწევად. აი, რისთვის უნდა მომზადეს ჩვენი ყმაწვილ-კაცობა, მთელის ევროპის მეცნიერებით და გამოცდილების ფარ-ხმალით შეჭურვილი, აი, რა მოედანი უნდა შემოიხაზოს თავისი მოქმედებისათვის და რა გზა უნდა ამოირჩიოს... ყმაწვილ-კაცობა. უნდა მომზადეს ბეჯითის და ზედმინევნის ცოდნითა, უნდა, რამდენადაც შესაძლოა, ძირეულად შეისწავლოს ევროპული მეც-

ნიერება, წინ გაიმძლვაროს ევროპის გამოცდილება და ამ თოფ-იარაღით შეუდგეს ჩვენი ქვეყნის საქმეს“.

ქართველობის მთავარ მიზნად და ორიენტირად კი ილია თვლიდა „ჩვენის დაცემული ვინაობის აღდგენას, ფეხზე დაყენებას და დაცვას ყოვლის მოსალოდნელის ფათერაკისაგან.... რათა ჩვენი თავი ჩვენადვე გვეყუდნეს“. ამ მიზნიდან გამომდინარეობდა მისი მისწრაფება, საფუძვლიანად შეესწავლა უცხოეთის ჩაგრული ხალხების ისტორია, მათი სამართლიანი ბრძოლა სოციალური და ეროვნული ჩაგვრის წინააღმდეგ და ყოველივე სასარგებლო საქართველოს სინამდვილეში გამოყენებინა.

აქვე უნდა აღინიშნოს, რომ **ქართველ სამოციანელებს** ევროპის გამოცდილება ბრმად არ გადმოჰქონდათ და მას „კრიტიკის ცეცხლში აფოლადებდნენ“ (ილია).

მის მიერ დაარსებულ გაზეთ „ივერიის“ ერთ-ერთ საპროგრამო სტატიაში ილია წერდა, რომ „საზოგადოებამ პსცნონ აუცილებელი საჭიროება უცხო ხალხთა ცხოვრების გაცნობისა, დაინახა, რომ თავისი ბედი და უბედობა ბევრად დამოკიდებულია უცხო ხალხთა ბედსა და უბედობაზედ; დაინახა, რომ ხალხთაშორისი მისვლა-მოსვლა, ურთიერთის გაცნობა, ძლიერი საშუალებაა ხალხის წინ ფეხის წადგომისათვის, ცხოვრების უკეთ მოწყობისათვის. რომ ყველა გაზეთმა ანუ უურნალმა უნდა შესაბამისი ადგილი მისცეს და ლირსეული ყურადღება მიაქციოს. უცხო ხალხთა ცხოვრებას და მდგომარეობას, თუ სურს სხვის მაგალითით თვით-ცნობა გაუადვილოს საზოგადოებას, ბედნიერების გზა აპოვნინოს, უბედურების მიზეზი მოასპობინოს, იმიტომ, რომ ყოველ ამისათვის მაგალითი და ცნობანი სხვათა ცხოვრებაში აუარებელია ამ სახით სამაგალითო და ლირ-

საცნობ საგნად წარმოგვიდგება სხვათა შორის უცხო ხალხთა საპოლიტიკურ ცხოვრებაცა“.

ილია ყურადღებით ადევნებდა თვალყურს ეროვნულ-განმათავისუფლებელ მოძრაობას ევროპაში. მას აღაფრთოვანებდა ირლანდიელი ხალხის გმირული ბრძოლა ინგლისელი კოლონიზაციონების წინააღმდეგ, ასევე იტალი-ელთა დიდი მოძრაობა სამშობლოს გაერთიანებისა და ავსტრიელ დამპყრობთა განსაღევნად. როდესაც 1860 წელს გარიბალდიმ აიღო მესინა და გადმოვიდა იტალიაში, ილიამ ამ მოვლენას უძღვნა უმშვენიერესი ლექსი: „მესმის, მესმის სანატრელი, ხალხთ ბორკილის ხმა მტვრევისა“.

ილია იმდენად იყო შთაგონებული და გატაცებული იტალიელი ხალხის პატრიოტული ბრძოლით, რომ იგი ერთხანს ფიქრობდა ვოლონტერად წასვლას გარიბალდის-თან იტალიელი ხალხის დასახმარებლად. იგი ბოლომდე დარჩა გარიბალდის თაყვანისმცემლად და მისი პორტრეტი ამშვენებდა ილიას სამუშაო ოთახს სიცოცხლის ბოლომდე. ილია გატაცებით კითხულობდა და ეუფლებოდა შექსპირს, დიკენსს, გოეთეს, შილერს, დეკარტს, ბეკონს, „ათენის რესპუბლიკის ისტორიასა“ და „მსოფლიო მექანიკურ თეორიას“, ფრანგი განმანათლებლების, გერმანელი ფილოსოფოსების (მაგ.: ჰეგელის) ნაშრომებს, ხშირი მკითხველი იყო ილიადასი, ასევე ლუკრეციუსის, ვირგილიუსის, ჰორაციუსის.

ილია ქება-დიდებით იხსენებს რომანტიზმის წინამორბედთა და რომანტიკული ლიტერატურის კორიფეთა. მემკვიდრეობას – რუსოს „ახალ ელიოზას“, გოეთეს „ვერთერს“, ბერნანდეს დე-სენ-პიერის „პოლ და ვირუინის“, ბაირონის პოემებს, მათთან ერთად ალექსანდრე ჭავჭავაძეს,

გრიგოლ ორბელიანს და განსაკუთრებით ნიკოლოზ ბარათაშვილს. მათ მიერ დანერგილ მხატვრულ გეზს იღია ნათლავს სპეციფიკური სახელწოდებით „ევროპეიზმი“ და ამ თვალსაზრისით მათ უახლოეს წინამორბედად დავით გურამიშვილს აცხადებს.

„ევროპეიზმი“ იღიას, პირველ რიგში, ესმის, როგორც მხატვრული სიახლე („ევროპიული გამოთქმა“), რომელიც ძველ სპარსულ-აღმოსავლურ ფორმას უპირისპირდება.

ევროპული წესის ერთ-ერთი უმთავრესი პრინციპია საკუთარ თავზე პასუხისმგებლობის აღება – როცა თავად წყვეტ საკუთარ პრობლემებს და სხვისი ხელის შემყურეარა ხარ. იღიას აზრით, ერის სულიერი და ხორციელი აღორძინება უპირველესად შინაგანი ძალებით არის შესაძლებელი და არა მხოლოდ „უცხოური დახმარებებით“: „გვეყო, პატონებო, ჩვენი აწმყოს და მომავლის ბედის სხვაზედ მიგდება. ჩვენი გაჭირვების, გულისტკივილის და წადილის პატრონნი ჩვენვე უნდა ვიყვნეთ, მძიმეა ეს ულელი, მაგრამ მით უფრო სახელვანია მისი ერთგული გამწევი. მძიმეა, მაგრამ უმაგისოდ ვერ შოებულა ამ ქვეყანაზედ სიკეთე და ძალ-ლონე ხალხისა, სხვა გზა არ არის, ჩვენის ცხოვრების შარაგზა ჩვენვე უნდა გავიკაფოთ, ბედი და უბედობა ხელთ ვიგდოთ“. ამასთან, იღია თვლიდა, რომ უცხოური, დროში გამოცდილი და გასინჯული იდეების შეჯვარებაც არ იქნებოდა ურიგო ადგილობრივ ხერხთან და მცდელობასთან: „ყოველი ცვლილება, საზოგადოებრივი თუ ეკონომიკური, მაშინ არის მარგებელი და მკვიდრი, როცა ცვლილების საგანი ყოველმხრივ გასინჯულია და შუქმოფენილი, ამისათვის, რასაკვირველია, ყველაზე უწინარეს, კაცმა გონება უნდა მიაქციოს ადგილობრივს ვითარებას, რადგან ყო-

ველს საგანს ამ შემთხვევაში თავის ადგილზევე აქვს სათავე, თავისი ძირი და თავისი გზა მსვლელობისა და განვითარებისა. მაგრამ ძალიან შესცდება ის, ვინც მარტო ამას დასჯერდება და მარტო აქედან გამოიყვანს თავის დასკვნას“.

ილია ჭავჭავაძემ საქართველოში საფუძველი ჩაუყარა სწორედ ევროპისათვის დამახასიათებელ „საერთო ნიადა-გის“ თეორიას (ილია ამას წოდებათა შერიგებას უწოდებ-და), რომელიც შემდეგ განავითარა და გააღრმავა **არჩილ ჯორჯაძემ**. ამ თეორიის ქვაკუთხედი ასე ჩამოაყალიბა ილიამ: „ჩვენი გულითადი რწმენა ყოველთვის ისა ყოფილა და არის, რომ ერის წარმატება, ქონებრივი თუ გონებრივი, შესაძლებელია მხოლოდ მაშინ, როცა ერი წოდებათა დაუ-ყოფლად, დიდპატარაობის გაურჩევლად და გამოუკლებ-ლად ერთიანის მეცადინეობითა და გარჯით ცდილობს ცხოვრების გზა გაიკვალოს და ბურთი ბედისა კაიტანოს წუთისოფლის მოყდნიდამ ყველამ ერთად, საყოველთაოდ“.

ილიას მიაჩნდა, რომ სანამ ერი მთლიანი და ერთიანია, იგი უძლეველია; როცა ერში იწყება „განოვითეულობა“, იგი გარდაუვალი დაღუპვის წინაშე აღმოჩნდება: „ვაი იმ ხალხს, რომელსაც საერთო ძარღვი გაუწყდა; ვაი იმ ქვე-ყანას, საცა საერთო ძარღვში სისხლი გაშრა, საცა ყველაში თითო არ არის, თითოში – ყველა, საცა თითოეული ყველა-სათვის არ ფიქრობს და ყველა თითოეულისათვის, საცა „მე“ ხშირია, „ჩვენ“ – იშვიათი... ყველამ ერთად და თითოე-ულმა ცალკე უნდა იცოდეს, რომ იგი განუყოფელი ნაწი-ლია მთელი ერისა და ამიტომაც თავის კეთილდღეობას უნ-და ეძებდეს ერის კეთილდღეობაში და არა ცალკე“.

ილია ჭავჭავაძე დიდი ეკროპელი მოაზროვნების მსგავსად სახელმწიფოს და საზოგადოების წყობის საფუძვლად სამართლიანად თვლიდა კერძო საკუთრებას და მისი დაცვის აუცილებლობაზე მიუთითებდა ქართველობას: „კერძო საკუთრება ჯერ კიდევ ქვაკუთხედად უდევს არამცოუ მთელს სახელმწიფიურს და საზოგადოებრივ წყობას, არამედ მთელს ცხოვრებას დაწინაურებული ქვეყნიერებისას მთელ დედამიწის ზურგზე... კერძო საკუთრება, სამართლიანად თუ უსამართლოდ, ჩვენდა საბედნიეროდ თუ საუბედუროდ, ჯერ კიდევ დიდ ხანს იქნება დიდ პატივში და მის სარბიელზე ძალმომრეობა, ერთმანეთზე მისევა, ვინც გინდ იყოს, იაფად არ დაუჯდება“.

ძალზე საინტერესო და ტევადია ერის და მისი ნიშნების ილიასეული თვალთახედვა. ი. ჭავჭავაძის აზრით, ერი ესაა ენის, ტერიტორიის, ეკონომიკური წყობის ერთობისა და ერთიანი ბუნებით განსაზღვრული სულისა და ხორცის (ფსიქიკური წყობა, კულტურა და ა.შ) ადამიანთა ისტორიულად ჩამოყალიბებული კავშირი. ხალხის ერებად ჩამოყალიბება და არსებობა წარმოუდგენელია ერთიანი ენის არსებობის გარეშე: „არსებითი ნიშანი ეროვნებისა, მისი გული და სული ენაა“, – წერდა ილია. ესაა ასევე „ისტორიის ერთობით“ განმტკიცებული ადამიანთა გვარტომობითი კავშირი, ანუ „ერი როგორც კრებული ისტორიით შედაბებულ ერთ-სულ და ერთ-ხორც მკვიდრთა“ ერთობაა. ილია ამ ნიშანს (ისტორიულ ერთობას) გადამწყვეტ მნიშვნელობას ანიჭებს, რადგანაც „ერის პირქვე დამხობა, გათახსირება, გაწყალება იქიდამ დაიწყება, როცა იგი თავის ისტორიას ივიწყებს, როცა მას ხსოვნა ეკარგება თავისი წარსულისა, თავისის ყოფილ ცხოვრებისა“. ასეთი

ერი უბედურია, რადგან მას „რა იყო – ის დავიწყებული აქვს და, მაშასადამე, რა არის – არც ის იცის... შვილმა უნდა იცოდეს სად და რაზედ გაჩერდა მამა, რომ იქიდამ დაიწყოს ცხოვრების უღელის წევა“.

ილიას აზრით, ევროპეიზაციის გზაზე დასადგომად სულიერებაზე უფრო მეტი ზრუნვაა საჭირო („ჩვენში ხორციელი თვალი უფრო მოქმედებს, ვიდრე თვალი სულისა“), ქართველობა უნდა გათავისუფლდეს დამპყრობელთაგან გადმოლებული ბევრი ულირსი ჩვეულებისაგან: „ჩვენ საწყალ ქართველებს, – წერდა იგი, – ერთი სხვა საძაგელი სენიც გვჭირს – ყიზილბაშობა, გულის შემაზრზენი, კაცის ლირსების დამამდაბლებელი პირფერობა, ურცხვი ტყუილი, ქება, საძაგელი კლაკვნა და პირიდან თაფლის დენა, რომელსაც ქართველი „ზრდილობას“ ეძახის, – ესენი ერთად შტოები არის დამპალ ყიზილბაშობისა“.

ასევე ევროპული ტრადიციით ილია სარწმუნოებრივი თავისუფლების პატივისმცემელი იყო და თვლიდა, რომ „სარწმუნოება სინდისის, სასოების საქმეა, აქ ყველა თავისუფალია და ხელშეუხებელი“. ილია ასევე წინააღმდეგი იყო დიქტატორული მმართველობის, რომელიც სპობს ყოველგვარ თვითმმართველობას და ადგილობრივი საქმეების გამგებლობასაც ცენტრს უმორჩილებს, იმონებს ადამიანებს.

ერის გაძლოლის და დარაზმვის, მისი გაევროპელების საქმეში ილია დიდ როლს ანიჭებდა ქვეყნის ხელისუფლებას, მთავრობას, მის ზნეობას და კომპეტენტურობას, ხალხისადმი პასუხისმგებლობას: „ლირსება და სიკეთე რომელიმე მთავრობისა, ხალხისაგან ცნობილი და აღიარებული, სთესავს ხალხში იმ სიყვარულის თესლს, რომელიც მეტად

სანატრელი უნდა იყოს ცნობიერად მიმართულ სახელმწიფოსათვის; და მარტო ეს სიყვარულია სათავედ ყოველ იმისა, რაც შეადგენს სახელმწიფოს ძალას და ღონეს, იმიტომ რომ მარტო სიყვარულით გულგამთბარ ხალხს შეუძლიან სიცოცხლისა და ქონების განირვა სახელმწიფოს კეთილდღეობისათვის; საცა ეს სიყვარული არ არის, იქ სახელმწიფო ფულუროა, ფუყეა, ერთი ლაზათიანის ქარის შემობერვა და იმის გადამსხვრევა ერთია“.

ილიას ისიც კარგად ესმოდა, რომ ამ საქმეში მარტო მთავრობის და მის მოხელეთა იმედად ყოფნა არ შეიძლებოდა; იგი ასევე დიდ პასუხისმგებლობას აკისრებდა ქვეყნის ინტელექტუალურ ელიტას, რომელიც პასიურობას იჩენდა: „ვისაც ზნეობრივი და გონებრივი ძალ-ლონე აქვს ნინ ნაუძლვეს თავის საკუთარი ქვეყნის ცხოვრებას, განზედა დგას. იქნება ამის მიზეზი ჩვენი ცხოვრებაც არის, მით უფრო ბევრ სიამოვნებას და ხელის შეწყობას არ უქადდეს, მაგრამ ქვეყნის სამსახური ყველგან მსხვერპლია და არა სეირი. ამ შემთხვევაში დგომა – ცდომა“.

როცა ილია იკვლევდა, თუ რამ გააძლებინა ჩვენისთანა პატარა ქვეყანას დიდ იმპერიებთან და უთანასწორო ძალებთან ჭიდილში, იგი მივიდა იმ დასკვნამდე, რომ ჩვენი გადარჩენის მიზეზი იყო დროთა შესაფერისი ხერხისა და ცოდნის ფლობა: „ვიცოდით იმ დროს რა უნდოდა, რა იყო მისი ციხე-სიმაგრე, მისი ფარ-ხმალი. ვაუკაცობა უნდოდა, ვაუკაცნი ვიყავით, ხმალი უნდოდა, ხმლის ჭედვა ვიცოდით. ომის საქმეთა ცოდნა უნდოდა, ომის საქმენი ვიცოდით. აი, რამ შეგვაძლებინა, რამ გვიხსნა, რამ შეგვინახა!.. იმ დროთა ჩარხზე გაჩარხულნი ვიყავით, იმ დროთა ქარ-ცეცხლში გამოფოლადებულნი, იმ დროთა ნაჭედნი... უეჭველია ჩვე-

ნი ეკონომიკური წყობა ისეთი ყოფილა, რომ ხალხს იქიდაშ ჰქონია ის გონიერობითი ძალ-ღონე, რომლითაც იგი გასძლოლია ამოდენა ვაივაგლახსა და ომებსა ამოდენა ხნის განმავლობაში“.

სწორედ დროთა შესაფერისი ცოდნის დაუფლების აუცილებლობიდან გამომდინარე მოუნოდებდა ილია ქართველობას თანამედროვე საბაზრო ეკონომიკის იმ პრიციპების დანერგვისაკენ, რომლის სამშობლოც ევროპაა: „ეხლა ან ადლი უნდა გვეჭიროს ხელში, ან გუთანი, ან ჩარხი ქარხნისა, ან მართულები მანქანისა. ეხლა ვაუკაცობა ომისა კი არ უნდა, რომ სისხლსა ჰლვრიდეს, ვაუკაცობა უნდა შრომისა, რომ ოფლი ჰლვაროს. კიდევ ვიტყვით, ქვეყანა ახლა იმისაა, ვინც ირჯება და ვინც იცის წესი და ხერხი გარჯისა, ვინც უფრო უფრთხილდება ნაშრომს, ვინც იზოგავს ნაღვანს. დღეს მძლეოთამძლეა მარტო ის, ვინც მცველია და ბეჭითი სულითა და ხორცითა, ცოდნითა და მარჯვენითა, ეხლაც ომია, ხოლო სისხლის ღვრის კი არა, ოფლის ღვრისა, ომი უსისხლო, მშვიდობიანი, წყნარი – ეს ომი შრომისაა და ვითარცა შრომა – პატიოსანია, ნამუსიანია და ისეთივე თავმოსაწონებელი, თავგამოსაჩენი, როგორც უწინ თოფისა და ხმლის ომი იყო. ვაუკაცობა ამისთანა ომში ბევრით წინ არის სისხლის ომის ვაუკაცობაზე“. ილიას თქმით, ამ საკითხის არგათვალისწინება დაღუპვას უქადა ქვეყანას (და უქადის ახლაც): „ხმლიანმა მტერმა ვერ დაგვათმობინა, ვერ წაგვართვა ჩვენი მიწა-წყალი, ჩვენი ქვეყანა... ხმლით მოსეულმა ვერა დაგვაკლო რა, შრომით და გარჯით, ცოდნით და ხერხით მოსეული კი თან გაგვიტანს, ფეხქვეშიდან მიწას გამოგვაცლის, სახელს გაგვიქრობს, გაგვწყვეტს. სახსენებელი ქართველთა ამოიკვეთება და

ჩვენს მშვენიერ ქვეყანას, როგორც უპატრონო საყდარს, სხვები დაეპატრონებიან“.

1889 წლის 25 ოქტომბერის სტატიაში („ივერია“) „ევროპის მილიტარობა და ამერიკის მერმისი“ ილიამ ინინას-ნარმეტყველა აშშ-ის მომავალი მსოფლიო ლიდერობა, რის საფუძველს იგი სახელმწიფოთა (შტატების) ძმურ კავშირში ხედავდა: „რაც დრო მიდის, ევროპაში უფრო და უფრო ძლიერდება ერთა შორის დაუნდობლობა (რასაც ორი მსოფლიო ომი მოგყვა კიდეც ევროპაში – ვ. შ.) და მძულვარება... ამერიკის სახელმწიფოთ აზრად აქვთ სახელმწიფოთა ძმური კავშირი დაადგინონ, რისთვისაც ქ. ნიუ-იორკში კონგრესი შეიკრიბა, სადაც ლაპარაკი იქნება, თუ რა პირობებითა და საშუალებებით უნდა შეერთდნენ ამერიკის სახელმწიფონი, ისე, რომ არც ერთი სახელმწიფო ამერიკისა არ დაიჩაგროს“.

### პირველი:

1. რა დაედო საფუძლვად ილია ჭავჭავაძის მსოფლმხედველობას?
2. რას გულისხმობდა ილია „ევროპეიზაციაში“?
3. როგორი ევროპული ფასეულობები უნდა დანერგილიყო საქართველოში ილიას თვალთახედვით?

## §9 ნიკო ნიკოლაძე ეპროაული ფასაულობების შესახებ

თერგდალეულთა ახალმა თაობამ (ნ. ნიკოლაძე, გ. წერეთელი, კ. ლორთქიფანიძე და სხვ.) შეძლო ქართველი ერის ისტორიაში ახალი ბილიკების გაკვალვა: „ამ ახალი თაობის საქებრად უნდა ვთქვათ, რომ ეს ახალი გზა იმათ მალე მონახეს, ეს გზა – დასავლეთ ევროპის გზა არის“ (ნ. მესხი).

უდიდესი ქართველი მოაზროვნე ნიკო ნიკოლაძე (1843-1928) ერთ-ერთი პირველთაგანი იყო, რომელმაც დასავლური, ევროპული შეხედულებანი ჯერ კიდევ 1870-იან წლებში არა მარტო იქადაგა, არამედ მათი პრაქტიკულად განხორციელებაც დაიწყო. ის იყო ევროპული პრაგმატიზმისა და საქმიანობის, პოლიტიკური რეალიზმის, ევროპული განათლებისა და ტექნიკის, კულტურისა და ნოვაციის უპირველესი დამნერგავი საქართველოში.

ევროპამოვლილი და საკაცობრიო კულტურას ნაზიარები ნიკო ნიკოლაძე თავისი ბუნებით იყო ჭეშმარიტი ქართველი მოაზროვნე და პატრიოტი. ფართო განათლებისა და რუსულ-ევროპული ენების საუცხოო ცოდნის წყალობით ნიკო ნიკოლაძე რუსეთისა და ევროპის საზოგადოებრივი ცხოვრების არა მარტო მეთვალყურე, არამედ აქტიური მონაწილე იყო, თუმცა მთელი ცხოვრება საქართველოს ემსახურა.

დასავლეთ ევროპის პროგრესულ აზროვნებას მან ქართული ნიადაგი შეუფარდა და შექმნა ღრმად ეროვნული სოციალურ-პოლიტიკური კონცეფცია: „არც ერთ მაშინდელ ჩვენს მოღვაწეს არ უგრძვნია ეპოქის სული ისე, როგორც ნ. ნიკოლაძე, იგრძნო, – წერდა სიმონ ხუნდაძე, –

არავის არ მოუტანია ჩვენში იმდენი პროგრესული და ევროპული აზრი (ამ სიტყვის კულტურული მნიშვნელობით), რამდენიც შემოიტანა ნ. ნიკოლაძემ.

**გერონტი ქიქოძეს** ნიკო ნიკოლაძე მიაჩნდა ევროპული აზროვნების პირველ წარმომადგენლად საქართველოში. ნიკო ნიკოლაძე იყო პირველი ქართველი, რომელმაც ევროპაში (ციურიხში) დაიცვა სადოქტორო დისერტაცია და მიიღო ფილოსოფიის დოქტორის წოდება აქტუალური თემისათვის „განიარაღება და მისი სოციალურ-ეკონომიკური შედეგები“, რომელიც შემდეგ ფრანგულ ენაზე დაიბეჭდა უნივერსიტეტის (ჯერ კიდევ როდის განჭვრიტა განიარაღების აქტუალობა). დღეს, როცა ქვეყნები მთლიანობაში ტრილიონობით დოლარს ხარჯავენ შეიარაღებაზე, ყოველწლიურად იარაღის ბიზნესს 800 მილიარდი მოგება მოაქვს. ამ დროს კი შიმშილით ყოველწლიურად 8 მილიონი ადამიანი იღუპება – 4 კაცი 1 ნამში).

1860-1870-იან წლებში ნიკო ნიკოლაძემ რამდენიმე წელი დაპყო ევროპაში. იგი პირველი იყო, ვინც ქართველი ქალები ევროპაში წაიყვანა განათლების მისაღებად და ახალი იდეების გასაცნობად. ნიკოლაძეს ახლო ურთიერთობა ჰქონდა დასავლეთ ევროპის გამოჩენილ მწერლებთან და მოლვანეებთან, მეცნიერებთან.

ნიკო ნიკოლაძე კარგად იცნობდა ლუი ბლანს. იგი გაბედულად აკრიტიკებდა ლუი ბლანის შემრიგებლურ პოლიტიკას და გამოხატავდა სიმპათიას პარიზის კომუნის იდეებისადმი. ნიკოლაძეს მიმოწერა ჰქონდა ცნობილ ფრანგ საზოგადო და პოლიტიკურ მოლვანესთან, მწერალ ანრი როშფორთან.

პარიზში ყოფნისას ნიკო ნიკოლაძემ დაწერა გამოკვე-  
ლევა „დეკადენტური პრესა“ (1875 წ. ფრანგულ ენაზე),  
რომელსაც საკმაოდ მნიშვნელოვანი გამოხმაურება მოჰყვა  
საფრანგეთის პოლიტიკურ წრეებში. წიგნი ძლიერი მოს-  
წონებია ცნობილ ფრანგ პუბლიცისტს ემილ შირარდენს,  
რომელმაც თავისი შთაბეჭდილებანი პოპულარულ გაზეთ-  
ში გამოაქვეყნა. ამ წიგნის გამო მას წერილები გაუგზავნეს  
ლუი ბლანმა და ცნობილმა პუბლიცისტმა და ეკონომისტმა  
ივ გიორგ. ეს უკანასკნელი ნიკოლაძეს ქება-დიდებას ასხამ-  
და და ეთანხმებოდა საფრანგეთის პრესის შეფასებაში. ივ  
გიორგი წერდა ნ. ნიკოლაძეს: „დვირფასო ბატონო თანამოძმევა!  
ძალიან მაღლობელი ვარ თქვენი უაღრესად საინტერესო  
ბროშურის „დეკადენტური პრესის“ გამოგზავნისათვის.  
არასგზით არ შეიძლება წარმოვიდგინოთ, რომ იგი დაწე-  
რილია „უცხოელი უურნალისტის მიერ“. ძალიან ცოტა  
ფრანგი უურნალისტი შესძლებდა მის დაწერას ასეთი  
ენით, ასეთი სიძლიერით და სისწორით. თქვენი საყვედუ-  
რების უმეტესობა ფრანგული პრესის მიმართ მართებუ-  
ლია... ნიკო ნიკოლაძე თავის წიგნში იცავდა პრესის თა-  
ვისუფლების პრინციპს და ილაშქრებდა მოსყიდვისა და  
ძალადობის წინააღმდეგ, რაც ასე აქტუალურია კვლავ თა-  
ნამედროვე მსოფლიოში. სხვადასხვა დროს ნიკო ნიკოლაძე  
თანამშრომლობდა ქართულ, რუსულ და ევროპულ 17 უურ-  
ნალსა და 19 გაზეთში, წერდა რამდენიმე ენაზე.

ნიკო ნიკოლაძეს კარგი ურთიერთობა ჰქონდა ვიქტორ  
პიუგოსთან, ემილ ზოლასთან, უან უორესთან, ალფონს დო-  
დესთან, ერკმანსა და შატრიანთან, პოლ ლაფარგთან და  
მის სიმამრთან, მსოფლიოში ცნობილ კარლ მარქსთან (რო-  
ცა მარქსმა პოლ ლაფარგისა და ნ. უტინის საშუალებით

მიმართა ნიკოლაძეს, რომ ყოფილიყო ამიერკავკასიის წარმომადგენელი | ინტერნაციონალში, მან ეს ნინადადება უარყო იმ მოტივით, რომ კავკასიაში მარქსის მოძღვრების გავრცელება ნაადრევიაო და უარყო ზოგიერთ ქვეყანაში მარქსის მოძღვრების გამოყენების შესაძლებლობა).

ნიკო ნიკოლაძემ თავისი მეგობრის **ლევ მეჩინიკოვის** საშუალებით ახლო კონტაქტი დაამყარა იტალიის ეროვნულ-განმათავისუფლებელი მოძრაობის ლიდერთან გარიბალდისთან.

ნიკო ნიკოლაძე საქართველოში ეწეოდა ევროპული, დემოკრატიული იდეების პროპაგანდას. იგი გადაჭრით მოითხოვდა საარჩევნო ცენზის გაუქმებას და მცხოვრებთა მთელი მასის (კაცები, ქალები) მონაწილეობას თვითმმართველობასა და არჩევნებში და საქალაქო თვითმმართველობის სათავეში მონინავე ინტელიგენციის დაყუნებას, შეკრებებისა და პოლიტიკური გაერთიანებების თავისუფლებას. ერთა თანასწორუფლებიანობას, ებრძოდა უკიდურეს ნაციონალიზმსა და შოვინიზმს. იგი იმავე დროს მტკიცედ იცავდა საქართველოს ეროვნულ ინტერესებს, იერიში მიპქონდა ყველა იმათ ნინაალმდეგ, ვისაც სურდა საქართველო დასავლეთ ევროპის ან რუსეთის პოლიტიკური ამ ეკონომიკური ჩაგვრის ობიექტად გადაექცია. იგი ევროპაში ბევრ მისაბაძთან ერთად მრავალ ნაკლოვანებას ხედავდა, რასაც დაურიდებლად აკრიტიკებდა: „ევროპიელი ხალხი, – წერდა იგი, – ჩვენთვის ერთობ საჭიროა გავიგოთ გონებაში ჩავიბეჭდოთ და ნიადაგ გვახსოვდეს ეს გარემოება, – ევროპიელი ხალხი-მეთქი სწორედ იმ თვალით უყურებს ყოველ სხვა უკან-ჩამორჩენილს, უძლურს და უმეცარ ხალხს, როგორითაც ჩვენ თვითონ ცხვრის ფარას დავცემ“.

რით. როდი ჰგონია, რომ ეს აზიელი, გინდ აფრიკელი ადა-  
მიანი ლვთისაგან დანაბადია, გრძნობების პატრონია,  
ტვინის მქონეა“.

ნიკო ნიკოლაძე ევროპული ტრადიციით განვითარების  
ეროვნული მოდელის შექმნას უჭერდა მხარს უცხოური  
აპრობირებული, დადებითი გამოცდილების გამოყენების  
გათვალისწინებით და თვლიდა, რომ შეუძლებელი იყო  
უცხოელს, ქართული სპეციფიკისა და რეალობის არმცოდ-  
ნეს, ქვეყნისათვის ზუსტად მისადაგებელი განვითარების  
რეცეპტი მოენახა – ის, რაც ქართველის გასაკეთებელი  
იყო, მას უცხოელი თავს ვერ მოაბამდა და ვერ გააკეთებდა:  
„ჩვენი ქვეყნის გონიერივი ზრდისათვის, – წერდა იგი, –  
დიდი უბედურებაა ის გარემოება, რომ დედის ძუძუთი კი  
არ ვიკვებებით, ცხრა მთას გადაღმიდან მოყვანილ მთას  
ვაბარივართ. ისიც ხშირად თხის რძეს გვაწვევს და არა  
ადამიანისა... უცხოელი მთა, რაგინდ სალო იყო, შენს  
დედა-ენას ვერ გასწავლის, შენი ქვეყნის ბუნებასა და  
საჭიროებას ვერ გაგაცნობს“.

ევროპაში ნაცხოვრები ნიკო ნიკოლაძე კარგად აცნო-  
ბიერებდა იმ ფაქტს, რომ ევროპული ქვეყნების ძლიერი  
მხარეები მათი სათანადო შინაგანი განვითარებიდან მიღი-  
ოდა. ამიტომ ანიჭებდა იგი პრიორიტეტს ქვეყნის შინაგანი  
საქმეების გონივრულად მოგვარებას: „მხოლოდ შინაგანი  
საქმეების გონივრულად და დამაკმაყოფილებლად მოგვა-  
რება უზრუნველყოფს გარედან მოსალოდნელი საშიშროე-  
ბის განეიტრალებას და მოგვიტანს საგარეო დიდებას. რა  
დიდიც არ უნდა იყოს ჩვენი გამარჯვებები, მათი დიდება  
კვამლივით გაიფანტება, თუკი ჩვენს საკუთარ სახლში არ  
დავაკმაყოფილებო აუცილებელ მოთხოვნებს, თუკი ხელს

მივყოფთ საკუთარი ინტერესების სისტემატურ იგნორირებას, შევუძლით ჩვენს თავს მრავალ ხელოვნურ სიძნე-ლეს, მაშინ ეს გარემოება ადრე თუ გვიან სამხედრო წარმატებებზეც კი უდაოდ დამასუსტებელ გავლენას იქონიებს“.

ზემოთ აღნიშნული დებულების ქართული საზოგადოებისათვის დასამტკიცებლად ნიკო ნიკოლაძემ კარგად შეისწავლა და გააანალიზა XIX საუკუნის მეორე ნახევრის იაპონიის ე.წ. „მეიძის რევოლუციის“ პერიოდი (სტატიაში „იაპონიის ბრძოლა ჩინეთთან“), რომლის დროს ქვეყანამ დაიწყო და სწრაფად შეძლო უზარმაზარი თვისობრივი ნახტომის გაკეთება ცხოვრების ყველა სფეროში. კარგად გააცნობიერა რა თავისი პასუხისმგებლობა საკუთარი ერის წინაშე, იაპონიის გონიერმა მთავრობამ და მმართველმა ელიტამ დასახა ქვეყნის მომავალი პოლიტიკური და სოციალური მოწყობის მეცნიერული გეგმა, რომლითაც ახალი საზოგადოებრივი ცხოვრების საწყისად და ბალავრად დადებული იყო საკუთარი ხალხის კულტურული მემკვიდრეობა, ტრადიციები და წეს-ჩვეულებები, იაპონური ცხოვრების წესის მდიდარი ეროვნული შინაარსი. ნიკო ნიკოლაძეს სამაგალითოდ მიაჩნდა მოკლე დროში ქვეყნის ასეთი ალორძინება და ილიასავით გონიერი მთავრობის აუცილებლობაზე და პასუხისმგებლობაზე მიანიშნებდა ქართველობას: „იაპონია ერთობ დიდ და ნათელ მაგალითს წარმოადგენს იმისას, თუ რა ადვილი ყოფილა თითქმის სრულიად ველური და უკან ჩამორჩენილი ხალხისათვის სწავლითა და რიგიანი წესით წელში გამართვა და ძალის შეძენა, როცა მას გონიერი მთავრობა ჰყავს და ბეჯითი სურვილი აქვს რიგიანი ადგილი დაიკავოს სხვა ერსა და

სამეფოებს შუა“: ნედლეულითა და სხვა სახის სტრატეგიული რესურსების სიმწირის მიუხედავად, იაპონიის ასე გაძლიერება, ნიკოლაძის სამართლიანი მოსაზრებით, შრომის ჭკვიანურმა ორგანიზაციამ და საშემსრულებლო დისციპლინის მაღალმა დონემ განაპირობა, რაც მას ასევე სანიმუშოდ მიაჩნდა. ნიკო ნიკოლაძე ამასთან დაკავშირებით ხაზს უსვამდა, რომ აქ გადამწყვეტი მნიშვნელობა როდი პქონდა ქვეყნის სიდიდესა და მოსახლეობის მრავალრიცხოვნებას, არამედ თანამედროვე ევროპული ტექნოლოგიების, სამეცნიერო-ტექნიკური პროგრესის სწრაფ დანერგვას: „ძალა და ძლევა რიცხვსა და სივრცეს კი არა, ცოდნას, ორგანიზაციას ეკუთვნის, იარაღს, წესს და დისციპლინას“ – წერდა იგი (და დღეს, მართლაც უზარმაზარ და ნედლეულით უმდიდრეს რუსეთზე წინ არიან პატარა ქვეყნები – შევიცარია, ბელგია, დანია და სხვ., რომლებმაც განავითარეს საწარმოო ძალები, ტექნიკა, ცოდნა და დისციპლინა).

ამრიგად, საქართველოს რომ რეალური დამოუკიდებლობა მოეპოვებინა, აუცილებელი იყო ის ევროპელი ქვეყნებივით ჯერ ეკონომიკურად ალორძინებულიყო, რის მთავარ პირობად, ნიკოლაძეს ილია ჭავჭავაძის დარად თავჩაუხრელი შრომა, თვითგანვითარება და სწავლა მიაჩნდა, ამასთან იგი თვლიდა, რომ „სანამ უმოქმედო ნაწილი ჩვენი საზოგადოებისა შრომას და თავის რჩენას არ შეეჩევა, სანამ ჩვენი ხალხი მეწველი ძროხის მდგომარეობიდან არ გამოვა, შეუძლებელია ჩვენში ნამდვილი ერთობა დაარსდეს, ან გულწრფელი ძმობა, ან ხეირიანი განწყობილება“.

ნიკო ნიკოლაძე აქცენტს აკეთებდა უმთავრესად საკუთარი რესურსებით და შრომით ქვეყნის განვითარების

აუცილებლობაზე და არა მხოლოდ უცხოელთა ფინანსურ  
და ეკონომიკურ დახმარებაზე, რაც არასად უანგაროდ  
არ ხდება: „ჯერ არსად, არც ერთ ქვეყანაში მაგალითი არ  
უნახავს კაცს, რომ რომელიმე ხალხი ან საზოგადოება  
ამაღლებულიყოს სხვისი დახმარებით, თუ არა საკუთარი  
შრომით და ჯანით. ადვილად შენაძენი, ნაპოვნი, ნაჩუქარი  
არც კერძო კაცს დააყრის ხეირს და არც მთელ საზოგადო-  
ებას. კაცისა და ქვეყნისათვის მარტო ის არის გამოსადეგი  
და ძვირფასი, რაც იმას თავისი საკუთარი შრომით, ოფ-  
ლისლვრითა და შრომით შეუძენია“.

ქვეყნის ეკონომიკური და სახელმწიფოებრივი აღორძი-  
ნებისა და აღმშენებლობის პროცესში ნიკო ნიკოლაძეს ასე-  
ვე აუცილებლად მიაჩნდა სხვისი მოიმედეობისა და აზიუ-  
რი ინერტულობის, იოლი გამდიდრების განწყობილების  
დაძლევა და მოითხოვდა ამგვარი ილუზიებისაგან დროუ-  
ლად გათავისუფლებას: „ჩვენს საზოგადოებაში, – წერდა  
იგი, – ყველა დარწმუნებულია, რომ შველა ერთ მშვენიერ  
დილას ჩამოფრინდება, ისე, რომ თვითონ ხელის განძრევაც  
არ დაგვჭირდება ჩვენი ბედის გაუმჯობესებისათვის“.

ნიკო ნიკოლაძე კარგად ხედავდა, რომ ქართველობა  
მრავალრიცხოვანი და ძლიერი მტრებით გარშემორტყმუ-  
ლი, ეული და მცირერიცხოვანი ერია და შესაბამის დასკვ-  
ნას აკეთებდა: „ჩვენ ჩვენი ვიმეცადინოთ, ჩვენი ქვეყნისათ-  
ვის ვიზრუნოთ. მარტო ჩვენი თავის იმედი ვიქონიოთ, მარ-  
ტო ჩვენს ძალას მივენდოთ, მარტო ჩვენს გაძლიერებასა და  
განათლებაზე ვიმუშაოთ, მაშინ მეგობარიც გაუჩნდება  
ჩვენს ხალხს და დამხმარებელიც“; ხოლო თუ ჩვენ კვლავ  
სხვის იმედსა და დახმარებაზე დავამყარებთ მომავალს და  
ხელს და ჭკუას არ გავანძრევთ, მაშინ კაპიტალიზმის ულ-

მობელი კანონების საფუძველზე ჩვენი მომავალი პერს-პექტივა ძალზე არასახარბიელო იქნება – მიაჩნდა ნ. ნიკოლაძეს და წერდა კიდეც მოურიდებლად: „ევროპის სახელმწიფოები საქართველოს ან ალუირივით (ე.ი. მკვიდრთათვის უფლება მიუნიჭებლად) დაიმონებენ ან ინდოჩინე-თივით ძარცვას დაუწყებენ“.

ნიკო ნიკოლაძე ეროვნული საქმეების გადაწყვეტის პროცესში გადაჭრით უარყოფდა ყოველგვარ რედიკალიზმს და თვლიდა, რომ „ქართველობის მიზნები მხოლოდ ზომიერების გზით მიიწევნება (მიიღწევა)“. მას ქართველთათვის მისაბაძად მიაჩნდა ევროპაში არსებულ თაობათა მემკვიდრეობითობის ის ოქროს წესი, რომლის თანახმად, ყოველი ახალი თაობა განძად თვლის ნინათაგან დატოვებულ მემკვიდრეობას და ზედ თვითონაც ართავს და ამატებს რასმე, რასაც მაშინდელ საქართველოში (და, სამნუხაროდ, არც დღეს) ადგილი არ ჰქონია.

ნიკო ნიკოლაძემ ერთ-ერთმა პირველმა ქართველ მოლვანეთაგან (დიმიტრი ყიფიანთან და ილიასთან ერთად) წინა პლანზე პრაქტიკული და პრაგმატიული საკითხები წამოსწია, რაც მთლიანად შეესაბამებოდა ქვეყნის განვითარების მოთხოვნებს. აი, როგორ აფასებდა მის მოლვანეობას უურნალი „კლდე“: „ნიკოლაძე და რუსეთში ნასწავლი ინტელიგენცია ორი ანტიპოდია, სულ სხვა ტიპი. ნ. ნიკოლაძე სულით და გულით ევროპელია, ევროპაში ნასწავლი, ევროპის იდეებით გამსჭვალული, ევროპის ტექნიკა-ინდუსტრიის მცოდნე, ინიციატივის კაცი, პრაქტიკული და საქმიანი. ჩვენი ინტელიგენცია კი უმთავრესად აღზრდილია რუსეთის სკოლაში, ამ მონური სულით, ჩინოვნიკური რუტინით და სოციალისტიკით გაუდენთილი. ამიტომ ჩვენი

ინტელიგენტები უმთავრესად არიან თეორეტიკოსები, მეოცნებები, აკადემიური მსჯელობის ხალხი. ამათი სფეროა თბილი კაბინეტი, რბილი სავარძელი, უნიადაგო თეორიული მსჯელობა, მეტაფიზიკური მორალი და სხვადასხვა პარტიულ-პოლიტიკური ოცნება, ფანტაზიები. ნიკოლაძე კი, უნინარეს ყოვლისა, მუშავია დაკაპინებული ხელებით, ცხოვრების ტექნიკი და ლაბორანტი. იგი რეალისტია, რეალური პოლიტის მწარმოებელი, ცხოვრების მცოდნე, მის ქარტეხილში ჩავარდნილი”.

ნიკო ნიკოლაძე მარტო სიტყვით როდი არწმუნებდა ვინმეს, არამედ მისთვის უმთავრესი იყო პრაქტიკული საქმე და ამადაც უნოდა არჩილ ჯორჯაძემ მას „ულმობელი საქმის კაცი“.

აი, რას წერდა თავისი პრაქტიკული მოღვაწეობის საწყის ეტაპზე ნ. ნიკოლაძე: „საჭიროდ ვთვლიდი შემძრაი ის ცხოველყოფელი ძალები, რომლის მოქმედება და ურთიერთობა ერს ზრდის, ამაღლებს, აძლიერებს, შევეხე ეკონომიკას, კრედიტს, მრეწველობას, მინისმფლობელობას და თვითმმართველობას... რამდენჯერ დაგვჭირდა დუშეთს ასვლა... ჭავჭავაძისათვის სახელმწიფო სამსახურზე ხელი აგვეღებინა, ბანკის დაარსება იერიშით აგვეღო, ბანკი განახლების ბანაკად გვექცია და შიგ ჭავჭავაძე ძალდატანებით ქართული საქმის სათავეში ჩაგვეყინებინა. თბილისის ქალაქის თავად სომხებს დიმ. ყიფიანი ავარჩევინეთ. ქუთაისს გრ. ლევაშოვთან აუნერელი ბრძოლის შემდეგ თვითმმართველობა შემოვაღებინება. ქართველობის ასპარეზი ხუთიოდე წელიწადში უცნობად გავაფართოვეთ“.

ნიკო ნიკოლაძე ილია ჭავჭავაძის მსგავსად საქართველოს მომავალ ბედს ჯერ რუსეთს უკავშირებდა, შემდეგ კი

დამოუკიდებლობის აღსადგენად (1918 წელის 26 მაისი) და მის შესანარჩუნებლად ყველაფერი გააკეთა. იგი სწორად შთააგონებდა ხელისუფლებაში მყოფ გამოუცდელ სო-ციალ-დემოკრატებს, რომ „როცა არ გვაძადია წარმოება და არც შემოსავალი, ვერ გვიხსნის ვერავითარი გადასახადი. წარმოების გაჩაღება არის ერთადერთი ჩვენი ხსნა. უნდა მოვახერხოთ გარეთ მეტი გავიტანოთ გასაყიდი, ვიდრე უცხოელს ვთხოვთ საყიდ საქონელს. სანამ მოსაზიდი (იმპორტი) მეტი გვექნება, ვინემ გასაზიდი (ექსპორტი), მონობას ვერ ავტოლდებით“.

ნიკოლაძე ერთ-ერთი პირველი იყო ქართველ მოაზროვნებში, ვინც ვაჭრობის, აღებ-მიცემობისა და კომერციის პროპაგანდა დაიწყო ევროპული, ცივილიზებული წესით და მისი ფასი კარგად იცოდა – ვაჭრობა ხომ წესრიგია, ანგარიშიანობა, ანყობილი საქმე, რელიგიასთან ერთად იგი ქვეყნის ერთიანობის მთავარი საძირკველია: „ვიდრე ჩვენი საზოგადოების უმრავლესობას სისხლსა და ხორცში ის რწმენა არ გაუჯდება, რომ საზიზლარი, სამარცხვინო, სათავილო ქვეყანაზე მარტო უსაქმურობა და მუქთა ჭამაა, მანამდე ნუ გწამთ ვითომ განათლების ანუ წარმატების მირონი მოგვეცხოს. ვაჭრობა შრომაა და ისევე პატივსაცემი, როგორც ყოველგვარი შრომა“ – წერდა იგი.

ნიკო ნიკოლაძეს უდიდესი წვლილი მიუძღვის ფოთის აღმშენებლობაში, პორტის ელექტროფიკაციასა და მექანიზაციაში (მან მოიარა ევროპის და აფრიკის დიდი პორტები და მიიღო შესაბამისი გამოცდილება). 1894 წლიდან იგი 4-ჯერ ზედიზედ აირჩიეს ფოთის ქალაქის თავად. ამ 20 წლის მანძილზე ფოთის ბიუჯეტი 10-ჯერ გაიზარდა. მან ფოთის

## პორტის ამოქმედებით ფანჯარა გაჭრა ევროპაში საქართველოსთვის.

უდიდესი შრომა გასწია მან ტყიბულის ქვანახშირის საბადოსა და ჭიათურის მანგანუმის წარმოების გასაფართოებლად. მან მოახერხა დიდი ბრიტანეთის სამეცო ბანკიდან კრედიტის აღება, გაიყვანა შორაპან-ჭიათურის სარკინიგზო ხაზი, რითაც მანგანუმის გადაზიდვის საქმეც მოაგვარა და გააიაფა კიდეც.

ნიკო ნიკოლაძე აქტიურად მონაწილეობდა თბილისის წყალსადენის მშენებლობაში, კახეთის რკინიგზისა და სურამის გვირაბის გაყვანაში, ფოთი-თბილისისა და ტრანს-ციმბირის რკინიგზის მშენებლობაშიც კი. მას საქმიანი ურთიერთობა ჰქონდა ევროპელ ბიზნესმენებთან – ფრანგ ებრაელთან როტშილდთან და შვედ მმებ ნობელებთან.

ნიკო ნიკოლაძემ ფოთის ქალაქის თავად ყოფნის პერიოდში დააარსა თანამედროვე ბანკი. ქართულ სინამდვილეში პირველმა ნიკოლაძემ დაბეჭდა ობლიგაციები, ლატარიის ბილეთები და მთელი შემოსავალი ქალაქის კეთილმოწყობას მოახმარა, რაც დიდად ნოვატორული და პრაქტიკული ნაბიჯი იყო მაშინდელ საქართველოში.

საქართველოს დამოუკიდებლობის პერიოდში (1918-1921) ნიკო ნიკოლაძემ გერმანელ დიპლომატებთან ოფიციალურ საუბარში ბერლინში წამოაყენა შესანიშნავი იდეა – ევროპის შორეულ აღმოსავლეთთან ვაჭრობის უმოკლეს გზაზე – ფოთზე გატარების თაობაზე (ბერლინი – ფოთი – პეკინი), რაც დღეს, XXI საუკუნის დამოუკიდებელ საქართველოში პრაქტიკულად ხორცს ისხამს ევრაზიული დერეფნის (აბრეშუმის გზის) სახელით.

ევროპულ, დემოკრატიულ იდეებზე აღზრდილი ნიკო ნიკოლაძე კატეგორიული წინააღმდეგი იყო დესპოტური მმართველობის და ავტოკრატიული ლიდერების: „იქ, სა-დაც ყველაფერი ერთ კაცზე ტრიალებს და არა დაწესებუ-ლებაზე, – წერდა იგი, – ის კაციც ნელ-ნელა იმ შეხედუ-ლებას იღებს, რომ მე ვარ, სხვა არავინო, ყველა მე უნდა მემსახუროს და არა ქვეყანასო. ქვეყნის, ერის, იდეალის ხსენება თანდათან ქრება დიდში და პატარაში. დესპოტის სამსახური, ქვეყნის და იდეალის სამსახური, დიდად განსხ-ვავდებიან ერთმანეთისაგან“.

ნიკო ნიკოლაძე მიუთითებს, რომ „ევროპის საზოგა-დოებრივ ცხოვრებაში მთავარ როლს, ჩვეულებრივ, ორი ტიპის მოღვაწენი ასრულებენ ხოლმე – ფანატიკოსები და მოანგარები... რას ვხედავთ ამ მხრივ ჩვენში? საზოგა-დოებრივი მოღვაწეობისათვის მომზადებული ადამიანები, რომლებიც ამ საქმიანობისათვის საჭირო ცოდნითა და ნიჭით იყვნენ აღჭურვილნი, ჩვენში ძლიერ ცოტაა. კიდევ უფრო ნაკლებად გვყვანან ფანატიკოსები, რომლებიც იკისრებდნენ საზოგადოებრივ მოღვაწეთა რკინის ბორ-კილების ტარებას“.

ნიკოლაძე თვლიდა, რომ პოლიტიკა ახალმოდური შლიაპკა კი არ არის, რომლის ცვლა ჩვენს ქეიფზე ჰკიდია, ისეთივე ტრადიციული, უცვლელი, მამა-პაპური განძია, როგორც ენა, ეროვნება, სარწმუნოება“. შესაბამისად, პო-ლიტიკა მეცნიერებაა და ის შესწავლას მოითხოვს. ნიკო ნიკოლაძეს აქ მოჰყავს განვითარებული ქვეყნების მაგალი-თი: „საზღვარგარეთ კი ყველა პოლიტიკური პარტიის კად-რი და შტაბი სხვადასხვა სპეციალისტების საჩინო მოღვა-წეებისაგან არის შემდგარი; პარტიებს იქ მეტად რთული

სასიცოცხლო საქმეები მორიგად უდგათ წინ, რომლის მართვა ერთობ მარჯვე ღონისა და ცოდნის მოხმარებას თხოულობს: ამიტომაც მეთაურებს გავლენის შერჩენა როდილა შეუძლიათ მარტო ფრაზების რახა-რუხით ან მიუწვდომელი სიმაღლისაკენ ფრთხების ფართხალით“.

შეიძლება ითქვას, რომ ევროპული მასშტაბის ასეთი გრანდი, როგორიც იყო ნიკო ნიკოლაძე, პოლიტიკურ მოლვანეებს შორის საქართველოს ჯერ არ ჰყოლია.

### **კითხვები:**

1. რამ განაპირობა ნიკო ნიკოლაძის შეხედულებათა ასეთი ფართო თვალსაწიერი?
2. რატომ უნოდეს ნიკოლაძეს „ულმობელი საქმის კაცი“?
3. ნიკოლაძის პოლიტიკურ-ეკონომიკური და კულტურული ნააზრევიდან რა შეიძლება გამოადგეს დღევანდელ ქართულ სახელმწიფოს და ახალგაზრდა თაობას?

## გ10 არჩილ ჯორჯაძეს საქართველოს გაეროვნულების გზების შესახებ

არჩილ ჯორჯაძემ (1872-1913) სულ 41 წელი იცოცხლა, მაგრამ ძალიან მნიშვნელოვანი კვალი დამჩნია ქართულ საზოგადოებას – იყო დიდი პატრიოტი, ეროვნული მოძრაობის ერთ-ერთი ლიდერი და ორგანიზატორი, მნერალი, ფილოსოფოსი და სოციოლოგი, რომელიც ღრმად ჩანაცდა ქართულ სინამდვილეს და ხასიათს („თქვენ ეხებით ისეთს საყურადღებო და საგულისხმო საკითხებს, რომლის გათვალისწინება და ცოდნა ყოველი ქართველისათვის არის საჭირო და სახელმძღვანელოდ ექნება თანამედროვე საზოგადოებას“ – ნერდა მას დიდი ივანე ჯავახიშვილი).

არჩილ ჯორჯაძემ თბილისის ვაჟთა პირველი გიმნაზიის დამთავრების შემდეგ სწავლა განაგრძო ჯერ პეტერბურში, შემდეგ ვარშავის უნივერსიტეტებში. ტუბერკულოზით დაავადებული ნიჭიერი ახალგაზრდა ექიმების რჩევით სამკურნალოდ და საკუთარი სურვილით სასწავლებლად ჯერ ლონდონში გაემგზავრა, მერე კი პარიზსა და უენევაში. სწავლასთან და მკურნალობასთან ერთად იგი პრაქტიკულ საქმიანობასაც ეწეოდა. მისი წინადადებით საფრანგეთში გამოდიოდა გაზეთი „საქართველო“ ქართულ და ფრანგულ ენებზე („ლა შეორჟი“).

1903-1905 წლებში ამ გაზეთს არჩილ ჯორჯაძე რედაქტორობდა გიორგი დეკანოზიშვილთან ერთად. გაზეთმა და მისმა ფრანგულმა დამატებამ ქართულ ეროვნულ მოძრაობას ევროპაში ბევრი თანამგრძნობი და გავლენიანი სახე შესძინა.

ევროპაში განათლებამიღებული არჩილ ჯორჯაძე 1905 წელს სამშობლოში დაბრუნდა და ილიას სიკვდილის მერე ეროვნული მოძრაობის იდეოლოგად და ქართული ცხოვრების ევროპულად გარდაქმნის მომხრედ მოგვევლინა. მან საფუძვლიანად გააანალიზა საქართველოს ისტორია, ჩვენი მეობა, ძლიერი და სუსტი მხარეები და ახალი მიმართულებანი დასახა სამომავლოდ.

ევროპიდან დაბრუნებულმა არჩილ ჯორჯაძემ სხვა თვალით შეხედა ქართულ რეალობას: „ის, რითაც გვიცხოვ-რია, დაძველდა, გაცვდა და ახალი გზის, ახალი იდეალის ძიებაში ვართ... ჩვენ დუღილის ხანაში ვართ. ეს ჩვენი სინორჩე, გამოურკვევლობა, „დუღილი“ უნდა გვახარებდეს“ გვამხნევებდეს, რადგან ყოველივე ეს სიცოცხლის მომასწავებელია; რადგან სიცოცხლე მოლოდინია, მოლოდინი და რწმენა კი დიდი ბედნიერებაა, მაგრამ მარტო მოლოდინით ვერ დავკმაყოფილდებით, ვითარება და ჩვენი მოლოდინი საქმეს გვავალებს, ეს საქმე უნდა იყოს ცოცხალი, ცხოვრებისეული, მსჯელობას მოქმედება უნდა მოჰყვეს, რა უნდა იყოს ჩვენი პირველი საქმე? ამის გადაწყვეტა ძნელია, რადგან ჩვენში ბევრი რამაა გასაკეთებელი“. ჯორჯაძე აუცილებლად მიიჩნევდა არა მარტო თეორიული და პრაქტიკული მოლვანეობის შეთავსებას, არამედ აზროვნებისა და მოქმედების ახალი, ევროპული სტილის დანერგვას. იგი ილიასავით მოყვარეს პირში უძრახე“-ს პრინციპით წერდა, რომ ქართველები „ზარმაცები ხართ, არამუყაითნი, დაუდევარნი, არამტკიცე, აპილპილდებით მოკლე ხნით და გამუდმებული შრომა კი გეზარებათ. გატაცებით მოკიდებთ საქმეს ხელს, ხოლო მალე დატოვებთ დაუმთავრებელს. ოცნებობთ, განყენებულის თეორიებით ცხოვრობთ და გა-

ვიწყდებათ, რომ ოცნება, თეორია და პრაქტიკული ცხოვრება ერთი არაა, გიყვართ პოლიტიკაზე ბაასი, მაღალი, დიდი საქმეები და არ ფიქრობთ, რომ სინამდვილე უფრო პატარა საქმეებისგან შედგება და დიდი საქმე იმსხვრევა. როცა ნიადაგი არა აქვს მომზადებული პატარა, ყოველ-დღიური მუშაობით. ყველას მაღალი თანამდებობა, დიპლომი, ჩინი, სამსახური გინდათ მაშინ, როცა საჭიროა პატიოსანი, ბეჯითი, მხნე, უბრალო მუშავი. შემოქმედი ქვეყნის სიმდიდრისა, ახალი კულტურის გამავრცელებელი, ცხოვრების გამაუმჯობესებელი“.

არჩილ ჯორჯაძე მხარს უჭერდა საზოგადოების თანადათანობითი ევოლუციის და სრულყოფის გზას. ქართული ეროვნული ახალი იდეალების შემუშავების და განხორციელების საქმეში ცენტრალურ როლს აკისრებდა ინტელიგენციას. ერისადმი თავის სამსახურში ინტელიგენტი „სინდისიერი, სამართლიანი ცოდნით უნდა ეცადოს მის გაგონიერებას შესათვისებლად ცხოვრების „ევროპული ფორმებისა“. ასევე ინტელიგენციას აკისრებდა მთავარ როლს ჯორჯაძე მის მიერ შემუშავებულ „საერთო მოქმედების ნიადაგის“ თეორიის განხორციელების საქმეში (1901).

არჩილ ჯორჯაძის აზრით, „უდავოა, რომ ევროპაში მოკამათე დასები სხვადასხვა ქვეყანაში დგანან საერთო მოქმედების ნიადაგზე. დემოკრატიულ დაწესებულებათა შექმნისათვის საჭიროა ყველა პროგრესული პარტიის შეერთებული ძალა და ამ მიზნით საჭიროა კლასთა ბრძოლის სიმწვავის შესუსტება“. ჯორჯაძე აკონკრეტებს, რომ საერთო ნიადაგზე დგომა არ ნიშნავს პარტიათა და სოციალურ ჯგუფთა შორის ყოველგვარი წინააღმდეგობათა მოხსნას. იგი გამოყოფს „სამ უმთავრეს საკითხს ჩვენი ცხოვრებისა,

რომლის გარკვევაში ჩვენს მოპირისპირე დასებს საერთო  
მოქმედება შეუძლიათ:

- ა) ქართული ენის დაცვა;
  - ბ) ქართული ვაჭრობა-მწერველობის შექმნა;
  - გ) ქართული მეურნეობის ქართველთა ხელში დარჩენა.
- მოვინანებით, მან ამ პირობებს კიდე ორი დაამატა:
1. ქართველი ინტელიგენცია უნდა განაგებდეს და აწარ-  
მოებდეს სახალხო-კულტურულ მოღვაწეობას. მან უნ-  
და შეძლოს დაარსოს საკვირაო სკოლები, სახალხო  
ბიბლიოთეკები, თეატრები და სხვა კულტურულ-საგან-  
მანათლებლო ცენტრები, უხელმძღვანელოს შესაბამის  
ღონისძიებებს;
  2. ქართული ინტელიგენცია აქტიურად უნდა მონაწილე-  
ობდეს ქალაქის თვითმმართველობაში.

ჩამოთვლილი საპროგრამო მოთხოვნებიდან კარგად  
ჩანს, რომ ილია ჭავჭავაძის ცნობილი საპროგრამო დებუ-  
ლების – „ენა, მამული, სარწმუნოება“ – განვითარების ახა-  
ლი პერსპექტივები დაისახა და ახალი კონკრეტული და  
შინაარსობრივი დატვირთვაც მიიღო თანადროულობის  
შესაბამისად.

„საერთო მოქმედების ნიადაგის“ თეორიის მოთხოვნა  
შეეხო ასევე საქართველოს, მთლიანად ამიერკავკასიის ად-  
მინისტრაციაში და თბილისის თვითმმართველობაში არჩე-  
ვისას ეკონომიკური სიმდიდრის, ცენზის საკითხს. მმართ-  
ველობის და ბიზნესის სათავეში არაქართველი ბურჟუა-  
ზის წარმომადგენლები (ძირითადად სომხები და რუსები)  
იყვნენ, ამიტომ ამ წარმომადგენლობებში ქართველთა რო-  
ლი უნდა გაზრდილიყო.

გავრცელებული აზრის საწინააღმდეგოდ, თითქმს ქართველთა განათლების საერთო დაბალი დონის მიზეზი მათი სოციალური სიდუხჭირეა, არჩილ ჯორჯაძემ საწინააღმდეფო პოზიციიდან ახსნა: „ხალხთა გაუნათლებლობაა მიზეზი მათი სოციალური სიღატაკისა და სიმწირისა“ – ამიტომაც სახალხო განათლების განვითარება მთელი ქართველი ხალხის საერთო მოქმედების ერთ-ერთ უმნიშვნელოვანეს პრინციპად გამოაცხადა, რომლის ხორცშესმისათვის ყველა ქართველს პოლიტიკური შუღლი უნდა და-ევინყებინა, ქართველი ხალხის ინტერესები კი ყველაზე მაღლა დაეყენებინა.

არჩილ ჯორჯაძეს „საერთო მოქმედების“ თეორია საქართველოს კაპიტალიზმის ევროპულ გზაზე დაყენების მანიშნებელ გზად მიაჩნდა. იგი ვარაუდობდა კულტურული განვითარებისა და ეკონომიკური აღმავლობის ცივილიზებულ ფორმებში ურთიერთშერწყმას.

ჯორჯაძის აზრით, ევროპაში მიმდინარეობს როგორც კაპიტალის კონცენტრაცია, ასევე თანაბრად დეცენტრალიზაციის პროცესიც და საერთოდ კაპიტალიზმის ეს თავისებურება, მისი განმარტებით, სრულიადაც არ იყო საშიში საქართველოსათვის, რადგან იგი წვრილი, კერძო მესაკუთრული ქვეყანა იყო.

არჩილ ჯორჯაძის მოლვანეობაში მნიშვნელოვანი ადგილი უკავია საქართველოს ეროვნულ-სახელმწიფოებრივი მოწყობის საკითხებს, ეროვნულ-ტერიტორიალური ავტონომიის მოთხოვნას, ფედერალური მოწყობის საკითხების დამუშავებას რუსეთის იმპერიის მასშტაბებში. მან, როგორც პოლიტიკოსმა, თავისი დროისათვის საკმაოდ პროგრესული, ევროპული იდეები წამოაყენა, მაგრამ მას ყო-

ველოვის მაინც ერთი სახელმძღვანელო პრინციპი ამოძრავებდა – მოენახა გზა საზოგადოებაში წარმოქმნილი დაპირისპირების გადასალახავად, ერთის მხრივ, ცალმხრივი დემოკრატიზმის მოქადაგე მხარეს („ურნალ „კვალის“ ჯგუფი) და, მეორეს მხრივ, ცალმხრივი პატრიოტიზმის მქადაგებელი („ივერიელები“), ერთ მთლიანობად უნდა შეკრულიყვნენ, რადგან მას არ შეეძლო ქართველი ერის სასარგებლოდ არ მიეჩნია ხალხის თავისუფლებისაკენ მისწრაფების და ეროვნულობის გრძნობის გამთლიანება, დემოკრატიზმისა და პატრიოტიზმის ერთმანეთთან შერწყმა. როგორ შეიძლება ერთმანეთთან პარმონიაში მოვიდეს წოდებრივ-კლასობრივი წინააღმდეგობა და ეროვნული თანხმობა? როგორი მიმართება უნდა დამყარდეს მათ შორის? ჯორჯაძის აზრით, აქ უკიდურესობათა გზა გამორიცხულია, – საერთოდ ამ კითხვაზე სამი შესაძლებელი პასუხია: პირველი – ეროვნული ერთობის გამო კლასთა ბრძოლის უარყოფა, მეორე – კლასთა ბრძოლის გამო ეროვნული ერთობის უარყოფა, მესამე – ეროვნული ერთობა შესაძლებელია კლასთა იმ წარმომადგენლებისათვის, რომელთათვისაც ერთიანობა ხალხის განვითარების საშუალებაა. პირველი მოსაზრება უნიადაგო ეროვნებას იცავს, რადგან უარყოფს მშომელთა კლასობრივ ჩაგვრას და მას ხალხი არ მიიღებს, მეორეს ლოგიკურად ეროვნების უარყოფამდე მივყავართ, მესამე პასუხი კი შესაძლებლობას იძლევა დავიცვათ ეროვნული პრინციპი და ხალხის კეთილდღეობა.

არჩილ ჯორჯაძე თავს იცავდა სოციალ-დემოკრატების ბრალდებისაგან, რომლის მიხედვით „საერთო ნიადაგის“ თეორია უარყოფს კლასთა ბრძოლას და კლასობრივი ზავი სჭირდება ეროვნული ბურუუზის ინტერესების დასაცა-

ვადო. ის არ უარყოფს, რომ ესწრაფვის ეროვნული ბურ-უუაზის ზრდა-განვითარებას (ევროპული ტრადიციებისა-მებრ). მას მიაჩნია, რომ ამ გზით უცხოელთა ჩაგვრის ულე-ლი შესუსტდება, რომ „თავადს და ბურუუას ვერ წავართ-მევთ საერთო საქმისათვის სამსახურის სურვილს, პირი-ქით, ხელი უნდა შევუწყოთ ამ სურვილის გაძლიერებას, მაგრამ მას ეროვნული ბურუუაზისათვის ხელის შეწყობა მომენტის ამოცანად მიაჩნდა კონკრეტულ სიტუაციაში და არა საბოლოო მიზნად.

ერის კონსოლიდაციის და გადარჩენის საქმეში ინტე-ლიგენციასთან ერთად ჯორჯაძე უდიდეს როლს აკისრებ-და ქართულ მართლმადიდებლურ ეკლესიას „რომელიც, – მისი თქმით, – ისტორიულად იყო ძალა, რომელსაც შეეძ-ლო ერი ეხსნა გადაგვარებისაგან და რომელიც მუდამ ჟამს მისი ინტერესების დაცვის სადარაჯოზე იდგა“.

არჩილ ჯორჯაძე ძალზე უფრთხილდებოდა თაობათა მემკვიდრეობის პრინციპებს და ობიექტური იყო მათი შე-ფასების საქმეში. როცა ილია ჭავჭავაძეს მნვავედ აკრიტი-კებდნენ სოციალ-დემოკრატები, არჩილ ჯორჯაძის დამო-კიდებულება ილიასადმი იყო მისაბაძი. იგი ილიას ეროვნუ-ლი მოძრაობის მეთაურად თვლიდა. როდესაც მას რაიმე საკითხში არ ეთანხმებოდა, ამას დიდი პატივისცემის ფორ-მით გამოთქვამდა.

ჯორჯაძე მკაცრად ამხელდა და გმობდა თვალსაზისს, რომელიც ამართლებდა პატარა ერების დიდ ერებში ბუ-ნებრივ შერწყმას. ისინი, ვინც ამ იდეას ეთანხმებოდნენ, მათ იგი მიიჩნევდა პატარა ერებზე ბატონობის მომხრედ და ადამიანებად, რომლებიც არ ცნობდნენ ეროვნულ ხა-სი-ათს და სულისკვეთებას.

არჩილ ჯორჯაძის აზრით, ეროვნული ფსიქიკა არ შეიძლება იყოს არც ფერდალური, არც ბურუუაზიული. ასეთი „სქემები“ აუქმებენ ერის არსებით ნიშნებს, შლიან ზღვარს სხვადასხვა ერის სულიერ თავისებურებებს შორის. ხალხის ეროვნულ გონის მან სხვანაირად „მამულიშვილობაც“ უწოდა. მამულიშვილობის „შინაარსი სოლიდარობაა ადამიანთა განსაზღვრულ ერთეულობათა შორის“. იგი არ იშლება „სოციალურ ინტერესთა ანტაგონიზმის“ გამო, ეს „ერთიანი ფსიქიკური ფაქტი“ ყოველთვის ერთნაირი რჩება ეროვნულ შეგნებაში. ეს ეროვნული გონი ადრე „ხელს უწყობდა უსამართლო წყობილების დამკვიდრებას“, მაგრამ დადგა დრო, როცა იგი უნდა წარიმართოს უსამართლო წყობილების წინააღმდეგ, დადგა ხანა „სოციალური სამართლიანობის შეგნებისა, კულტურის აყვავებისა და ამასთან ეს არის ხანა სხვა კულტურულ ერთეულებთან დაახლოებისაც“.

არჩილ ჯორჯაძე აღნიშნავს, რომ ქართველის ეროვნული გრძნობა არასოდეს უპირისპირდება სხვა ერთა პატივის, უფლების უზრუნველყოფას, მის შეზღუდვას ან დამცირებას.

ამრიგად, ქართველი ხალხის ერთი ეროვნული ინტერესით შედუღაბებაში, ერის სულიერ გამთლიანებაში ხედავდა არჩილ ჯორჯაძე ქართველი ერის გადარჩენისა და მისი მომავალი აღორძინების საფუძველს. იგი მიუთითებს, რომ ეროვნული ხასიათი თუ სული, არ არის რაღაც მეტაფიზიკური რამ, იგი ყალიბდება, ვითარდება, იცვლება, მაგრამ ერის განვითარების სხვადასხვა ეტაპზე ამ ცვალებადობით მაინც რჩება რაღაც ზოგადეროვნული, სპეციფიკური ქართული ხასიათი, განსხვავებულ ფორმებში გამოვ-

ლენილი ერის ისტორიის პოლიტიკურ-სახელმწიფოებრივი ცხოვრების ამა თუ იმ ეტაპზე.

ჯორჯაძის „საერთო ნიადაგის“ ძირითად მოთხოვნებს კრიტიკულად შეხვდა მაშინდელი ქართული საზოგადოება. მათ ამ თეორიაში ვერ შეამჩნიეს ეროვნული ერთიანობის უდიდესი ღირებულებითი მნიშვნელობა.

არჩილ ჯორჯაძეს „საერთო მოქმედების ნიადაგის“ თეორია მიაჩნდა ქართული ეროვნული გონის მრავალმხრივი გაშლისა და განვითარების პროგრამად, რუსული იმპერიული ულლიდან თავდახსნისა და ერისათვის მომავალი აღორძინების გზად, მაგრამ მან თავის სიცოცხლეშივე აღიარა, რომ შექმნილი ობიექტური მიზეზების გამო (1905 წლის რევოლუციის შემდეგ შექმნილი პოლიტიკური ვითარება, სოციალ-დემოკრატიისა და მარქსისტული პროპაგანდის წარმატებები) ნააღრევი იყო დამოუკიდებლობის მიღწევისათვის სამოქმედოდ გაეხადა აღნიშნული ეროვნული მოწყობის პროგრამა.

ამან მასში გამოიწვია პესიმიზმი და მომავლის რწმენის შერყევა. მისი აზრით, ქართველ ერს თავისი თავი დიდი იდეალების განსახორციელებლად ჰქონდა წარმოდგენილი, საქართველი კი – დიდ მოვლენათა ასპარეზად. სინამდვილეში იდეალები ჩაკვდა და შეგვრჩა გაძარცვული, უსაზრისოდ გარინდებული ქართული სინამდვილე: „საქართველო სოციოლოგიური და სოციალისტური პრობლემების გასარკვევი ლაბორატორია გვეგონა. გამოირკვა, რომ ჩვენ პატარა ხალხი ვართ, შემდგარი მეცხვარეების, მევენახეებისა და მიწათმოქმედთაგან. აღმოჩნდა, რომ ქართველ ხალხს არც საძოვარი აქვს ცხვრისათვის და არც სახნავ-სათესები. ყველაფერი დაიკარგა, სხვა ერებმა მიითვისეს...“

დაღონებული და დასევდიანებული ვგრძნობთ, რომ ის, რასაც ვაკეთებთ, ნამდვილი საქმე არაა და ის, რითაც ვცხოვრობთ, აზრს და მიზანს მოკლებულია... რომ საქართველო გახდა ოსების, სომხების და რუსების მიგრაციის სფერო, რის შედეგად განახევრდა ქართველი მოსახლეობა, რომ საქართველომ ვერაფერი დაუპირისპირა სომებ ბურუჟაზიას, რომ ქართულ ენას აბუჩად იგდებენ თვით ქართველები და ცდილობენ თავიანთ შვილებს რუსულ გიმნაზიაში ასწავლონ... ქართველი ერი დაავადებულია, ქართველი საზოგადოების სახით საქმე გვაქვს „ავადმყოფ საზოგადოებასთან“. წერილებში „ჩვენი სატკივარი“, „გარდამავალი ხანა“ არჩილ ჯორჯაძე მიუთითებს, რომ ქართული საზოგადოება მომხმარებლური გახდა. მათ არაფერი აინტერესებთ პირადი ცხოვრების მოწყობისა და სენსაციების გარდა. ქვეყნის სატკივარზე ფიქრისათვის არ სცალიათ. სამაგიეროდ, თვალი „ველო, იპო და აეროდრომებისაკენ“ უჭირავთ. ქართველები მხოლოდ ერთ რამეზე ფიქრობენ – როგორ გაზარდონ საკუთარი შვილები ისე, რომ უზრუნველყოფილი იყვნენ კარგი ცხოვრებით, მთავრობის სამსახურით და ჯილდოებით... ეროვნული საქმე მივიწყებულია, მისდამი ინტერესი დაკარგულია... ყველას უნდა ცხოვრების სუფრაზე უდარდელად ნამოსკუპება... როდესაც ერის განადგურების მოწმე ხდები, პირველი აზრი, რომელიც უნდა დაიბადოს ამ ხალხის გულის სილრმეში თავისი ვინაობის დასაცავად და შესანარჩუნებლად, არის საერთო აღმრდინებისა და საერთო მოქმედების იდეა“.

## პითხები:

1. ქართველობის რა ნაკლოვან მხარეებზე ამახვილებდა ყურადღებას არჩილ ჯორჯაძე?
2. რაში მდგომარეობს მისი „საერთო მოქმედების თეორია“?
3. ვის აკისრებდა არჩილ ჯორჯაძე მთავარ როლს ამ თეორიის განხორციელებაში?

## §11 დავით სარაჯიშვილი – ევროპული ჭიათურის პირველი პიზნაშემი საქართველოში

დავით სარაჯიშვილმა ჯერ კიდევ თავის სიცოცხლეში მოიხვეჭა დიდი სახელი და სიყვარული. ის იყო ევროპული მასშტაბის ქართველი მეწარმე და თანამედროვე მარკეტინგული აზროვნების მატარებელი ბიზნეს-ორგანიზატორი. მისი სანიმუშო სამენარმეო მოღვაწეობა არა თუ იმ ეპოქის დონეზე იდგა, არამედ 20-30 წლით უსწრებდა XX საუკუნის ევროპა-ამერიკის ბიზნესის ნარმოების ფილოსოფიას, რომელიც საბოლოო სახით 1960-იან წლებში ჩამოყალიბდა და მსოფლიო ბიზნესის ისტორიაში შევიდა როგორც „მარკეტინგის ეპოქა“ (ილია ფერაძე).

დღეს საყოველთაოდ ცნობილია მარკეტინგული ნარევის ცნება, რომელიც „4P“-ს თეორიის სახელწოდებითაა ცნობილი, მისი შემადგენელი კომპონენტების ინგლისური დასახელების პირველი ასოებიდან გამომდინარე (Product – პროდუქტი, Price – ფასი, Place – ადგილი და Promotion – ნარმოჩენა). დავით სარაჯიშვილის საქმიანობაში შეიმჩნევა ამ ოთხივე ელემენტისადმი ღრმად გააზრებული, მეცნიერული მიდგომა, ბევრი დიდი ბიზნესმენისაგან განსხვავებით, ამ ოთხ P-სთან ერთად მის მოღვაწეობაში იკვეთება მისეული, დიდი მრეწველისა და ამავდროულად ქვეყნის პატრიოტისათვის განუყოფელი, უმთავრესი ელემენტი, მეხუთე P – ეს არის „PATRIA“ ანუ სამშობლო, მამული, თავისი ხალხი, რომელთა სამსახურში გალია მან თავისი სიცოცხლე.

საინტერესო შეფასება მისცა დავით სარაჯიშვილის მოღვაწეობას დამოუკიდებელი საქართველოს (1918-1921) ეროვნული მთავრობის თავმჯდომარემ ნოე უორდანიამ:

„ის იყო პირველი ქართველი მრეწველი ევროპული ტიპისა. ერთხელ მან მითხრა: „ძნელია ჩვენში ეკონომიკურად წინ წაწევა. როგორც კი ერთი ცოტაოდენ ქონებას შეიძენს, ასი მშიერი უკან დასდევს და სანამ არ გახრავენ, თავს არ დაანებებენ“-ო. ასეთ პირობებში მართლაც დიდი პრაქტიკული ნიჭია საჭირო, რომ ამ შემოსეულ ხროვას გაუძლო და შეძლება გონიერად მოიხმარო. დავითი რომ წმინდა ქართველი მრეწველი ყოფილიყო, კაი ხანია ქართველურად დაამთავრებდა – მისი შეძლებისგან არაფერი დარჩებოდა. მხოლოდ ევროპიელ კაცს შეძლო ყველა მადლიერი ჰყოლოდა და თანაც შეძლება არ გაეფლანგა. შეაერთეთ ქართული გულკეთილობა და პურ-მარილი ევროპულ საქმიანობასთან და მიიღებთ დავით სარაჯიშვილს. ამ პიროვნებაში სამაგალითოდ შეზავდა საქები ქართველობა და საქები ევროპიელობა. და მე მგონია ქართველის გაევროპიელება სწორედ ამ გზით უნდა მოხდეს. როცა თითოეული ჩვენგანი ისწავლის ევროპიულ მუშაობას, ევროპიულ საქმიანობას და ნაციონალურ ხასიათს არ დავკარგავთ – ჩვენი გაევროპიელება ფაქტი იქნება. დ. სარაჯიშვილი ქართველი ევროპიელი იყო“.

დავით სარაჯიშვილის წინაპრები ცნობილი კომერსანტები იყვნენ და როგორც ისტორიული წყაროები იუწყებიან, ისე „განაფულან აღებ-მიცემობაში, რომ მეფე ვახტანგ მეექვსემ, რომელმაც 1710 წელს შემოიღო შთამომავლობით გარდამავალი „თბილისის საპატიო მოქალაქეობის“ წოდება, იგი ერთ-ერთი პირველი დავით სარაჯიშვილის დიდ ბაბუას უბოძა“. მისმა წინაპრებმა პირველებმა დაიწყეს რუსეთთან ვაჭრობა, ისინი სურსათ-სანოვაგით ამარავებდნენ რუსეთის ჯარს.

მამის, ცნობილი კომერსანტისა და ქველმოქმედის, ზაქარია სარაჯიშვილის მეშვეობით დავით სარაჯიშვილმა

ბრწყინვალე განათლება მიიღო – ჯერ თბილისში – „პაკეს“ პანსიონსა და თბილისის ვაჟთა პირველ კლასიკურ გიმნაზიაში, შემდეგ პეტერბურგის უნივერსიტეტში საბუნების-მეტყველო ფაკულტეტზე, საიდანაც ის გადადის ჯერ მიუნპენის, მერე კი პაიდელბერგის უნივერსიტეტში, რომელსაც ამთავრებს ქიმიის დოქტორის ხარისხით. იმავე წელს იგი იცავს სადოქტორო დისერტაციას ფილოსოფიის დოქტორის ხარისხით.

სწავლას მოწყურებული ახალგაზრდა ამითაც არ კმაყოფილდება და 1872-1878 წლებში პოპენპეიმისა და პალეს უნივერსიტეტებში ეუფლება სასოფლო-სამეურნეო მეცნიერებას. ოჯახის ხელშეწყობით იგი 1878 წელს მიემგზავრება საფრანგეთში და შეუდგა მევენახეობისა და მეღვინეობის თეორიული და პრაქტიკული საფუძვლების შესწავლას.

საფრანგეთში ყოფნისას დავით სარაჯიშვილი დაინტერესდა კონიაკის წარმოებით (რომლის წარმოების პიონერი საქართველოში იყო ქუთაისელი მენარმე – პარიზის ეროვნული აკადემიის და ბრიუსელის საერთაშორისო აკადემიის საპატიო წევრი გიორგი ბოლქვაძე, რომელმაც 1865 წელს ქუთაისში დაარსა არყის ქარხანა თავისი ლაბორატორიით), რომელიც შედარებით ახალი დარგი იყო მეღვინეობაში.

საფრანგეთში ყოფნისას სარაჯიშვილმა შეისწავლა კონიაკის წარმოების საქმე, გააანალიზა, რომ კონიაკის ხარისხზე დიდ გავლენას ახდენს ნიადაგის შემადგენლობა, კლიმატური პირობები, საკონიაკე ყურძნის ჯიშები, შეადარა ისინი საქართველოს შესაბამის პირობებს და მივიდა დასკვნამდე, რომ საქართველოში ყველა პირობა იყო ხარისხიანი კონიაკის მისაღებად და საწარმოებლად.

მაშინ კონიაკის სამრეწველო გამოშვებას დიდი კაპიტალისა და ცოდნის გარდა დიდი გამბედაობაც უნდოდა.

საქმე იმაში იყო, რომ ამ საქმეს კაპიტალის დიდი ხნით დაბანდება სჭირდებოდა, რაც ერთობ სარისკო საქმე იყო. იმ დროს ევროპის და რუსეთის ბაზარზეც დომინირებდა ფრანგული კონიაკები, რომლებიც არისტოკრატიულ წრე-ებში დიდი მოწონებით სარგებლობდა.

რუსეთში კონიაკის წარმოების ყველა აქამდელი მცდე-ლობა მარცხით დასრულდა.

საკონიაკე ვენახების სპეციალურ მოშენებას 4 წელი მაიც სჭირდებოდა. ამასთან საჭირო იყო ღვინის სპირტად გამოხდა და შემდეგ მისი მუხის კასრებში დაძველება – მინიმუმ 4 წელი. ამგვარად, საქმის დაწყებიდან მხოლოდ 8 წლის შემდეგ იყო შესაძლებელი პირველი შედეგის მიღება და თან არანაირი წინასწარი გარანტია არ არსებობდა მიღებული სასმელის ხარისხზე. აქვე გასათვალისწინებე-ლია ის გარემოებაც, რომ კონიაკის წარმოება დაკავშირებულია დიდ დანაკარგებთანაც. ერთი ლიტრი სპირტის მი-საღებად საჭიროა 8 ლიტრი დაბალგრადუსიანი ღვინო, ხოლო შემდეგ გამოხდილი მასალის 20% ქროლდება და იკარგება, რომელსაც ფრანგები „ანგელოზების წილს“ უწოდებენ. ეს დანაკარგები შემდგომ აისახება კონიაკის ხარისხზეც და ფასზეც.

სარაჯიშვილის დიდი ნიჭი და ალლო იმაშიც გამოიხა-ტა, რომ ზუსტად გათვალ ყველაფერი. მან ღრმად შეის-წავლა ყურძნის ჯიშები საქართველოსა და რუსეთის იმპე-რიის ცალკეულ ადგილებში, ასევე – ნიადაგი და კლიმა-ტური პირობები, მოთხოვნილება კონიაკზე, მიზნობრივი მომხმარებელი, ბაზარი, რომელიც ფრანგულ კონიაკებს ჰქონდათ დაპყრობილი და მიიღო მტკიცე გადაწყვეტილე-ბა ხელი მოეკიდა ქართული კონიაკის წარმოებისათვის მზარდ რუსულ და უცხოურ ბაზარზე გასატანად.

საქმისადმი ასეთი მარკეტინგული მიღებობა და აზროვნება მაშინ მსოფლიოში თითებზე ჩამოსათვლელ ბიზნესმენებს თუ გააჩნდათ. იმ დროს, როცა დავით სარაჯიშვილმა სამრენველო მოღვაწეობა დაიწყო, დღესდღეობით ცნობილი ბევრი მსოფლიო ფირმა არ არსებობდა და ის ფირმებიც, რომლებიც წარმატებით იპყორდნენ ბაზრებს, არსებობდნენ ტრადიციული ოჯახური ბიზნესის მეშვეობით.

საფუძვლიანი შემზადების შემდეგ უშუალო სანარმოო საქმიანობა მან 1884 წელს დაიწყო თბილისში ოლღას ქუჩაზე (ამჟამად კოსტავას ქუჩა, ცეკვას გამომცემლობის შენობის ადგილას), სადაც გახსნა სპირტის სახდელი ქარხანა, რომელშიც თავიდან ყოველწლიურად აწარმოებდა 12 ათას ვედრო სპირტს. ამ სარექტიფიკაციო ქარხნის ბაზაზე დაიწყო მუშაობა სარაჯიშვილის კონიაკის ქარხანამ. ამავე წელს ამუშავდა შვეიცარიიდან მიღებული ახალი აპარატი, რომელიც მაღალი ხარისხის საკონიაკე სპირტს ხდიდა.

**1889** წელს დ. სარაჯიშვილმა სპირტით სავსე 200 მუხის კასრი ჩამოიტანა საფრანგეთიდან. იგი თავიდან უშვებდა 1, 2, 3, 4, 5 ვარსკვლავიან კონიაკებს „კავკასიის ნატურალური კონიაკის სახელწოდებით“ და გაპქონდა მოსკოვში, პეტერბურგში, ვარშავაში და სხვ. დაძველებული სპირტების მიღების შემდეგ მან გამოუშვა სამარკო კონიაკი „ფინშამპანი“, „გრანშამპანი“ და ბოლოს „ძალიან ძველი“ („O.H.“), რომელიც მზადდებოდა 1888-დან დაძველებული 14-წლიანი საკონიაკე სპირტის ბაზაზე.

სარაჯიშვილის ფირმა მოიცავდა ალკოჰოლიანი სასმელების თითქმის ყველა სახის წარმოებას. იგი კონიაკის წარმოების დიდი თეორეტიკოსი და პრაქტიკოსი იყო, მაგრამ თანამშრომლობდა ევროპელებთან და 1887 წელს საფრანგეთიდან მაინც მოიწვია ლიქიორის წარმოების სპეციალისტი ბურდონი და კონიაკის ტექნოლოგი ანტონ

**უზრდი,** რომლებიც თავისი ქარხნის ტერიტორიაზე ბინებ-ში დაასახლა. ასევე ჩამოიყვანა ევროპელი სპეციალისტები სხვა საწარმოებისთვისაც.

დავით სარაჯიშვილი, როგორც ალლოიანი მენარმე და წინდახედული პიროვნება, მუდმივად ცდილობდა წარმოების განვითარებას და განახლებას, ასორტიმენტისა და გა-საღების ბაზრების გაფართოებას. 1885-1899 წლებში მისი წარმოება 40-ჯერ გაიზარდა და 60-მდე დასახელების სხვადასხვა სახის სასმელს უშვებდა.

1885 წელს ვლადიკავკაზში, 1887 წელს კი ერევანში დავით სარაჯიშვილმა დააარსა სპირტსახდელი და სარექ-ტიფიკაციო ქარხნები, რომლებიც ნედლეულის ბაზებთან ახლოს იყო.

თბილისის ხარხანა მან გადააკეთა კონიაკის ცენტრა-ლურ საწყობად და ახალი ქარხნები გახსნა კვლავ ერევან-ში (1894), კალარაშში (ბესარაბია, 1895), ბარგუშეთსა და გოგჩაში (ბაქოს გუბერნია, 1901), კარუმოვკაში (თერგის ოლქში, 1908) და ელისავეტპოლში (1915).

მართლაც დიდი ნიჭის პატრონი უნდა ყოფილიყო ადა-მიანი, რომ იმდროინდელი ტრანსპორტისა და კომუნიკა-ციების პირობებში, ასე წარმატებით ემართა ასე ერთმანე-თისგან დაშორებული საწარმოები, სათანადო დროს ეცვა-ლა ქარხნების მანქანა-დანადგარები, ან დაენერგა ახალი ტექნოლოგიები.

დავით სარაჯიშვილის ფირმაში კონიაკის წარმოება ფრანგული წესით ხდებოდა. სხვადასხვა ადგილიდან სხვა-დასხვა დროს შემოსული სპირტი ცალცალკე ისხმებოდა 40-50 ვეღროს ტევადობის მუხის კასრებში, რომელსაც სპე-ციალური მაღალმოიანი მუხის ჯიშისგან ამზადებდნენ. კასრში დაძველებული სპირტისგან კუპაჟით მზადდებოდა კონიაკი და ისხმებოდა 500-600 ვეღროიან კასრებში. დას-

ვენების შემდეგ მზა კონიაკი (ბოთლით, კასრით) იგზავნებოდა სარეალიზაციოდ.

იმის მიხედვით, თუ როგორ ააწყო დავით სარაჯი-შვილმა პროდუქციის გასაღების სადისტრიბუციო ქსელი, ვხედავთ სარაჯიშვილის გენიალური კომერციული ნიჭის მაგალითებს. ერთია ანარმოო პროდუქცია, რომელიც მომხმარებელს სჭირდება, ანარმოო იმ რაოდენობით, რა-საც აითვისებს ბაზარი და მეორეა – ამ პროდუქციის შეუფერხებელი მიწოდების ორგანიზება საჭირო გეოგრაფიულ ნერტილებამდე, რომლებიც ხშირად ათასობით კილო-მეტრითაა დაშორებული ერთმანეთისაგან. ამ მიზნით სა-რაჯიშვილმა შექმნა მთელი სტრუქტურა: საწყობების, მა-ლაზიების, სავაჭრო ნარმომადგენლობების, სავაჭრო აგენ-ტების, რომლებიც ადგილზე სწავლობდნენ ყოველგვარ მოთხოვნილებას, ახდენდნენ ხელშეკრულებების დადებას, საქონლის მიღებას ქარხნებიდან და მის რეალიზაციას. მის მიერ დიდ ქალაქებში გახსნილი სავაჭრო ნარმომადგენ-ლობები სწავლობდნენ მოთხოვნილებას რეგიონში, უზრუ-ნველყოფდნენ სავაჭრო ქსელის უწყვეტ მომარაგებას და ტელეგრამით ინფორმაციის გადაცემას ცენტრალური ოფისისათვის. ამ ინფორმაციის საფუძველზე სარაჯიშვი-ლი ოპერატიულად ახდენდა პროდუქციის გადანაწილებას.

დ. სარაჯიშვილს გახსნილი ჰქონდა მაღაზიები პეტერ-ბურგში, რიგაში, ნოვგოროდში, მოსკოვში, ვარშავაში, ხარკოვში, კალარაშში, როსტოვში, ყიზლარში, პეტროვსკ-ში, ვლადიკავკაზში, ერევანში, ბაქოში, თბილისში რამდე-ნიმე ადგილას.

ამას გარდა, მას სასმელები გაჰქონდა მთელი ევროპის ბიზნეს-ცენტრებში: ლონდონში, პარიზში, ბერლინში, ვე-ნაში, უქნევაში, კონსტანტინეპოლში.

დავით სარაჯიშვილის ყველა სავაჭრო წარმომადგენლობის, მაღაზიის და საწყობის თანამშრომლები წინასწარგადიოდნენ სათანადო მომზადებას და კარგად იყვნენ ინფორმირებულნი.

ზემოთქმულიდან კარგად ჩანს, რომ დავით სარაჯიშვილის პროდუქციის გასაღება უმაღლეს დონეზე იყო ორგანიზებული. იმ დროს მსოფლიოს ბევრ სერიოზულ კომპანიას არ გააჩნდა საკუთარი პროდუქციის ასეთი განვითარებული, გეოგრაფიულად და ფიზიკურად დიდი მასშტაბების სადისტრიბუციო ქსელი, როგორიც შექმნა დავით სარაჯიშვილმა. მან იმდენად გონივრულად მოაწყო წარმოება და დისტრიბუცია, რომ შეძლო პროდუქციის თვითღირებულების შემცირება და გაიაფებაც. ამ ქსელის, მოქნილი ფასების მეშვეობით, პროდუქციის მრავალფეროვნებითა და უმაღლესი ხარისხით დავით სარაჯიშვილის პროდუქციამ ნელ-ნელა გამოდევნა ფრანგული კონიაკები რუსეთის იმპერიის ბაზრიდან. მისი პროდუქციის რეალიზაციის მასშტაბები და ახალი ბაზრების ათვისების არეალი სწრაფად იზრდებოდა. 1904 წლის მონაცემებით საქართველოდან გატანილი მთელი სპირტიანი პროდუქციის 74%-ის ექსპორტი მხოლოდ დავით სარაჯიშვილის ფირმაზე მოდიოდა. იგი იყო არა მარტო დიდი ბიზნესმენი, რომელმაც შექმნა საოცარი დონის და არმატის კონიაკები, რასაც შემოქმედის ხელი სჭირდებოდა, არამედ თავად ფლობდა კონიაკის რაფინირებულ ხელოვნებას. იგი იყო ასევე არაჩვეულებრივი ორგანიზატორი, რომელმაც საქართველოსა და რუსეთის უკიდესგანო იმპერიაში შექმნა მანამდე არარსებული მრეწველობის დარგი განვითარებული სტრუქტურით.

საინტერესოა, როგორ ახდენდა დავით სარაჯიშვილი თავისი პროდუქციის წარმოჩენას (პრომოუშენს), რომე-

ლიც შედგება რეკლამის, პიარის (PR) – საზოგადოებასთან ურთიერთობის ღონისძიებების და ვაჭრობის სტიმული-რებისაგან.

ამ კომპონენტებიდან რეკლამა მაშინ ჩანასახოვან მდგომარეობაში იმყოფებოდა, ხოლო დანარჩენ ორზე, მათ შორის (PR) პიარზე წარმოდგენაც კი არ ჰქონდათ მენარ-მეებს.

დავით სარაჯიშვილის ალლო თავისი ფირმის და პრო-დუქციის წარმოჩენაში გამოჩნდა მაშინ, როდესაც მან თა-ვიდანვე შემოილო ფირმის სავაჭრო ნიშანი – კლდის ქა-რაფზე გადმომდგარი ჯიხვი, რომელიც ჰქონდა ყველა სა-წარმოს, მაღაზიას, ვიტრინას. მისი საწარმოების ინტერიე-რისა და ექსტერიერის გაფორმების უცილობელი ატრიბუ-ტიკაც ეს ჯიხვი იყო. ამ დეტალს უდიდესი მნიშვნელობა ჰქონდა საზოგადოების თვალში მისი ფირმის ცნობადობის ამაღლების და იმიჯის ჩამოყალიბებაში.

დღეს ეს რეკლამის ანაბანაა, მაგრამ მაშინ, **XIX** საუკუ-ნის 80-იან წლებში, მთელს მსოფლიოში ჯერ არ იყო დამკ-ვიდრებული სავაჭრო ნიშანი (ემბლემა), როგორც ფირმის განმსახვავებელი ატრიბუტი. საწარმოებს მხოლოდ მათი მეპატრონის გვარი ეწერათ და არ ესმოდათ საფირმო ნიშ-ნისა და ლოგოს მნიშვნელობა.

სარაჯიშვილის ბეჭედზე, ბლანკზე და წერილების კონ-ვერტებზე დატანილი იყო მისი საფირმო ატრიბუტიკა და გამოირჩეოდა დახვენილი გაფორმებით. პირველ რიგში, იგი დიდ ყურადღებას უთმობდა ბოთლის ფორმას და ეტი-კეტებს. ამასთან დავით სარაჯიშვილმა კარგად იცოდა რე-კლამის ფასი და დანიშნულება, რაც ევროპაში ყოფნისას კარგად გააცნობიერა. მიუხედავად იმისა, რომ მის პრო-დუქციას საქართველოში კონკურენტი არ ჰყავდა, პრო-

დუქციის რეკლამისათვის იგი ქმნიდა მხატვრულ სარეკლამო პლაკატებს. მან მსოფლიოში ერთ-ერთმა პირველმა 1895 წელს, კონიაკის ბოთლზე გამოსახა იმდროინდელ საქართველოში ცნობილი დიდგვაროვანი, ულამაზესი მანდილოსანი მაია ბაგრატიონ-დავითაშვილის ფერწერული გამოსახულება, რაც მნიშვნელოვანი სიახლე იყო იმდროინდელ რეკლამაში.

ცნობილი პიროვნებების (Slebrity) რეკლამაზე გამოჩენა XX საუკუნის დასაწყისიდან აღინიშნება. მაგ.: აშშ-ის ყველაზე რეკლამირებული პროდუქტის „კოკა-კოკა“-ს რეკლამაზე ცნობილი მსახიობი ქალი პილდა კლარკი 1904 წელს გამოჩნდა: (ე.ი. 9 წლის შემდეგ, რაც ეს გააკეთა დავით სარაჯიშვილმა). ამ მხრივაც დავით სარაჯიშვილმა გადაუსწრო დასავლურ ფირმებს და ნოვატორის სახელიც დაიმკვიდრა. გარდა ამისა, მისი ეს სარეკლამო პლაკატი, განსხვავებით „კოკა-კოკა“-ს რეკლამისაგან, გაცილებით მაღალმხატვრულ დონეზე იყო შესრულებული. ასევე უმაღლეს პოლიგრაფიულ დონეზე იყო შესრულებული მისი სარეკლამო პოსტერიც.

დავით სარაჯიშვილის პროდუქცია აქტიურად მონაწილეობდა მაშინდელ გამოფენებზე, საერთაშორისო ბაზრობებსა და კონკურსებზე.

დავით სარაჯიშვილის სიცოცხლეში შექმნილი კონიაკის პირველი ნიმუშებიც თამამად უტოლდებოდა ევროპაში ნარმოებულ საუკეთესო კონიაკებს. 1889-1913 წლებში მის მიერ გამოშვებულმა კონიაკებმა, ლიქიორმა და სპირტიანმა სასმელებმა სულ 14 ჯილდო მოიპოვეს, რომელთაგან 9 ოქროს და 3 ვერცხლის მედალი იყო.

XXI საუკუნეში კომპანიებისათვის უდიდესი მნიშვნელობა ენიჭება პიარის (PR) ანუ საზოგადოებასთან ურთიერთობის ელემენტებს და ლონისძიებებს. სარაჯიშვილის

დროს ეს ცნება ფაქტიურად არ არსებობდა. დავით სარაჯიშვილი, თავისი პიროვნული თვისებების გამო, თავად იყო მენარმეც და პიარ-მენეჯერიც. მის გარშემო შემოკრებილნი იყვნენ საქართველოს ინტელექტუალური ელიტის წარმომადგენლები, რომლებიც პირდაპირ აღმერთებდნენ დავით სარაჯიშვილს და უშუალო, პირდაპირი, ზეპირი რეკლამის მეშვეობით, კიდევ უფრო შორს გაპქონდათ პირადად მისი და მისი ფირმისა და პროდუქციის სახელი. იგი შეუბლალავი რეპუუაციით სარგებლობდა როგორც ჩვენში, ასევე – საზღვარგარეთ. მასზე ბევრს წერდა ქართული და რუსული პრესა.

მისმა ყოფილმა პედაგოგმა, გერმანელმა პროფესორმა ვაგნერმა თავისი ერთ-ერთი წიგნი მიუძლვნა ნიჭიერ მოწაფეს დავით სარაჯიშვილს.

ამასთან დავით სარაჯიშვილმა საკუთარი ცხოვრებით და გარდაცვალებითაც დაუმტკიცა ყველას, თუ რა მნიშვნელობა აქვს ისეთი ქვეყნის ცხოვრებაში, როგორიც საქართველოა, არა მარტო კონკურენტუნარიანი პროდუქციის გამოშვებას, არამედ სიკეთის თესვას და მოყვასზე ზრუნვას.

დავით სარაჯიშვილი უდიდეს ფინანსებს ახმარდა ქველმოქმედებას, მაგრამ საბოლოო ჯამში გაჭირვებულ-თათვის და ქვეყნისათვის გაღებული თანხები ხელს უწყობდა მისი პიროვნების და მთლიანად ფირმის პრესტიჟის ამაღლებას საზოგადოების თვალში. დღეს ცნობილი ფირმები ამ მიზნით მილიარდებს ხარჯავენ სტიმულირებისა და წარმოჩენის სხვადასხვა აქციაზე, რასაც პიარი ეწოდება.

თავად დავით სარაჯიშვილი პიროვნულად ისეთი ადამიანი იყო, რომლის თითოეული ნაბიჯი საზოგადოების ყურადღების ცენტრში იყო და ყოველივე მისი ქველმოქმედე-

ბა ისევ მისი და მისი ფირმის საკეთილდღეოდ ბრუნდებოდა.

დავით სარაჯიშვილი მეგობრობდა ილიასთან და აკაკისთან, ეხმარებოდა მათ ფინანსურად ყველა ეროვნული მნიშვნელობის პროექტის განხორციელებაში.

დავით სარაჯიშვილმა დაარსა სპეციალური კომიტეტი, რომელიც ავლენდა ნიჭიერ ახალგაზრდობას და ფინანსურად ეხმარებოდა მათ რუსეთსა თუ უცხოეთში სწავლის გასაგრძელებლად. მისი სტილის დინამიზმი იყვნენ: კომპოზიტორები ზაქარია ფალიაშვილი, დიმიტრი არაყიშვილი, მელიტონ ბალანჩივაძე, ია კარგარეთელი, კოტე ფოცხვერაშვილი; მხატვერები: მოსე თოიძე, გიგო გაბაშვილი, გრიგოლ მესხი; მოქანდაკე იაკობ ნიკოლაძე, მომღერალი ვანო სარაჯიშვილი; პროფესორები: ფილიპე გოგიჩაიშვილი, სოლომონ ჩოლოყაშვილი, საქართველოს მომავალი პატ-რიარქი კორიონ შეორე და სხვ.

იგი დიდად ზრუნავდა თავისი მუშების სწავლა-განვითარებაზე – წერა-კითხვის მცოდნე მუშებს ხელფასს უმატებდა, გახსნა სამკითხველოები და საკვირაო სკოლები მათვის, მას გამოარჩევდა მუშებისადმი პუმანური მოპყრობა, დაუწესა მათ 8 საათიანი სამუშაო დღე, აძლევდა მათ 14-დღიან შვებულებას, აზღვევდა მათ სიცოცხლეს და ამაში სერიოზულ თანხებს იხდიდა, დიდ დღესასწაულებზე მუშებს სამ ბოთლ კონიაქს ჩუქნიდა.

სიკვდილის შემდეგ მან მთელი ქონება ანდერძით დაუტოვა ქართველ ხალხს, მათ შორის 250 ათასი მანეთი მუშებს და მომსახურე პერსონალს. 300 ათასი მანეთი მან დაუტოვა ქართველთა შორის წერა-კითხვის გამავრცელებელ საზოგადოებას. თითქმის მთლიანად მისი თანხებით აშენდა თბილისის უნივერსიტეტის მომავალი შენობა (I კორპუსი), ქაშუეთის ეკლესია, ეხმარებოდა თეატრებს,

გაზეთებს, საისტორიო საზოგადოებას, შემოქმედებს და ა.შ.

ყველა ზემოჩამოთვლილი ფაქტი მიუთითებს იმაზე, რომ დავით სარაჯიშვილი ნამდვილად იყო ნოვატორი და შემოქმედი, იმდროინდელი ეკროპის ბიზნეს-ელიტის ღირ-სეული წევრი და ქველმოქმედი.

### პითხვები:

1. რა სიახლეები დაამკვიდრა დავით სარაჯიშვილმა ქართულ და მსოფლიო ბიზნესში?
2. როგორი იყო მისი ბიზნესის ფილოსოფია?
3. რით დაიმსახურა მან ქართველი ერის დიდი პატი-ვისცემა და სიყვარული?

## §12 ნოე ქორდანიას და ერმანული გთავრობის ევროპიზაციის კონცეფცია

ქართველი პოლიტიკოსებიდან ნოე ქორდანია (1868-1953) ერთ-ერთი პირველი იყო, რომელმაც განათლება ევროპაში მიიღო და საბოლოოდ ემიგრაციაში ყოფნა სიკვდილამდე მოუწია დამოუკიდებელი საქართველოს ბოლშევიკური რუსეთის მიერ ანექსიის გამო. იგი ერთ-ერთი პირველია, რომელმაც ევროპული სოციალ-დემოკრატიული იდეები შემოიტანა საქართველოში. ფაქტიურად იგია პირველი ქართული პოლიტიკური პარტიის შემქნელი და თეორეტიკოსი. თავის მოხსენებაში („რა ვაკეთოთ“, შემდეგ დაიბეჭდა სხვა სათაურით „ეკონომიკური წარმატება და ეროვნება“) რომელიც შეიძლება ჩაითვალოს პირველ ქართულ პოლიტიკურ პროგრამად, მან სამი ფუნდამენტური საკითხი წამოსწინა ნინ (1893):

1. „ნივთიერი კეთილდღეობა, როგორც დედა-ბოძი ადამიანის ცხოვრებისა;
2. თავისუფლება მთელი ერისა და თითოეული პიროვნებისა, როგორც ხელშემწყობი პირობა უმთავრესი მიზნის მისაღწევად და როგორც უახლოესი საგანი მოწინავე დასის მოქმედებისა: აქედან:
3. ეროვნული გრძნობა მთელი ხალხისა და ადამიანური უფლებანი, კაცური ღირსებანი თითოეული პირისა აღზრდილი და აღორძინებული უნდა იქნას ეკონომიკურ ნიადაგზე“.

ეს იყო იმ დროისათვის ძალზე პროგრესული და აქტუალური მოთხოვნა და მას დიდი მნიშვნელობა ჰქონდა არა მარტო საქართველოსათვის: თანამედროვეობის სამი

უმთავრესი იდეალი – ერისა და პიროვნების თავისუფლება და ადამიანის უფლებები – ნოე უორდანიამ ჯერ კიდევ XIX საუკუნის ბოლოს აქცია პირველი ქართული პოლიტიკური ჯგუფის (მესამე დასი) მოქმედების ქვაკუთხედად და ცივი-ლიზაციის უმნიშვნელოვანესი მონაპოვარი – უცხო ქვეყნის კოლონიური ბატონობისაგან განთავისუფლების იდეა, რომელიც აშშ-ის დამოუკიდებლობის აქტშია (1776 წლის 4 ივლისი) აღიარებული და ადამიანის, პიროვნების თავისუფლების იდეა, რომელიც საფრანგეთის რევოლუციამ დიდ საკაცობრიო ლირებულებად აქცია (1789 წლის 14 ივლისი) ერთმანეთთან დააკავშირა და საერთაშორისო მნიშვნელობის მქონედ აქცია. იგივე შეიძლება ითქვას ადამიანის უფლებებზეც, რომლის სრულყოფა 1948 წელს დაიწყო „ადამიანის უფლებათა საყოველთაო დეკლარაციით“ და დღემდე გრძელდება. ამ ყველაფერთან ერთად ნოე უორდანიამ ერისა და პიროვნების თავისუფლებანი პიროვნების ნივთიერი ანუ სოციალური კეთილდღეობის უმნიშვნელოვანეს იდეასთან დააკავშირა (რაც დღეს ყველა ცივილიზებული ქვეყნის და მთავრობის უმთავრესი საზრუნავი და სამოქმედო გეგმაა. ამით ნოე უორდანიამ გადალახა არა მარტო მარქსიზმის კლასობრივი ბრძოლის საზღვრები, არამედ გააფართოვა დემოკრატიის ცნების საზღვარიც.

შემდგომ პერიოდში (1893-1898), ევროპაში ყოფნის დროს, ნოე უორდანიამ კიდევ უფრო დახვეწა მის მიერ შედგენილი პროგრამა, წამოაყენა გაევროპელების იდეა და ახალი სამოქმედო პროგრამა საქართველოსათვის: „ჩვენ ქართველებს, – წერდა იგი, – რომლებმაც ერთი ევროპული ხანა – ფეოდალური, უკვე გამოვიარეთ, ევროპა ვერას დაგვაკლებს. ის ჩვენი მტერი არ არის, პირიქით, ის

არის სისხლი სისხლთაგანი ჩვენი და ხორცი – ხორცთაგანი ჩვენი. ჩვენ ჩვენითვე ვევროპელდებით და მაშასადამე, მის გვერდით, მასთან შეკავშირებით ჩვენითვე უნდა ვიცხოვ-როთ (შენიშვნა: ვერც ერთი ხალხი ვერ ევროპელდება გო-ნებით, პოლიტიკურად, თუ ის ვერ ევროპელდება ცხოვრე-ბით, ეკონომიკურად). ქართველობაშ თვითონვე უნდა განა-ვითაროს ძალა, აღიძრას ენერგია, გაანაყოფიეროს შრომა. თვითმოქმედება, თვითმოძრაობა, თვითაზროვნება – აი, რა უნდა ეწეროს მის დროშაზე. ყველა ის, რაც ამ გზაზე გვაძრკოლებს, ძიძაობას გვინევს, ასპარეზს გვივინროებს, გვაძინებს, გვაზარმაცებს – აი, ეს ჩვენი პირდაპირი მტე-რია, მომავლის ორმოს ამომთხრელია“.

ამ დასკვნაში მნიშვნელოვანია ისიც, რომ ნოე უორდა-ნისას გაევროპელება (კულტურულ-ეკონომიკური თვალსაზ-რისით) შესაძლებლად მიაჩნდა მხოლოდ ქართულ ნიადაგ-ზე, ქართულ კულტურაზე, ქართული ცხოვრების ნესზე დაყრდნობით და არა ყოველივე ევროპულის ბრძად და ხე-ლოვნურად გადმონერგვის გზით: „გაევროპელება წარმო-ებს ქართულ ნიადაგზე, ქართულ კულტურაზე. სამშობლო და უცხოეთი, საქართველო და ევროპა, ქართველობა და ევროპელობა – აი, რა წერია ახალ დროშაზე“. ეს ეხებოდა მარქსიზმისა და სოციალ-დემოკრატიის ევროპულ იდეა-საც, რომელიც ნოე უორდანიამ და მისმა მიმდევრებმა ეროვნულ ნიადგაზე დაამყნეს, თუმცა ცალკეული შეცდო-მები თავიდან ვერ აიცილეს.

ზემოდასახელებულ ნაშრომში ნოე უორდანია ერთმა-ნეთს უდარებს სომხურ და ევროპულ კაპიტალს საქართვე-ლოში და ასეთ დასკვნას აკეთებს: „სომხები წარმოადგენენ მევახშე, საჩარჩო კაპიტალს. ფული ფულს იგებს არა წარ-

მოებით, საქმეში დაბანდებით, არამედ ვექსილის ქაღალ-დით, „ნეუსტონიკით“, მოტყუებით, კანონიერი უკანონობით, ამისათვის მათი მოქმედება კონსერვატიულია. ევროპელნი კი მრეწველობას მისდევენ, ვაჭრობაში პატიონსება შე-აქვთ, ქვეყანა ევროპულ გზაზე გამოყავთ და მით პროგრე-სულ როლს თამაშობენ“.

ამრიგად, ნოე უორდანიასათვის პოლიტიკური მოღვა-ნეობის დასაწყისიდან სამაგალითო იყო პოლიტიკური, ეკონომიკური, სოციალური და კულტურული პროგრესის ის გზა, რომელიც გაიარა ევროპამ და არა რუსეთმა. მისი თეზისები და პროგრამაც სოციალიზირებულია ევროპული სოციალ-დემოკრატიის ყაიდაზე და არ ქადაგებს ძალმომ-რეობას, დიდ სოციალურ კონფლიქტებს, რითაც ნოე უორ-დანია მკეთრად გაემიჯნა რუსულ მარქსიზმს.

დავით სარაჯიშვილის მაგალითზე, რომელსაც ნოე უორდანია თვლიდა პირველ ქართველ ევროპული ტიპის მრეწველად, მან ნამოაყენა ქართველთა გაევროპელების თავისებური ფორმულა (საქები ევროპელობა + საქები ქარ-თველობა): „როცა თითოეული ჩვენგანი ისწავლის ევრო-პულ მუშაობას, ევროპულ საქმიანობას და თან ნაციონა-ლურ ხასიათს არ დავკარგავთ – ჩვენი გაევროპელება ფაქ-ტი იქნება“.

ევროპაში იძულებით ემიგრაციასა და მრავალი წლის განმავლობაში იქ ცხოვრების დროს ნოე უორდანია კიდევ უფრო ცხადად დარწმუნდა, რომ „ევროპის გზა მსოფლიო გზაა, ახლა ისტორიას სხვა გზა არ გამოუგონია და თავის-თავად მისახვედრია ჩვენი მასზე შედგომა“. ევროპულ გზა-ზე ქართველთა დაგვიანებით შედგომა, უორდანიას აზრით, ჩვენთვის შეიძლება დიდად სასარგებლო გამოდგეს, თუ მას

სწორი შეხედულებით მივუდგებით და ევროპელთა შეცდო-  
მებს ამ გზაზე არ გავიმეორებთ: „რაკი ჩავდექით ევროპის  
ფერხულში, ვიცით რას ვაკეთებთ, საითკენ მივემართებით,  
მაგალითი გადაშლილია. ჩვენი მოვალეობაა, წმინდა მოვა-  
ლეობაა მხოლოდ ერთი: ვიყოთ ოვალხილული, გავარჩიოთ  
ავი და კარგი, მივიღოთ მისალები და უარვყოთ უარსა-  
ყოფი. უეჭველად მისალებია ევროპის შრომის საშუალება-  
ნი, მისი ტექნიკა, მისი მეცნიერება, მისი ნივთიერი და სუ-  
ლიერი კულტურა. არაა მისალები მთელი ამ განძის ცალ-  
მხრივი, ეგოისტური ხელმძღვანელობა, მისი კერძო ინტე-  
რესების იარაღად გადაქცევა, ერთი ჯგუფის ხელში დატო-  
ვება და მის გასამღიდრებლად და ხალხის გასაძარცვავად  
გამოყენება... ჩვენ გვინდა ვიყოთ ევროპიელი, მაგრამ არა  
ერთიმეორის მტერი და მჩაგვრელი, არა დაბრშავებული  
და უტიფარი“.

ამავე დიალექტიკით უდგება ნოე უორდანია გენდერულ  
საკითხს ევროპასა და საქართველოში, რასაც იგი გადმოს-  
ცემს თავის წიგნში „წიგნი ოჯახში საკითხავი“ (პარიზი,  
1936).

უორდანიას აზრით, ფეოდალურ ხანას ამ საკითხში ერ-  
თი დიდი დამსახურება მიუძღვის: მან რაინდული წესებით  
ასწია ქალის მნიშვნელობა, შექმნა მისი კულტი – შეხე-  
დულება, რაც წინათ კაცობრიობას არ ჰქონებია: ქალის პა-  
ტივისცემა, მის წინაშე ფეხზე დგომა, მის ხელზე მთხვევა,  
მისთვის მოწინებით მოპყრობა და მისთვის სამსახურის გა-  
ნევა მოდიოდა შუა საუკუნეებიდან. XIX საუკუნის ბოლო-  
დან ეს მკვეთრად შეიცვალა და სქესთა თანასწორობის  
(ემანსიპაციის) ლოზუნგით რეალურად ქალს პატივისცემა  
მოაკლდა: „ამ ბოლო წლებში, – წერს იგი, – სამრეწველო

ცივილიზაციის ნიადაგზე ოჯახის გამოკვებისა და თავის რჩენის საქმეში ჩაება ქალიც. ისიც იძულებული გახდა მა-მაკაცივით იმუშაოს ფაბრიკა-ქარხნებში და იმსახუროს. ე.ი. მის ერთ ბუნებრივ მოვალეობას დაემატა მეორე, რომე-ლიც ებრძვის პირველს. მისი მდგომარეობა, მაშასადამე, გაუარესდა და ამით დაზარალდა მთელი საზოგადოება.

ამით ქალმა ვერ მოიპოვა ვერც უპირატესობა, ვერც პატივისცემა, ვერც თანასწორობა. ძველად, როცა ქალი ჩაბმული არ იყო საკვების მოპოვების საქმეში, გაცილებით მეტი პატივისცემა პქონდა და დაფასება, ვიდრე ახლა, მისი „ემანსიპაციის“ ხანაში... საზოგადოებას დღეს გაცილებით უფრო აინტერესებს საღი შინაური პირუტყვი, ვიდრე – სა-ღი თაობა. გამოიგონეს სპორტი და გიმნასტიკა, ვითომ ეს იძლეოდეს საღ ახალგაზრობას. ეს უბრალო თავის შექცე-ვაა, დაფარვა ნამდვილი წამლის. საღ თაობას იძლევა მხო-ლოდ საღი დედა. ჩაჭრებული მისი ბუნების შესაფერის პირობებში. დედა აფორიაქებული გაჭირვებით, მძებნელი სამუშაოსი, გამოგდებული ქუჩაზე ალალბედზე, მოუსვენა-რი, უმწეო, მუდმივ შიშმი ლუკმაპურისათვის – რა იქნება მისი შვილი, თუ არა სულიერად მახინჯი, ფიზიკურად სუსტი.

ნოე უორდანია აქვე მიუთითებს იმასაც, რომ „ყველა ერებს შორის, რომელთაც კი ვიცნობ, ქალი ნაკლებ დამო-ნებულია, მეტად პატივცემულია ქართველებში. ყველგან ის ეწევა მძიმე ფიზიკურ მუშაობასაც მამაკაცის გვერდით, ჩვენში კი ქალი მხოლოდ საოჯახო საქმეებს ხედავს (თუმ-ცა, ჩვენში ბოლო ოცნლეულში მდგომარეობა უარესობის-კენ შეიცვალა – ვ. შ.).“

ნოე უორდანია ალნიშნავს, რომ ქართველი ქალი ულა-  
მაზესი ქალია, მაგრამ ამ რასის დაცვა მოხდა დედის დაც-  
ვით. ჩვენში თავიდანვე ქალს ჰქონდა უპირატესობა კაცის  
ნინაშე. თვით ქართული ენა ამონმებს ამ თვისებას, როცა  
ორივე სქესია დახასიათებულია, პირველად სახელდება  
უეჭველად ქალი. იტყვიან: ქალ-ვაუი, დედ-მამა, ცოლ-ქმა-  
რი, და-ძმა – არასოდეს პირუკულმა. ყველა სხვა ხალხებში  
ეს პირიქითაა. ქალი ჩვენთან მუდამ იყო ოჯახის გამგე, მას  
ეკითხებოდა მთელი შინაური დაწყობილება, ბავშვების  
მოვლა-პატრონობა, თავისუფალი იყო ფიზიკური შრომი-  
საგან. პირველს ქალს ადლეგრძელებდნენ ნვეულებაში –  
რა დიდი პიროვნებაც უნდა ყოფილიყო ნვეულ მამაკაცებს  
შორის.

საფრანგეთის ყველა კუთხე დავლილი მაქვს და მხო-  
ლოდ ერთხელ შევხვდი გლეხის ქალს თვალტანადს, ხოლო  
მისი მსგავსი ჩვენში ყოველ ფეხის ნაბიჯზეა“.

ნოე უორდანიას აზრით, „ქალთა გენდერული თანასწო-  
რობა თავის მოტყუებაა. არავითარი იურიდიული ნორმით  
მისი გადაწყვეტა არ შეიძლება. არ შეიძლება ქალის და  
კაცის გათანასწორება. მიეცით ქალს ყველა უფლება – აქე-  
დან მისი ძირითადი მდგომარეობა არ შეიცვლება. არ შე-  
იცვლება ის, რომ იგი, პირველ ყოვლისა, დედაა და მას  
მორჩილებს მთელი მისი ცხოვრება. მრავალ ქვეყანაში  
სქესთა სრული თანასწორობაა. მერმე რამდენი პოლიტი-  
კური მოღვაწე გამოჩენდა ქალებიდან? რამდენი გამოჩენი-  
ლი მეცნიერი გამოვიდა ქალებიდან? ვინ უშლის ხელს?  
უშლის ის, რომ ქალს უფრო დიდი საქმე აქვს გასაკეთე-  
ბელი, ვინემ პოლიტიკა და მეცნიერებაა, ის აჩენს და უვ-  
ლის სიცოცხლეს, ე.ი. იმ საფუძველს, რასაც პოლიტიკა და

მეცნიერება უნდა ემსახუროს. აი, ეს უბრალო ამბავი ვერ გაიგო მამაკაცმა დღემდე. მას თავი მოაქვს თავისი პოლიტიკით, მეცნიერებით, მხედრობით და ვერ ამჩნევს მის გვერდით თუ რა დიდი, უდიდესი საქმე კეთდება და რის შედეგიც თვითონაა“.

ნოე უორდანიას გონივრული მოსაზრებით, ქალის პატივი მომდინარეობს შვილის პატივისაგან, ე.ი. იქ, სადაც შვილის და კარგი შვილის ყოლას დიდად აფასებენ, მას ნატრულობენ, მას შეტრფიან – იქ ქალი პატივშია, იქ მისი ავტორიტეტი დიდია. ახლა ლამაზ ქალს ეძებენ არა ლამაზი შვილისათვის, არამედ სიამოვნებისათვის. პატარა ერისათვის ამას დიდი მნიშვნელობა აქვს. ასეთი გაევროპელება ქართველ ერს დიდ საშიშროებას უქადის: ჩვენთან ქალს პატივს სცემდნენ არა მარტო მამაკაცები. მთავარია ის, რომ ის თავის თავს სცემდა პატივს – მას თავი ამაყად ეჭირა, ახირებულად ვერავინ შებედავდა. მან თავისი ფასი და ლირებულება იცოდა, თავმომწონეობა არ აკლდა. მაგრამ ამავე დროს არ იყო ეგოისტი, თავმოყვარეობით შეპყრობილი. ის ითხოვდა პატივისცემას როგორც ქალი, დედა, შთამომავლობის სათავე“.

უორდანიას აზრით, ქალის მუშაობა ყანაში და ფაბრიკაში სავსებით ანტიბუნებრივია, არღვევს გამრავლებისა და შენახვის საფუძველს. ასეთ ევროპულ ემანსიისაციას ნოე უორდანია ქალის ახლებურად დამონებას და უკან გადადგმულ ნაბიჯს უწოდებს, ხოლო ქალის უფლების ნამდვილად დაცვად მიიჩნევს ოჯახის დაცვას, მისი მთავარი. ასპარეზის შენახვას.

ნოე უორდანია წერს, რომ „ოჯახური წყობა სხვადასხვა საფუძველზე სხვადასხვა სახის და ძალისაა. ქართველებში

ის გაცილებით ძლიერია, ვიღრე საფრანგეთში (და ევროპელებში). ჩვენ კიდევ არ გამოვსულვართ გვარის რკალიდან, საერთო შთამომავლობის ურთიერთობისაგან. ეს ამაგრებდა და ამაგრებს დღეს ჩვენს ერს მიუხედავად მასზე მოწოლილი მუდმივი დამარტივეველი ელემენტებისა, მასზე გრიგალივით გადაივლიდა მრავალნაირი ურდოები, წალე-კავდა ყოველივეს, მაგრამ ვერ წალეკავდა ძირითად ასო-ციაციას – ოჯახს და გვარს და ესენი ერთიმეორეს დახმა-რებით ისევ ფეხზე დგებოდნენ – ერი არ კვდებოდა“.

ნოე უორდანია ასევე მწვავედ აკრიტიკებს ევროპაში (და მსოფლიოში) დამკვიდრებულ ქალ-ვაჟის ერთად ცხოვ-რებას მათ ოფიციალურ ქორწინებამდე. თუ შეენყვნენ ზნე-ხასიათით, შემდეგ ჯვარს იწერენ. მისი აზრით, ეს არის ყველაზე უარესი გამოსავალი, ვინაიდან შეულლების მთა-ვარი მიზანი და სახეობა წინდანინვე უარყოფილია: აქ არც ოჯახია, არც შვილები, ის უფრო წააგავს პროსტიტუციას; ასევე ნათესაური ქორწინებანი (რახაც დღეს სერიალებით გვაჩეჩებენ – ვ. შ.), ხელ უწყობს ხალხის, ერის გადაგვარე-ბას” – დაასკვნის იგი. უორდანიას აზრით, არასოდეს ქალი ისე ჩქარა არ ბერდებოდა, როგორც ახლა. ის ხაზს უსვამს იმას, რომ ქალი იძულებული არ უნდა იყოს ლუკმა-პური ეძიოს. მისი აზრით, „განათლებულ“ ქვეყნებში თანდათან იკარგება ბუნებრიობა, ბუნების კანონებისადმი ერთგულე-ბა, სალი გონების ბატონობა და ფეხს იკიდებს ხელოვნური კომბინაციები, გამოგონილი არაბუნებრივი შეხედულებე-ბი, მოდები, დიეტები და ფანტასტიკური კომბინაციები: წამოყენებულია, პირველ რიგში, პირადი „მე“, მისი სია-მოვნება და დროსტარება. ყველა სხვა მხარე ცხოვრებისა უკანაა. დაყენებული, ამათ შორის მოვალეობა ოჯახის,

შთამომავლობის მიმართ. საზოგადოდ, ყველა უფლებას ეძებს, მოვალეობას კი – უკუაგდებს. ჩვენს პატრიარქ ქართველ ერს არ მართებს აყვეს ავში ამ ხალხებს, რომელნიც დიდი ხანი არ არის, რაც ისტორიის ასპარეზზე გამოჩდნენ და მოქროლავენ ცის ქვეშ, საითკენ – თვითონაც არ იციან“.

ნოე უორდანიას დასკვნით, საქართველო ევროპაში უნდა შევიდეს არა რუსეთთან ერთად, არამედ როგორც დამოუკიდებელი, თავისუფალი ქვეყანა. მისი აზრით, რუსეთმა ორჯერ აქცია ზურგი ევროპას (პეტრე I-სა შემდგომ და ხელისუფლებაში ბოლშევიკების მოსვლის დღიდან), „საქართველო კი მუდამ ევროპისაკენ ისწრაფოდა... საქართველო თავისი ისტორიული, სოციალური ძირითადი შენობით ნაჭერია ევროპის, დასავლეთის კულტურის და მისი შუა გზაზე ძალით, უცხო ხიშტებით გაჩერება, მისთვის არაევროპული ურთიერთობის (რუსული ბოლშევიზმი – ვ. შ.) თავზე მოხვევა იქნება ხალხის სიკვდილი, ერის გადაშენება. რუსეთს არ მოელის ასეთი გადაშენება, ვინაიდან ის თავის ისტორიულ საფუძველზე დგას – აზიელობა, ბოლოს და ბოლოს, უნდა გათავდეს ევროპიელობით, ეს ბუნებრივი მსვლელობაა. მაგრამ ევროპული ერის – საქართველოს გააზიელება ძალმომრეობით – ეს სრული არევაა ბუნებრივი მსვლელობის, ეს სასიკვდილო ნახტომია. ჩვენი მომავლის რუსეთის მომავალთან გადაბმა ნიშნავს ჩვენს სავსებით განადგურებას არა მარტო პოლიტიკურად და ნაციონალურად, არამედ ფიზიკურადაც... ბოლშევიზმის ხიდან დემოკრატიზმი ვერ ჩამოვარდება. ეს შორეული ეტაპია. ამიტომაც გვინდა, რომ საქართველო ჩამოშორდეს დროულად ამ რუსულ ექსპერიმენტებს, აღადგინოს თავისი

სუვერენობა და წინ გასწიოს საკუთარი გზით ქართველი ერი უნდა შევიდეს საბოლოოდ ევროპის ოჯახში“.

საბჭოთა რუსეთის მიერ ძალით დაპყრობილი დამოუკიდებელი საქართველოს ეროვნული მთავრობა წოე უორდანიას მეთაურობით, დამფუძნებელი კრების დადგენილებით მიდის ემიგრაციაში არა ირან-თურქეთში, სადაც მიდიოდნენ ადრე ჩვენი იძულებით გაქცეული ხელისუფალნი, არა-მედ ევროპაში. ჯერ კიდევ ხელისუფლებაში ყოფნის დროს მათ უარყვეს რუსული მარქსიზმის ყველა ძირითადი დებულება, პრაქტიკული საფუძველი ჩაუყარეს საქართველოს ევროპულ ორიენტაციას და ევროპული ფასეულობების დამკვიდრებას, თანამედროვე ევროპულ სოციალ-დემოკრატიულ იდეებსა და მიმართულებას.

ემიგრაციაში (საფრანგეთში) ყოფნის დროს წოე უორდანიამ თავი გამოიჩინა, როგორც საქართველოს დამოუკიდებლობის აღდგენისათვის დაუღალავმა მებრძოლმა. მისმა სოვეტოლოგიურმა და პოლიტოლოგიურმა ნაშრომებმა, ანალიზმა და დასკვნებმა დიდი აღიარება მოიპოვა ევროპაში. მან ჯერ კიდევ 1920-იანი წლების შუახანებში თითქმის წინასწარმეტყველურად, ზუსტად დაასაბუთა საბჭოთა და კომუნისტური სისტემის კრახის ეკონომიკური, სამხედრო და პოლიტიკური მიზეზები და წანამძღვრები, რაც 30 წლის შემდეგ გააკეთეს პაიპსმა და ბუეზინსკიმ (აშშ).

წოე უორდანიამ ასევე თავისებურად დაასაბუთა თანამედროვე გლობალური ერის დადგომის აუცილებლობა, როცა დაწერა, რომ „კაცობრიობა საშინელი სისწრაფით მიისწრაფვის ერთობისკენ. ის შემოზღუდულია ერთი გალავნით, რომლის საფუძველი ღრმად არის ჩაფლული და

ფესვებგადმგმული ნივთიერ ურთიერთობაში”. ყოველივე ამას დღეს გლობალიზაციას ეძახიან.

### პითევები:

1. რა იდეალები წამოსწია თავის პირველ საპროგრამო დოკუმენტში ნოე უორდანიამ?
2. როგორია საქართველოს გაევროპელების უორდანია-სეული ფორმულა?
3. როგორია უორდანიას მოსაზრებები ქართულ-ევრო-პული გენდერული პარალელების შესახებ?
4. როგორ უნდა შევიდეს საქართველო ევროპაში უორ-დანიას თვალსაზრისით?

## §13 ევროინტეგრაცია და ევროპულობიაში შესახები მართული ნიული

თანამედროვე ევროინტეგრაციის იდეის ჩამოყალიბება-  
სა და განხორციელებაში (II მსოფლიო ომის შემდეგ) ცნო-  
ბილ ევროპელ მეცნიერთა და პოლიტიკოსთა შორის საპა-  
ტიო ადგილი უკავია ორ ქართველ ემიგრანტ-მკვლევარს,  
პროფესორებს მიხეილ მუსხელიშვილსა (1903-1964) და  
ალექსანდრე ნიკურაძეს (1901-1981).

პროფესორმა ილია ჭაბალუამ მიხეილ მუსხელიშვილს  
(ევროპაში მას იცნობდნენ როგორც მიხეილ მუსხელს)  
„ერთიანი ევროპის“ სულისჩამდგმელი და ორგანიზატორი  
უწოდა. მიხეილი დაიბადა 1903 წელს თბილისში, ცნობილი  
თვალის ექიმის ვახტანგ მუსხელიშვილის ოჯახში. მიხე-  
ილმა და მისმა სამმა ძმამ (ლევანი, გიორგი, სოლომონი)  
თბილისში დაამთავრეს ლევანდოვსკის გიმნაზია და ოთხი-  
ვემ საზღვარგარეთ მიიღო უმაღლესი განათლება.

1932-1933 წლებში იგი უკვე ლექციებს კითხულობდა  
პარიზის უნივერსიტეტის საერთაშორისო გამოკვლევათა  
უმაღლეს ინსტიტუტში. 1935-1948 წლებში მიხეილი მუ-  
შაობდა ქაიროს სამართლის ფრანგული სკოლისა და ქაი-  
როს უნივერსიტეტის პროფესორად. ამის შემდეგ იგი  
კვლავ ბრუნდება საფრანგეთში, ქ. სტრასბურგში და 1948-  
1964 წლებში, სიცოცხლის ბოლომდე იყო სტრასბურგის  
უნივერსიტეტის იურიდიულ და პოლიტიკურ მეცნიერება-  
თა ფაკულტეტის წამყვანი პროფესორი.

მიხეილ მუსხელიშვილი ევროპაში ეწეოდა ფართო სა-  
მეცნიერო და საზოგადოებრივ მოღვაწეობას. 1948 წელს  
იგი გახდა საუნივერსიტეტთა შორისო ფედერაციის პრეზი-

დენტ-დამაარსებელი, ხოლო 1954 წლიდან ევროპის უნი-  
ვერსიტეტთა ასოციაციის დამაარსებელი და გენერალური  
მდივანი.

ევროპის ამჟამინდელ პოლიტიკურ ცენტრში – სტრას-  
ბურგში მიხეილმა შექმნა ძალიან ავტორიტეტული სამეც-  
ნიერო დაწესებულება „მუსხელის ცენტრი“, რომელიც იკვ-  
ლევდა ევროპინტეგრაციის საკითხებს, სწავლობდა საბჭო-  
თა კავშირში მიმდინარე მოვლენებს საერთაშორისო სა-  
მართლის კუთხით. ამ ცენტრში მან დააარსა საერთაშო-  
რისო სამეცნიერო კრებული, რომელშიც მონაწილეობდნენ  
გამოჩენილი მეცნიერები უორუ კედელი, რობბერ მოსსე,  
გუი ერო, ანრი შამბრი და სხვები. პროფესორმა მიხეილ  
მუსხელიშვილმა გარდაცვალებამდე მოასწრო ამ ცენტრის  
კრებულის 2 დიდი ტომის მომზადება და გამოცემა, რომ-  
ლებსაც უძლვის მისი ვრცელი წინასიტყვაობა. ორივე  
ტომმა დიდი გამოხმაურება პეოვა როგორც საერთაშორი-  
სო იურიდიულ მეცნიერებათა სამყაროში, ასევე პრესაში  
(„ფიგარო“, 2.03.1965). მიხეილ მუსხელიშვილის სტატიები  
იბეჭდებოდა ცნობილ უურნალებსა და სამეცნიერო კრებუ-  
ლებში გერმანულ, ინგლისურ და ფრანგულ ენებზე. მისი  
სტატიები ქვეყნდებოდა ასევე პარიზში გამომავალ ქარ-  
თულ უურნალში „ბედი ქართლისა“ (მაგ.: „საქართველო და  
ევროპა“, №15, 1953, გვ. 1-3; „ერთა თვითგამორკვევის უფ-  
ლებისათვის“, №18, 1954, გვ. 15-16 (საინტერესოა, რომ მან  
ფრანგულ უურნალში „მონდ ნუვო“, №89-90, 1955, დაბეჭ-  
და სტატია სათაურით „საბჭოთა კავშირი და ევროპა“,  
სადაც ამტკიცებს, რომ რუსეთი არ არის ევროპა).

სახელმოხვეჭილ ქართველ მეცნიერს ლექციების წასა-  
კითხად ხშირად იწვევდნენ აშშ-ში, ნორვეგიაში, იტალია-

ში. უურნალ „ბედი ქართლისა“-ს №17-ში ვკითხულობთ, რომ მიხეილ მუსხელიშვილმა 1954 წელს მოხსენება წაიკითხა ჩრდილოეთ ამერიკის ყველა დიდ ქალაქში: უნივერსიტეტებში, პოლიტიკურ და დიპლომატიურ წრეებში, რელიგიურ საზოგადოებებში. მის ლექციებს ყველგან დიდალი ხალხი ესწრებოდა. ვაშინგტონში მის მოხსენებაზე მთელი დიპლომატიურ წარმომადგენლობათა წევრები მივიდნენ. ამერიკიდან დაბრუნებისთანავე პროფესორი მუსხელიშვილი სკანდინავიაში გაემგზავრა ოსლოსა და უპსალას უნივერსიტეტების მიწვევით, სადაც მოხსენება წაიკითხა ევროპის ცივილიზაციის კრიზისზე და ევროპის კულტურის გაცოცხლების აუცილებლობაზე.

მიხეილ მუსხელი იყო ერთ-ერთი პირველი, რომელმაც ომის შემდგომი ევროპის გაერთიანების, მისი ფედერაციის იდეა წამოაჭენა და დაიცვა (რომელმაც დღეისათვის ევროკავშირის სახე მიიღო). მისი აზრით, ევროპული ფედერალიზმი – ეს არის არა მარტო სასიცოცხლო აუცილებლობა ევროპელი ერებისათვის, არამედ მშვიდობის განმტკიცებისა და ევროპაში საერთო აყვავების, ადამიანთა თავისუფლებისა და ღირსების დაცვის გარანტია (იხ.: მისი ნაშრომი „ევროპის ფედერალიზმის სტრუქტურა“).

მიხეილ მუსხელიშვილი იყო ევროპის ხალხთა კონგრესის, ერთიანი ევროპის შექმნის სულისჩამდგმელი, ორგანიზატორი და პირველი პრეზიდენტი, „ფედერალური ევროპის მოძრაობის“ კომიტეტის წევრი, ევროპის ერთიანობის საერთაშორისო ცენტრის ბიუროს ვიცე-პრეზიდენტი. იგი აქტიურად მონაწილეობდა საფრანგეთში „ერთიანი ევროპის“ წამომადგენელთა არჩევნებში, იყო უურნალ „ევროპის ფორმირება“ რედაქციის კომიტეტის წევრი. **1953 წლის 10**

აგვისტოს ოფიციალურად დაარსდა „ევროპული ქართული მოძრაობა“ (საპატიო თავმჯდომარე პროფესორი მიხაელ წერეთელი), რომლის სულისხამდგმელი ასევე მიხეილ მუსხელიშვილი იყო.

მკვლევარი არ კმაყოფილდებოდა წმინდა იურიდიული მეცნიერებით და აქტიურად ჩაერთო ცოცხალ პოლიტიკურ ცხოვრებაშიც, იყო ადამიანისა და ერის უფლებების მგზნებარე დამცველი, საქართველოს ქომაგი. ასეთი დიდი ენერგიისა და გაქანების კაცს გაგიჟებით იტაცებდა ალპინისტობა, რომლის მსხვერპლიც შეიქმნა ბოლოს. 1964 წელს იტალიაში, აოსტას ხეობაში იგი კლდიდან ჩამოვარდა და ტრაგიკულად დაიღუპა (5 წლის მერე იტალიაში იგივე ბედი ეწია ლეგენდარულ მთასვლელს, 37 წლის მიხეილ ხერგიანს). მის დაკრძალვას მთელი სტრასბურგის უნივერსიტეტი დაესწრო. სიტყვა ნარმოთქვა უნივერსიტეტის რექტორმა ა. ვიელმა, დეკანმა რაუერმა, ევროპის საბჭოს გენერალური მდივნის მოადგილემ პოლ მოდინმა. დიდი მეცნიერი დაკრძალულია სტრასბურგის სასაფლაოზე და დღემდე უყურადღებოდა მიტოვებული თანამემამულეებისაგან.

სტატიაში „საქართველო და ევროპა“, 1953 წელს მიხეილ მუსხელიშვილი წერს, რომ „საჭიროა დღესვე ვიფიქროთ იმ ადგილზე, რომელსაც თავისუფალი საქართველო დაიკავებს ხვალინდელ მსოფლიოში... მეორე მსოფლიო ომმა საბოლოოდ დაასრულა ეროვნულ სახელმწიფოთა დამოუკიდებლობის ეპოქა (ამას მივუმატოთ დღევანდელი გლობალიზაციის მიერ შექმილი პრობლემებიც – ვ. შ.). მეცნიერებისა და ტექნიკის მიერ მოხდენილმა გრანდიოზულმა პროგრესმა შექმნა ისეთი ვითარება, რომელშიც

მხოლოდ დიდ პოლიტიკურ გაერთიანებებს შეუძლიათ არ-სებობა... რუსეთის უზარმაზარი იმპერიის შექმნის შემდეგ საქართველოს ჰყავს საშიში მეზობელი, რომლისთვისაც საქართველო ყოველთვის მაცდუნებელი ნადავლი იქნება. როგორ შეუძლია მას გარანტირებული იყოს რუსეთის იმპერიალიზმის საშიშროებისაგან? ამის შემდეგ ქართველი ხალხი იძულებული არჩევანის წინაშეა: ან იგი იძულებული იქნება რუსეთს შეუერთდეს, ან კიდევ კავშირები ეძებოს. სიმართლე რომ ვთქვა, მას არა აქვს არჩევანი იმ უბრალო მიზეზის გამო, რომ საქართველო ახლოსაა ევროპასთან და უცხოა რუსეთისათვის. შეგნებული აქვს რა ეს ფაქტი, საქართველო არასოდეს არ დათანხმდება რუსეთთან შეერთებაზე.

საქართველო, რუსეთისაგან განსხვავებით ევროპულია. ცნობილი არქეოლოგების აზრით, სწორედ აქ ინკუბა ევროპა. სინამდვილეში – ეს საქართველოდანაა, გვეუბნება ბატონი ვარანიაკი, – რომ დაიძრა ემიგრაციის პირველი ტალღა ევროპისაკენ. მოგვიანებით მჭიდრო ურთიერთობები დამყარდა საქართველოს და საბერძნეთს შორის. პომპეუსმა საქართველოში რომი შემოიყვანა და უკვე I საუკუნეში საქართველოში ქრისტიანობა შემოიჭრა, რომელმაც III საუკუნის დასაწყისიდან მთელი საქართველო მოიცვა. ამრიგად, დასავლეთის ცივილიზაციის გარიურაჟზე საქართველო მასში მონაწილეობდა. და დღეს შეიძლება ითქვას, რომ საქართველოს მზერა ყოველთვის მიმართული იყო დასავლეთისაკენ, სანამ იგი რუსეთმა არ დაიძყრო.

იყო პერიოდი, როცა ქართველებმა შეიიგნეს, რომ ისინი ევროპას მიეკუთვნებიან.

ევროპა ახლა აკეთებს ამ დასკვნას. ასევე აუცილებელია, რომ ქართველებმა დაამტკიცონ თავიანთი არსებობა ევროპაში და მიაღებინონ საქართველო ევროპულ ოჯახში... მხოლოდ ევროპის თავისუფალ და დემოკრატიულ სახელმწიფოთა ახოციაციაში განვერიანების შემდეგ შესძლებს ქართველი ერი დაიცვას თავისი ინდივიდუალობა, თავისი კულტურა და თავისი ტრადიციები და თავი დააღნიოს გიგანტურ რუსულ-აზიურ იმპერიაში შთანთქმის საშიშროებას“.

საქართველოს ევროპასთან ინტეგრაციის, ქართულ-ევროპული პარალელების ძიების და „ევროპოლოგიის“, როგორც სამეცნიერო ინტერ-დისციპლინარული დარგის, ჩამოყალიბებასა და განვითარებაში მნიშვნელოვანი წვლილი შეიტანა გამოჩენილმა ქართველმა ემიგრანტმა-მეცნიერმა, პროფესორმა **ალექსანდრე ნიკურაძემ**.

ქუთაისის გიმნაზიის დამთავრების შემდეგ ალექსანდრე ნიკურაძე თავის უფროს ძმასთან, ივანესთან (შემდეგში გერმანიაში მოღვაწე მსოფლიოში ცნობილი პიდრავლიკოსი, თეორიული მექანიკის პროფესორი) ერთად ჩაირიცხა ახლადგახსნილ თბილისის სახელმწიფო უნივერსიტეტში. მალე ნიჭიერი ძმები ივანე ჯავახიშვილისა და პეტრე მელიქიშვილის რეკომენდაციით სასწავლებლად გაგზავნეს გერმანიაში, სადაც მათ დიდი სახელი მოიხვეჭეს.

1930 წლიდან ალექსანდრე ნიკურაძე მუშაობდა მიუნჟენისა და ბერლინის უმაღლეს ტექნიკურ სასწავლებლებში. 1934 წელს ბერლინში გერმანულ ენაზე გამოქვეყნდა მისი გახმაურებული მონოგრაფია „თხევადი დიელექტროკები“, რომლის რუსული თარგმანი 1936 წელს გამოიცა მოსკოვში (მანამდე ასეთი წიგნი რუსებს არ ჰქონდათ).

თავისი ძირითადი სპეციალობის გარდა (მუშაობდა მყარი სხეულების ფიზიკაში და ენერგეტიკაში, ბოლოს განაგებდა საკუთარ ინსტიტუტს მიუნჰენში ამ სფეროში). ალექსანდრე ნიკურაძე გატაცებული იყო პოლიტიკით და ჰუმანიტარული მეცნიერების დარგებით, კერძოდ, გეოპოლიტიკით, ისტორიით, არქეოლოგიით, ლიტერატურით და ა.შ.

სამშობლოს მძიმე მდგომარეობით ღრმად შეწუხებულ-მა ალექსანდრემ გადაწყვიტა თანამშრომლობა დაეწყო გერმანიის ნაციონალ-სოციალისტური პარტიის ხელმძღვანელობასთან, რათა გერმანიის დახმარებით ალედგინათ საქართველოს დამოუკიდებლობა. მას ახლო კავშირი ჰქონდა ალფრედ როზენბერგთან, რომლის შეხედულებები კავკასიის მოვლენების მიმართ ემყარებოდა ალექსანდრე ნიკურაძის გავლენას. როზენბერგი ლობირებდა დამოუკიდებელ საქართველოს და ანტისაბჭოთა შეხედულებებით გამსჭვალულ ქართველ პოლიტიკურ ემიგრანტებს გერმანიის მხარდაჭერას ჰპირდებოდა. ცნობილი გეოპოლიტიკოსის კარლ ჰაუსჰოფერის „ფართო სივრცეების“ თეორიის გავლენის ქვეშ მყოფი ნიკურაძე მუშაობდა ჩანაფიქრზე, რომელიც მიზნად ისახავდა, ქართველებს წამყვანი როლი ეთამაშათ ერთიან კავკასიურ კონფედერაციაში. როზენბერგმა ალექსანდრე ნიკურაძეს კონტინენტალური ევროპის კვლევის ინსტიტუტი შეუქმნა, სადაც ამ თემის კვლევას აწარმოებდნენ ჰაუსჰოფერის თეორიის ჭრილში (ამ ინსტიტუტში მუშაობდა ცნობილი ქართველი ისტორიკოსი ზურაბ ავალიშვილი, რომელიც 1944 წელს გარდაიცვალა).

ალექსანდრე ნიკურაძე ფსევდონიმით „ა. ზანდერსი“ რამდენიმე გეოპოლიტიკური შინაარსის წიგნის ავტორია,

მათ შორისაა „კავკასია“ (გამოიცა სამჯერ – 1938, 1942, 1944, მიუნცენში), რომელშიც ის ნარმოაჩენს საქართველოს განსაკუთრებულ მნიშვნელობას კავკასიისათვის. მისი აზრით, საქართველოს, როგორც ცენტრალურსა და პოლიტიკურად ყველაზე უნარიან ქვეყანას კავკასიაში, იგივე როლი ენიჭებოდა, როგორც გერმანიას – ევროპაში. სწორედ ნიკურაძის გავლენას უნდა მივაწეროთ როზენბერგის პროქართული შეხედულებები – იგი ჯერ კიდევ 1927 წელს ანიჭებდა დიდ მნიშვნელობას კავკასიის როსეთისაგან გამოყოფას, ხოლო 1941 წლის აპრილში წერდა, რომ „კავკასიის ხალხებს შორის ქართველები ისტორიულად უთუოდ წამყვანები იყვნენ და ამიტომ ქართველები, შეიძლება ითქვას, მასპინძელი ხალხი უნდა გახდეს კავკასიური სახელმწიფოების კონფედერაციისა, რომლებმაც შესაძლებელია გერმანიას სთხოვონ მათი კულტურული და ეროვნული არსებობის დაცვა“.

1943 წელს გამოვიდა ალექსანდრე ნიკურაძის წიგნი „გადაწყვეტილებათა მიღების უამი“, შემდეგ კი მისი ნაშრომები „ევროპის ფორმირებისათვის“, დიდი ბრიტანეთის მემკვიდრეობის შესახებ“, „აღმოსავლეთ ევროპა“, „ოცნებითგან ვიდრე საქმემდე“ და სხვ. ყველა ზემოჩამოთვლილი წიგნი ეძღვნება კონტინენტალური ევროპის კვლევას, მის წარსულს, აწმყოსა და მომავალს და არის გეოპოლიტიკური შინაარსის. მისი ნაშრომი „აღმოსავლეთ ევროპა“ არის ორნანილიანი. პირველი ნაწილი მოიცავს პერიოდს უძველესი დროიდან მონლოლთა გამოჩენამდე. სწორედ ამ ნაწილშია შესული საკითხები კავკასიის შესახებ, რომელიც გადმოტანილია მისი წიგნიდან „კავკასია“ („კავკასიაში“ კონცეპტუალურად პირველად კავკასია წარმოდგენილია

ერთიან გეოგრაფიულ, ისტორიულ და პოლიტიკურ ერთეულად). ალექსანდრე ნიკურაძის თანამოაზრე იყო მისი ძმა ივანე (იობან) ნიკურაძე – მსოფლიოში აღიარებული პიდრავლიკოსი. იგი იმავდროულად მუშაობდა საბრძოლო თვითმფრინავებისა და ატომური ბომბის აეროდინამიკაზე. მან თავისი კვალი სამოქალაქო ინდუსტრიაშიც დატოვა, რადგან ივანე ნიკურაძის მოდელი პორშეს ფირმამ მიიღო, ასევე ცნობილი მოდელი 911 მისი ნახაზებითაა გაეთებული, 70-იან წლებში ევროპაში ცალლიანდაგიანი მატარებელი გამოვიდა, რომლის აეროდინამიკური თვალსაზრისი ივანე ნიკურაძის შემუშავებული გახლდათ. სავარაუდოა, ძმები ნიკურაძეების ღვანლი ექვთიმე თაყაიშვილისადმი მინდობილი საქართველოს ეროვნული განძის გადარჩენის საქმეშიც. ექვთიმე იხსენებდა გერმანელი ოფიცრის ფორმაში გადაცმულ ორ ქართველს, რომლებიც პარიზში გერმანელი ფაშისტების შესვლისთანავე გამოეცხადდნენ და მას განძის დამალვაში მიეხმარნენ (დავით პაიჭაძე).

ალექსანდრე ნიკურაძის წიგნში „ოცნებიდგან ვიდრე საქმემდე“ (1951) მოცემულია ნათელი დებულებანი ევრო-ინტეგრაციის იდეისათვის და ევროპის მომავლისათვის, ასევე საქართველოს ისტორიისათვის. 1951 წლის სექტემბერში მან პარიზის ქართულ სათვისტომოში წაიკითხა მოხსენება „ზოგადი სურათები ქართულ-ევროპული წარსულიდან“, სადაც გამოთქმული იყო ორიგინალური იდეები.

1952 წლის 22-24 სექტემბერს საფრანგეთში, ქ. კომპი-ენთან ალექსანდრე ნიკურაძის ინიციატივით „ლა ბრევიე-რის“ სასახლეში შედგა ევროპელ მეცნიერთა კონგრესი,

რომელსაც დაესწრენ მეცნიერები საფრანგეთიდან, გერმანიიდან, იტალიიდან, ინგლისიდან, შვეიცარიანი, თურქეთიდან და სხვა ქვეყნებიდან. კონგრესის საგანი იყო ეპროპული საკითხების მეცნიერული კვლევა-ძიება. სხვა ნინადადებათა შორის კონგრესმა მიიღო პროფესორ ალექსანდრე ნიკურაძის „ეპროპოლოგის“ შემოღების შესახებ, რომელიც წარმოადგენს ევროპულ სხვადასხვა მეცნიერული დარგების თავმოყრას და ერთ სწავლებად ჩამოყალიბებას (კონგრესის მუშაობაში აქტიურ მონაწილეობას იღებდა პროფესორი მიხეილ მუსხელიშვილი).

სახელგანთქმულ მეცნიერს ალექსანდრე ნიკურაძეს ლექციების წასაკითხად იწვევდნენ პარიზის, ვაშინგტონის, ბერლინისა და მიუნხენის უნივერსიტეტებში, ოქსფორდში გამართულ მეცნიერთა მსოფლიო კონგრესზე. 1956 წელს პარიზში ფრანგულ ენაზე გამოქვეყნდა მისი ნაშრომი „არგონავტების მითი“. მაღალი დონით გამოიჩინა მისი ნაშრომები: „ქართული არქიტექტურის საკითხისათვის შუა საუკუნეების ევროპულ აღმოსავლეთში“, „სკანდინავიულები და ქართველები პონტო-ბალტიის სანაპიროზე“, „დოქტორი ოტო ფონ ვეზენდოკი – როგორც ქართველოლოგი“, „დასავლეთ ევროპის რომანული არქიტექტურისა და ქართული არქიტექტურის პარალელების ახსნის ცდა“, „დასავლეთ ევროპა და კავკასია პარალელების სახით“, „სუმერთა პირვანდელი ადგილსამყოფელის საკითხისათვის (კავკასია შესაძლოა პირველსამშობლოა სუმერთა ლითონის)“ და სხვ.

ამრიგად, შეიძლება ითქვას, რომ ევროინტეგრაციისა და ევროპოლოგიის განვითარებაში შეტანილია ქართული წვლილიც, რითაც შეგვიძლია დღეს ვიამაყოთ.

### კითხვები:

1. დაახასიათეთ მიხეილ მუსხელიშვილის პიროვნება და მისი ღვანილი ევროინტეგრაციის დაწყების საქმეში.
2. რა როლი მიუძლვით ძმებ ნიკურაძეებს ევროპაში ქართული პრობლემის დასმის და ევროპოლოგიის განვითარების საქმეში?

## §14-15. ძართულ-ევროპული თანამედროვე ურთიართობაში – სწრაფა ევროპავჭირისაკან

საქართველოს დამოუკიდებლობის პერიოდში (1918-1921) ევროპის ქვეყნებთან თვისებრივად ახალი ურთიერთობები ჩამოყალიბდა. გამოაცხადა რა საქართველოს დამოუკიდებლობა (1918 წლის 26 მაისი), ნოე უორდანიას მთავრობამ პროევროპული ორიენტაცია აირჩია და უარყორუსეთან მჭიდრო ურთიერთობის გზა.

მთავრობამ მიზნად დაისახა საქართველოს მიღება ერთა ლიგაში, რაც უმნიშვნელოვანესი ბერკეტი გახდებოდა და დამოუკიდებლობისა და ტერიტორიული მთლიანობის შესანარჩუნებლად. სამწუხაროდ, ერთა ლიგაში საქართველოს მიღების საკითხის განხილვა გადაიდო (მიღებას მხარი დაუჭირა 23-დან 10-მა ქვეყანამ), რაც გახდა ბოლშევიკური რუსეთისთვის მინიშნება საქართველოს ოკუპაციისათვის. 1921 წლის თებერვალ-მარტში რუს ბოლშევიკთა არმიამ, რომელსაც ქართველები მოუძღვნდნენ წინ (სერგო ორჯონიშვილე, ფილიპე მახარაძე და სხვები) მოახდინა დამოუკიდებელი საქართველოს ანექსია, რამაც თითქმის 70 წელი გასტანა.

ქართველი ხალხი შინაგანად არასოდეს შეგუებია დამოუკიდებლობის დაკარგვას. 1985 წლიდან, „პერესტროიკის“ დაწყების შემდეგ, საბჭოთა კავშირის ზოგიერთ რესპუბლიკაში დაიწყო ეროვნულ-განმათავისუფლებელი მოძრაობის ახალი ეტაპი, რომელიც საქართველოში 1991 წლის 9 აპრილს დამოუკიდებლობის აღგენით, მისი ოფიციალური გამოცხადებით დაგვირგვინდა. ქვეყანაში სამოქალაქო დაპირისპირების მიუხედავად (1991-1993), საქარ-

თველომ მოიპოვა საერთაშორისო აღიარება (1992 წლის 31 ივნისს იგი გაერო-ს წევრი გახდა) და კვლავ დაიწყო აღმოსავლეთსა და დასავლეთს შორის დამაკავშირებელი ხიდის როლის შესრულება.

1999 წლის 27 იანვარს ევროსაბჭოში გაწევრიანებით დაიწყო საქართველოს ნელ-ნელა ინტეგრაცია ევროპულ სტრუქტურებში. მანამდე კი, 1996 წლის 22 აპრილს ლუქ-სემბურგში ხელი მოეწერა შეთანხმებას თანამშრომლობის შესახებ ევროკავშირსა და საქართველოს შორის, რომლითაც დაიწყო ახალი ურთიერთობები ევროპული ინტეგრაციის გზაზე. ევროპული ინტეგრაცია კი ეფუძნება შემდეგ ღირებულებებს:

- ადამიანის უფლებათა დაცვა;
- კანონის უზენაესობა;
- პლურალისტური დემოკრატია;
- ევროპული კულტურა და ევროპული კულტურული იდენტობის ძიება.

საქართველოს ევროკავშირის წევრად გახდომამდე ჯერ კიდევ დიდი გზა აქვს გასავლელი ეკონომიკური და ადამიანის უფლებათა, კანონის უზენაესობის უზრუნველყოფის და პლურალისტური დემოკრატიის განვითარების კუთხით.

საქართველო ევროპისა და აზიის გასაყარზე მდებარეობს და ერთმანეთთან აკავშირებს მნიშვნელოვან ეკონომიკურ რეგიონებს და ქვეყნებს – ევროკავშირს, კავკასიას, აზიის რეგიონებს და თურქეთს. საქართველოზე გადის დასავლეთ ევროპას, კასპიის ზღვის აუზსა და შუა აზიას შორის ნავთობის, გაზის და ტვირთის ტრანსპორტირების უმოკლესი ტრანზიტული მარშრუტები, სამხედრო გზები.

აქ უკვე გადის ბაქო-სუფსის, ბაქო-თბილისი-ჯეიპანის ნავ-თობსადენები, შაპ-დენიზის გაზსადენი და სხვ. 2013 წელს დამთავრდება ბაქო-თბილისი-ყარსის 105 კილომეტრიანი მონაკვეთის მშენებლობა, რომელიც საქართველოს რკინიგზას უშუალოდ დააკავშირებს ევროპასთან. თბილისის, ბათუმის და ქუთაისის, ფოთის ახალი საერთაშორისო აეროპორტების გახსნამ საქართველოში მნიშვნელოვნად გაზარდა ტურისტთა რაოდენობა და საქმიანი აქტივობა.

2004 წლის ივლისიდან საქართველო ჩართულია ევროპულ სამეზობლო პოლიტიკაში (ENP). 2006 წელს ერთობლივად მიღებულ იქნა ევროპული სამეზობლო პოლიტიკის სამოქმედო გეგმა (ENP AP).

პარტნიორობისა და თანამშრომლობის შესახებ არსებული ხელშეკრულება შეიცვალა ახალი იურიდიული ფორმატით, რომელიც უკეთ ასახავს საქართველო-ევროკავშირის ურთიერთობის ამჟამინდელ დონეს.

2006 წლის ნოემბრიდან, ევროპული სამეზობლო პოლიტიკის სამოქმედო გეგმის მიღებიდან მოყოლებული, საქართველო ნარმატებით აგრძელებს სამოქმედო გეგმის განხორციელებას, რომლის მიმდინარეობა ევროკომისიის მიერ ძირითადად დადებითად შეფასდა.

ევროპული სამეზობლო პოლიტიკის პრიორიტეტები ეფუძნება კონფლიქტების მშვიდობიანი გადაწყვეტის მხარდაჭერას, რომელიც მოიცავს:

- კანონის გაძლიერებას და მის უზენაესობას (განსაკუთრებით სასამართლო და პენიტენციალური სისტემის ჩათვლით);
- სახელმწიფო ინსტიტუტების აღმშენებლობას, დემოკრატიული ინსტიტუტების გაძლიერებას და ადამია-

ნის უფლებათა და ფუნდამენტური თავისუფლებების პატივისცემას საქართველოს საერთაშორისო ვალდებულებების შესაბამისად;

- ბიზნესისა და საინვესტიციო გარემოს განვითარებას, რომელიც მოიცავს გამჭვირვალე პრივატიზაციის პროცესს და კორუფციის წინააღმდეგ უწყვეტ ბრძოლას, ეკონომიკური განვითარების წახალისებას და სიღარიბის დაძლევისათვის ზომების მიღებას;
- სოციალური განვითარების წახალისებას, რომელიც მოიცავს ასევე გარემოს დაცვას;
- რეგიონული ურთიერთობანამშრომლობის გაძლიერებას და საერთაშორისო და უსაფრთხოების სფეროში თანამშრომლობას, ტრანსპორტისა და ენერგეტიკის განვითარებას;
- სამეცნიერო და განათლების სფეროებში ურთიერთობების წახალისებას, განსაკუთრებით საქართველოს განათლების სისტემის ბოლონიის პროცესის მოთხოვნილებებთან შესაბამისობაში მოყვანას.

### **აღმოსავლეთთან პარტნიორობის პროგრამა**

2009 წლის 7 მაისს ჩეხეთის დედაქალაქ პრაღაში ევროკავშირის აღმოსავლეთთან პარტნიორობის პროცესს ჩაეყარა საფუძველი, რომელშიც ჩართულია საქართველოც. 2009 წლის 2 აპრილს ევროკომისიის გადაწყვეტილების საფუძველზე დაიწყო ოფიციალური მოლაპარაკება ევროკავშირსა და საქართველოს შორის ვიზის გაცემის გამარტივებასა და ახალი ხელშეკრულების მიღების თაობაზე. მოლაპარაკება წარმატებით დამთავრდა და 2012 წლიდან პროფესორ-მასწავლებლებსა და სტუდენტებს,

ბიზნესმენებს, სპორტსმენებს, ხელოვნების მუშაკებს უკვე შეუძლიათ ევროკავშირში შესასვლელი ვიზის მარტივად მიღება.

2011 წლის ბოლოს დაიწყო საქართველო-ევროკავშირის მოლაპარაკება ლრმა და ყოვლისმომცველი თავისუფალი სავაჭრო შეთანხმების (DCFTA), როგორც ევროპასთან ასოციაციის შეთანხმების ნაწილის, თაობაზე. ევროკომისიის რეკომენდაციით უკვე შექმნილია სპეციალური ინტერმინისტერიალური ჯგუფი, რომელიც 2013 წლის ბოლომდე დაამთავრებს ამ პროცესს და შემდეგ ქართულ პროდუქციას მიეცემა უფლება გავიდეს ევროკავშირის ქვეყნების ბაზრებზე.

### **მობილობა**

საქართველომ გამოხატა საკუთარი მზადყოფნა „წრიული მოგრაციის“ კონცეპციასა და ხალხის მობილობასთან დაკავშირებულ საკითხებზე ევროკავშირთან სათანამშრომლოდ. ერთობლივ დეკლარაციას „პარტნიორობა მობილობაზე“ ხელი მოეწერა 2009 წლის 30 ნოემბერს ბრიუსელში. იგი მოიცავს ისეთ მნიშვნელოვან საკითხებს, როგორიცაა: მიგრაციის მენეჯმენტი, რეინტეგრაცია, დიასპორა, დოკუმენტაციის უსაფრთხოება, საერთო მონაცემთა ბაზა მიგრაციაზე და ინფორმაციის გაცვლა ევროკავშირთან, შრომის ბაზარი და პროფესიული კვალიფიკაციის აღიარება ევროპაში.

TEMPUS-ის პროგრამა მიმართულია ლისაბონის სტრატეგიისა და ბოლონიის პროცესის შესაბამისად საქართველოში საგანმანათლებლო სისტემის მოდერნიზაციაზე – გამოიყო 11 მილიონი ევრო, შესრულდა 26 პროგრამა.

**ერაზმუს მუნდუსის საგარეო თანამშრომლობის პროგრამა მიზნად ისახავს ევროკავშირსა და მესამე ქვეყნებს შორის თანამშრომლობის გაღრმავებას საგანმანათლებლო სფეროში, რაც უმაღლეს გაცვლით პროგრამებს მოიცავს.**

სამხრეთ კავკასიის ინტეგრირებულ პირთა მენეჯმენტის (SCIBIM) პროექტი მიზნად ისახავს სამხრეთ კავკასიაში პირთა გადაადგილებისა და საქონლის გადაზიდვის ხელშეწყობას, ასევე საზღვრების უსაფრთხოების უზრუნველყოფას, უწყებათშორისი, ორმხრივი და რეგიონალური საზღვრების მენეჯმენტის გაძლიერების მეშვეობით ქვეყნის შიგნით და მის საზღვრებს გარეთ როგორც სამხრეთ კავკასიის რეგიონში, ისე ევროკავშირის წევრ ქვეყნება და საერთაშორისო მონაწილეებს შორის და გაგრძელდება 2013 წლამდე.

### **ევროკავშირი და საქართველოში არსებული კონფლიქტები**

შეიძლება ითქვას, რომ ევროკავშირმა ცენტრალური როლი ითამაშა 2008 წლის აგვისტოს რუსეთ-საქართველოს სამხედრო კონფლიქტის შეწყვეტისა და მისი წევა-ტიური შედეგების ნაწილობრივ ლიკვიდაციის საქმეში. საკროზი-მედვედევის 6-პუნქტიანი შეთანხმება ითვალისწინებდა ცეცხლის შეწყვეტას და მხარეების დაბრუნებას საწყის პოზიციებზე. ცეცხლი კი შეწყდა, მაგრამ ყველა საერთაშორისო ნორმის დარღვევით რუსეთმა აღიარა აფხაზეთისა და სამხრეთ ოსეთის დამოუკიდებლობა, განათავსა იქ თავისი სამხედრო ბაზები და ტექნიკა, სამხედრო ნაწილები, მოახდინა საქართველოს ტერიტორიის 20%-ის ოკუპაცია.

რუსეთი უარს აცხადებს ლტოლვილთა და იძულებით გადაადგილებულ პირთა დაბრუნებაზე და ბლოკავს ოკუ-პირებულ ტერიტორიებზე საერთაშორისო ორგანიზაციების შესვლას.

ევროკავშირმა არ აღიარა აფხაზეთისა და სამხრეთ ისეთის დამოუკიდებლობა. იგი მხარს უჭერს საქართველოს ტერიტორიულ მთლიანობას და დამოუკიდებლობას. ევროკავშირმა და ევროსაბჭომ მიიღეს რეზოლუციები, რომლითაც მხარს უჭერენ ზემოთქმულს და მოუწოდებენ რუსეთს ამ რეგიონების დეოკუპაციას. მას შემდეგ, რაც რუსეთმა დაბლოკა ევროკავშირისა და გაეროს მისიები საქართველოში, ერთადერთი საერთაშორისო წარმომადგენლობა ქვეყანაში რჩება ევროკავშირის მონიტორინგის მისია (EUMM). ქართული მხარის მონდომების მიუხედავად, მას რუსები არ აძლევენ ოკუპირებულ ტერიტორიებზე მონიტორინგის უფლებას.

არ უნდა დავივიწყოთ, რომ 2009 წლიდან ევროკავშირმა ერთი მილიარდი ევროს ოდენობის დახმარება აღმოჩენა 2008 წლის რუსეთთან ომით დაზარალებულ საქართველოს და ლტოლვილებს, იძულებით გადაადგილებულ პირებს.

### **საქართველო – აშშ – ნატო-ს ურთიერთობები**

ევროკავშირთან ერთად საქართველო აქტიურ ურთიერთობებს აგრძელებს ჯერჯერობით ისევ მსოფლიოს ლიდერ სახელმწიფოსთან – აშშ-სთან.

2009 წლის 9 იანვარს ვაშინგტონში აშშ-მა და საქართველომ ხელი მოაწერეს სტრატეგიული პარტნიორობის ქარტიას, რაც ეკონომიკის, ენერგეტიკის, დიპლომატიის,

სამეცნიერო, კულტურის და სამხედრო-უშიშროების სფეროებში თანამშრომლობას გულისხმობს. აშშ აგრძელებს ფინანსურ და ტექნიკურ დახმარებას სხვადასხვა სფეროებში, თუმცა მან ვერ შეძლო საქართველოსთვის ქმედითი დახმარების აღმოჩენა 2008 წლის რუსეთ-საქართველოს სამხედრო კონფლიქტის დროს.

რაც შეეხება საქართველო-ნატოს პარტნიორობას, იგი იწყება 1992 წლიდან, როდესაც სსრ კავშირის დაშლის შედეგად, დამოუკიდებლობის მოპოვების შემდეგ საქართველო შეუერთდა ჩრდილო-აჭლანტიკური თანამშრომლობის საბჭოს (1997 წლიდან ევროატლანტიკური თანამშრომლობის საბჭო).

შემდეგ თანამშრომლობა ნელ-ნელა გაღლმავდა – საქართველო ჯერ შეუერთდა პროგრამას „პარტნიორობა მშვიდობისათვის“ (1994), მერე კი „პარტნიორობა მშვიდობისათვის“ პროგრამის დაგეგმვისა და გადახედვის პროცესს (1999). 2004 წელს საქართველომ მიიღო ნატოს-თან პირველი ინდივიდუალური პარტნიორობის სამოქმედო გეგმა (IPAP), 2006 წლის სექტემბერში კი ნატოში გაწევრიანებაზე ინტენსიური დიალოგის წარმოებაზე თანხმობაც. 2008 წლის აპრილში ნატოს ბუქარესტის სამიტზე ნატოს ქვეყნებმა მიიღეს გადაწყვეტილება, რომ საქართველო მომავალში გაწევრიანდება ნატოს ალიანსში, თუმცა არ მოგვცეს მაპ-ი, რაც რუსეთისათვის აღმოჩნდა მინიშნება, რომ საქართველოს ტერიტორიის ოკუპაცია მოქმდინა.

საქართველო ჩართული იყო ჯერ ერაყის, ამჟამად კი ავღანეთში მიმდინარე საერთაშორისო უსაფრთხოების უზრუნველყოფის ძალების (ISAF) მისიაში (სადაც რამდენიმე

ქართველი ჯარისკაცი დაიღუპა უკვე). ეს არის გარკვეული კონტრიბუცია, რომელსაც იძულებით იხდის საქართველო ნატოში გასაწევრიანებლად და რასაც კატეგორიულად ენინააღმდეგება რუსეთი.

აქვე ისმება დილემაც: განევრიანდება თუ არა როდესმე საქართველო ნატოში და იქნება თუ არა ეს ტერიტორიული გამთლიანების გარანტია, თუ რუსეთის ისევ თავისას გაიტანს და დაბლოკავს საქართველოს შესვლას ნატოში? რის ხარჯზე შეიძლება განევრიანდეს საქართველო ნატოში?

ამ კითხვებს პასუხი უახლოეს წლებში გაეცემა.

### პირავაზი:

1. როდის დაიწყო და რა მიმართულებით ვითარდება საქართველოს ურთიერთობა ევროკავშირთან?
2. რა პრიორიტეტები გამოიყოფა აშშ-საქართველოს ურთიერთობებში?
3. რამდენად რეალურია საქართველოს განევრიანება ევროკავშირსა და ნატოში?

## გამოყენებული ლიტერატურა:

1. პაპაშვილი მ., საქართველო-რომის ურთიერთობა, გა-  
მომცემლობა „აღმაშენებელი“, თბ., 1995.
2. ბადრიძე შ., საქართველოს ურთიერთობები ბიზანტია-  
სა და დასავლეთ ევროპასთან, თბ., 1984.
3. ავალიშვილი ზ., ჯვაროსანთა დროიდან, თბ., 1989
4. მეტრეველი რ. დავით IV აღმაშენებელი, თბ., 1990.
5. ტაბაღუა ი. საქართველო ევროპის არქივებსა და წიგნ-  
საცავებში (XIII-XVIII სს.), ტ. I, II, III.
6. თამარაშვილი მ. ისტორია კათოლიკობისა ქართველთა  
შორის, ტფილისი, 1902.
7. ტუხაშვილი ლ. ქართული დიპლომატიის ისტორიიდან,  
წიგნი I, თბ., 1994.
8. ლუს ხილი ფერნანდესი, ილია ტაბაღუა, დოკუმენტები  
საქართველოს ისტორიისათვის ესპანეთის არქივებსა  
და ბიბლიოთეკებში (XV-XVII სს.), მაღრიდი, 1993.
9. ელბერტ ბატიაშვილი, ილია და საქართველო, თბ.,  
1998.
10. შუბითიძე ვ. პოლიტოლოგია (სახელმძღვანელო), თბ.,  
2006.
11. ჯიჯეიშვილი ქ. ქართული დემოკრატიის სათავეებთნ  
(ნ. ნიკოლაძე, ა. ჯორჯაძე), თბ., 2002.

12. შუბითიძე ვ. ნოე უორდანიას პოლიტიკური შეხედულებები, თბ., 2003.
13. ხუნდაძე ს. მასალები ლიტერატურისა და საზოგადოებრივი აზროვნების ისტორიისათვის, თბ., 1949.
14. ფერაძე ი. რეკლამის ისტორია, წიგნი I, თბ., 2010.
15. უორდანია ნ. რჩეული ნაწერები, თბ., 1990.
16. საქართველო ევროპულ სივრცეში – საქართველოს ტექნიკური უნივერსიტეტის სამეცნიერო კონფერენცია. შრომები, თბ., 2010.
17. შარაძე გ. უცხოეთის ცის ქვეშ. წიგნი I-II-III, თბ., 1991-1993.
18. უურნალი „ბედი ქართლისა“, პარიზი, 1951-1952.

## იბეჭდება აეტორის მიერ წარმოდგენილი სახით

გადაეცა წარმოებას 12.06.2013. ხელმოწერილია დასაბეჭდად  
24.06.2013. ქაღალდის ზომა 60X84 1/16. პირობითი ნაბეჭდი თამაზი 10.

საგამომცემლო სახლი „ტექნიკური უნივერსიტეტი“, თბილისი,  
კოსტავის 77



Verba volant,  
scripta manent

10c.

en 157/1387



291.512

3



A standard linear barcode.

9 789941 202964